

## Jesúsxõ Tãpimisfãfe Apaonifo Keskara

*“Niospa ãfe Yõshi Shara matoki nĩchixii kiki,” ixõ  
Jesús yoini aõxõ tãpimisfo*

<sup>1</sup> Teófilo, ã mia anã kirika kenexoni mia yoikĩ. Ëfi Lucaski, mia kirika fomai. A Jesús nai mēra kayoxoma afama mĩshtifo fayanã ato tãpimapaoni keskara yoikĩ ã mia kirika kenexõ fomayoni, mĩ tãpinõ.

<sup>2-3</sup> Mã Jesús retefiafono oxa rafeta anã otoni. Mã otoxõ aõxõ tãpimisfo ato ifixõ ato tãpimani Niospa Yõshi Sharapa shinãmanaino akairi fet-safo tãpimanõfo. A metasitafo ato ispaketsani a aõxõ tãpimisfo. “Nafo ea metasitafokĩ õikapo,” ato fani õikakĩ tãpisharanõfo. Mã anã nia afia ipaoni keskara ixõ tãpinõfo ato yoisharani nai mēra kayoxoma. Cuarenta nia oxata ato tãpimasharani chipo katãxiki ato yoipakeyoni a Nios xanĩfoõnoa ato yoisharapakeni. Nãskax Apa Nios ari kani nai mēra.

<sup>4</sup> Nai mēra kayoxoma anã pena fetsa aõxõ tãpimisfo yoisharani iskafakĩ: “Nonoax fakifoyoyamakãfe. Ë mato yoisharayanõ, mã nikasharanõ. Ëfe Epa ãfe Yõshi Shara matoki nĩchixii kikĩ a ã mato yoimis keskafakĩ. Mã mã nikafafainakĩ ã mato yoiaito. Nãskakē na Jerusalén anoxõ manayokãfe, ãfe Epa ãfe Yõshi Shara mato mēra naneyonõ.

<sup>5</sup> Juan mato maotisafakĩ faka mēra ikimapakeni Niospa mãto chaka mato soaxonano mã ato

ōimanō. Nāskafakīri samama fatora penata Niospa āfe Yōshi Shara mato mēra naneaino mā shinā sharaya ixii.”

### *Jesús nai mēra kani*

<sup>6</sup> Anā ano fisti Jesús fe ichanākaxō yorafāfe yōkanifo iskafakakī: “¿Ifo, iskaratīa nōko kaifo israelifāfe āto xanīfo mī ikimē? ¿Anā nafa nōko xanīfo ixiimamē?” fanifo yōkakakī.

<sup>7</sup> Askafaifāfe Jesús anā ato yoini iskafakī: “Tsōa tāpiama. Epa Nios fistichi tāpia. Afetīara inōpokoi mā tāpitiroma.

<sup>8</sup> Mā tāpiyamafitirono Niospa āfe Yōshi Shara mato mēra naneano aōxō mā afama mīshti tāpitiro. Nāskakē mā eōnoa ato yoitiro mēstekōi. Taefakī nā Jerusalén anoafō yoita, nā Judea anoafō yoita, nā Samāria anoafō yoita, keyokōi nā maitio anoafō eōnoa mā ato yoitiro,” ixō Jesús aōxō tāpimisfo yoini.

<sup>9</sup> Nāskata mā ato yoita Apa Niospa ifiaino nai mēra kani. Aōxō tāpimisfāfe ōiaifono fininākfā kani. Mēstekōi māpeinīfofani nai kōi mēra ikikainaito aōxō tāpimisfāfe anā ōinifoma mā kaano.

<sup>10</sup> Nai mēra foisaifono feronāfake rafe ato ketaxamei nītanifo rapati oxo shara safekanax ato yoinifo iskafakī:

<sup>11</sup> “¿Na Galilea anoafāfe, afeskakī mā nai mēra foisimē? Mā Jesús nai mēra kaa. Afetīara anā matoki oxii. Fatora penata afia mā kaito ōia keskara oxii kiki,” ixō feronāfake rafeta ato yoini.

### *Jerusalén anoax aōxō tāpimisfo ichanānifo*

12 A mächifanē āfe ane Olivos anoax Jesús ronoinākaḡā nai mēra kaito ōikata anā anoris fenifo Jerusalén ano chaima. Un kilometro Olivos fe Jerusalén nā tiixō rafe ini.

13-14 Jerusalén ano nokokata pexe mēra iki-faikata fomākīa māpeinīfoḡākata a ikafo ano iki-fainifo. Ano ikifaikanax ano fistiax ichanānifo. Pedro ikaino, Jacobo ikaino (nā Jacobo āfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús āfe afa María ikaino, a kēro fetsafori ikaifono ano fisti ichanānifo Nios kīfikani. Nānoxō pena tii Nios kīfifāinifo.

15 Askata pena fetsa yora rasi ciento veinte ichanānifo. Askaifono Pedro niinākaḡā ato yoini

16 iskafakī: “Efe yorafāfe, ea nikakōisharakāfe ē mato yoinō. Na Judaspafi yorafo iyoita Jesús achi-fonōfo. ‘Fato Jesús mākī noko yoife,’ faifāfe, ‘Nakīa,’ ato faito ōikakī achitafo. Afia Niospa shināmanaino nōko xini David yoikī kirika kenepaoni keskafakī Judaspa ato yoita.

17 Na Judas nofe rafemis noko akai keskari fakī Jesús ifini. Nāskakē nofeta yonoxofikatsaxakī mā chakafakī yorafo ato achimanita,” ixō Pedro ato yoini.

18 (Ato askafaito kori ināitafo āa anofi chakamenō. Kori ināiafono anā anoris xanīfofo ināita. Nā kōri xanīfofoḡāfe mai fiitafo. Askata Judas āa tenexemeta ifiki nexeax ronoinākaḡāita. Ronoax ariax xetaori pakei mā nafaraxikax āfe poko napakemeita.

19 Askaito nikaitafo Jerusalén anoxõ. Anoax ãfe imi fokẽ nã mai aneitafo “Acéldama” ixõ aneitafo. Nõko mekapa nõ yoitiro iskafakĩ: “Imi Mai” fakĩ.)

20 Askata anã Pedro ato yoini iskafakĩ: “Nõko xini David a inõpokoai yoikĩ kirika Salmos ano keneni a Judasnoa yoikĩ iskafakĩ:

A yõra ãfe mai ano tsoa inõma,  
yoikĩ keneni. Nãskata anã yoini iskafakĩ:

Feronãfake fetsa a yonomis ano ikiakẽkafanõ,  
ixõ anori yoikĩ noko kenexoni.

21 “Nãskakẽ iskaratĩa a feronãfake fetsa nõ ifinõ, a nofe Judas ipaoni keskara inõ. Fatora fetsa nõ ifinõ, a Jesús fe taefenai kafãsa paoni keskara nofe inõ.

22 Nã nofe ixõ õini Juan Jesús maotisafakĩ faka mẽra ikimanaino, nãskakẽ mẽxotaima nofe imis, akka mã Jesús nai mẽra kaito nofeta õitakĩ, nãskakẽ nõ ifinõ nofeta ato yoimis inõ. Nofe rafexõ Jesúsnoa iskafakĩ yoinõ: ‘Mã Jesús nayofiax mã anã otofaa,’ ixõ ato yoinõ,” Pedro ato fani.

23 Ato askafaino José Barsabás fe Matías nãno inifo. Nã rafe ato ifipaikĩ, “¿Fato nõ ifimẽ?” ixõ shinãnifo. Nã José Barsabás ãfe ane fetsa Justo.

24 Askata a rafe ifipaifikakĩ fisti ifinifo. Nãskakẽ Nios kĩfinifo iskafakakĩ: “Epa Niospa, ¿fato nõ ifimẽ? Epa, mĩ nõko Ifoki. Keyokõi nõko õiti mẽra mĩ tãpikõiaiki. Nãskakẽ noko tãpimafe fato mĩ ifiamãki nofeta mĩõnoa yoimis inõ.

25 Judaspa Jesús ato achimaita. Nãskakẽ Judas naax omiskõipakenaka. Nãskakẽ Judaspa anã mĩõxõ yonotiroma nofeta. Noko tãpimafe fato a Judas ipaoni keskara itiomãkĩ mĩõxõ ato yoimis inõ,” ixõ Nios kĩfinifo.

<sup>26</sup> Nāskakata āto ane rafe tokiriki kenexō kesho mēra nanexō napakefofānaifono fisti pakeaito ōikakī nā ifinifo. Matías āfe ane ini. Nāskakē Matías ifiafono nā feronāfake oncefo feta Jesúsnoa yoimis ini.

## 2

### *Niospa Yōshi Shara ato ōiti mēra naneni*

<sup>1</sup> Askata judeofāfe āto fista Pentecostés ikaino a Jesús Ifofaafo pexe fisti mēra ichanānifo.

<sup>2</sup> Anoxō nikafo nai mēranoax oa nēfefā oi itikikerani pexe mēraxō nikafo.

<sup>3</sup> Nāskata ōiafo oa chii keskara fotopakekafāni. Oa nōko ana keskarafiax oa chii rekēfo keskara maratamefafāinafo ini.

<sup>4</sup> Askaifono Niospa Yōshi Shara ato mēra nanetani. Askaino anā a meka fistichi tsoa mekanima. Meka fetsafāfe fisti rasi mekanifo Niospa Yōshi Sharapa ato meka fetsafamano.

<sup>5</sup> Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafo anoax fekanax.

<sup>6</sup> Anoxō nikafo oa nēfefā oai keskara nikanifo. Askaito nikaferakani a Jesús Ifofaafo ichanāfo ano ikitoshinifo. Tāpipaikani afaa afeskaimākai ikanax. Nāskata nikafo a chai inoax feafāfe āto mekapa mekaifāfe nikanifo, fisti rasi āto mekapa mekaifono. “¿Afeskaxō nōko meka tāpiafomē? Nikakapo,” ato fakī fetsanifo. Askakanax ratei fetsenifo.

<sup>7-8</sup> Rateyanā yoinānifo. Iskanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaxō tāpiafomē mai fetsanoax nō ofiafiano?”

<sup>9</sup> Akka nõ Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo.

<sup>10</sup> Askatari fetsafori Frigia anoax fenifo. Fetsafori Panfilia anoax fenifo. Fetsafori Egipto anoax fenifo. Fetsafori nã Africa fe, Cirene chaima nikakanãfo anoax fenifo. Akka fetsafori judeofo Roma anoax fenifo;

<sup>11</sup> nãfo judeokõifo ini. Akka a Roma anoax feafori judeokõifoma inifo. Nãskafikaxõ mã Nios Ifokani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nõfi mai fetsa fetsatapafõ anoax nõ onikĩ,” ikanax yoinãnifo. “Nãskax nõ ichanãiyoi oa chai inoax, akka nõko mekapa mekaifãfe nõ nikai. Nãskaito nikai nõ ratei,” ikanax yoinãnifo. “Na Galilea anoafõ nõko mekakõichi xafakĩakõi yoikani iskakani: ‘Niospa afama mĩshti tãpikõia,’ ixõ noko yoikani nõko mekapa.

<sup>12</sup> Afeskaxõ na yorafãfe nõko meka nikayamafikatsaxakakĩ noko yoiãifãfe nõ ato nikasharakõi,” ikanax rateyanã yoinãnifo: “¿Afeskai iskafofõ?” ikanax.

<sup>13</sup> Askaifãfe õikakĩ a yora fetsafãfe ato iskafanifo: “¿Afeskai na yorafõ pãekanax nõko mekapa mekakanimẽ?” ixõ yorafãfe ato kaxemetsama fanifo ato õsakakĩ.

### *Pedro Niospa meka ato yoini*

<sup>14</sup> Askaifono Pedro niinãkafã Jesúsxõ tãpimisfo oncefõ feta fãsikõi mekainãkafã ato yoini: “Ëfe

kaifo judeofofāfe na Jerusalén ano ikafo feta, ea nikasharakāfe.

<sup>15</sup> ¿Afeskakī pāekanax nōko mekapa mekakanira, mā noko faimē? Nafo pāekanima. Penamakai tsoa pāeima mā rama xini keyaino.

<sup>16</sup> Nā mā nikai anori Niospa meka yoimisto Joel kirika keneni Niospa Yōshi Sharapa shināmanaino. Nā iskanōpokoai yoikī kirika keneni iskafakī:

<sup>17</sup> A ea Ifofaifo nā maniafo tii anoa ēfe Yōshi Shara āto ōiti mēra ē nanexii. Nāfo askayoi mā chaima nōko mai keyoaino. Afia penatari māto fenafāfe ēfe meka yoixikani. Naetapafāfe ōiafo oa namakē ōia keskara ōixikani. Anifo tiitori eōnoa namaxikani.

<sup>18</sup> Askata a ea yonoxomisfori feronāfakefoya kērofoya ēfe Yōshi Shara ē ato mēra nanei fatora penata ēfe Yōshi Sharaōxō eōnoa ato yoinōfo.

<sup>19</sup> Afama mīshti tsōa ōimisma afo ē ato ispaxii nai arixō, nāmāxori ē ato afama mīshti ispaxii. Imi yafi chii āfe kōimāfāri ōixikani ē ato ōimanaino.

<sup>20</sup> Askatari xinī anā chaxaxima, fakishkōi ixii. Oxeri oa imi keskarakōi ōshikōi ixii. Askata nāfo askai fetseyoi mā chaima māto Ifo oaino. Askata mā māto Ifo nokokōiaino keyokōichi xafakīa ōixikani.

<sup>21</sup> Mā askai fetseaino akka nōko Ifo yoikī fatorafāfe iskafaifāfe: ‘Ifo Cristo, ea shināfe, ē mefe ipaxanō,’ faifāfe ato ifixii, ixō Joel kirika keneni Niospa anori yoiaino,” ixō Pedro ato yoini.

<sup>22</sup> Askatari Pedro anā ato yoini iskafakī: “Israelifāfe,\* ea nikakāfe. Mā mā tāpia Jesús Nazarete

---

\* **2:22** Israelifo āto ane fetsa judeofo ipaoni.

anoa Niospa nai mēraxō nāmā nīchini, nāmāxō mato afama mīshti ōimanō afara sharafo fakī. Mato askafaino mā tāpinō Niospa Jesús nīchinikē.

<sup>23</sup> Nāskafikē māfi Jesús achixō yora chakafo ināyameaki achixō cruzki mastanōfo. Akka reteyoafomano Niospa mā tāpixō Jesús nāmā nīchini: ‘Ēfe Fāke mato nāxoxii,’ ixō Niospa yoini mā tāpixō. Nāskakōikī mātoōxō yora chakafāfe reteyameafo Niospa yoini keskafakī.

<sup>24</sup> Mā retefitafono Niospa anā Jesús otofani. Anākai omiskōinakama. Anākai nanakama. Anākai natiroma.

<sup>25</sup> Askatari a xanīfo David afianori yoikī kirika mēra keneni Cristoōnoa āfe meka iskafakī:

Mē tāpia ēfe Ifo Nios efe itiani. Efe ixō efeta aki kiki. Nāskaxō ea kexei tsōa ea fekaxtefanōma.

<sup>26</sup> Nāskakē ēfe ōiti mēra ē fāsi inimakōi Niospa ea kexesharaino. Nāskakē ē yoikī: ‘Nios fāsi sharakōi,’ ē fafafaīni. Ē Nios chanīmara fakōini afe ipaxakī ēfe yora ea fena faxōano.

<sup>27</sup> Ea potayamaino ēfe fero mēsho omiskōipakenakama. Ēfe yora mai mēra nēteima. Epa Niosi, mī ea noi. Ēfi mī fakekōikī, ēfe yora mī pīsi famaīma.

<sup>28</sup> Ē nafiakē mī ea nimapakenaka. Ē mia ari kai, mefe ikax ē inimakōixii, ixō David yoini Cristoōnoa yoikī.

<sup>29</sup> “Efe yora mīshtichi, ea nikakāfe. Nōko xini David āa yoikī kenenima. Jesúsnoa yoikī keneni. Afetīama mā David nani. Mā nō tāpia a maia ano.

<sup>30</sup> A nā askanōpokoai yoikī keneni. Niospa David yoini iskafakī: ‘Ē mia yoi na chipo kāiyai mī fena ēfe Fakekōi ixii. Mia keskara xanīfokōiri ixii. Ēfi



Nioskĩ. Ĕ mato p̄araima, ixō Niospa yoini. Niospa yoiaito nikakĩ David chanĩmara fani, t̄apini Niospa p̄arayamaino.

<sup>31</sup> Nāskakē David t̄apixō a inōpokoai Cristoōnoa yoini iskafakĩ:

Nafiax otoxii. Nāskax āfe fero mēsho omiskōipakenakama, āfe yorari pisinakama, ixō David kenei.

<sup>32</sup> Nā David yoini keskakōifakĩ Epa Niospa mā Jesús otoakē nō ōita keyokōichi.

<sup>33</sup> Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikĩ taefani iskafakĩ: ‘Ĕfe Yōshi Shara Ĕ atoki nīchixikai nāmā,’ ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfefā keskara Niospa āfe Yōshi Shara nokoki nīchia. Nāskakē nō m̄ato meka nikayamafikatsaxakĩ nō meka fetsafāfe nō mekai fetsea. Mā chai inoax oxō mā noko nika, nō m̄ato mekapa mekai fetseaito.

<sup>34-35</sup> Nāskakē m̄ari t̄apikāfe, nānori David kirika kenenikĩ Jesúsnoa yoikĩ. Āa yoinima. David otoax nai mēra kanima. Nāskaxō kirika kenepakekĩ yoini iskafakĩ nōko Ifo Cristoōnoa:

Nono efe ife, efe xanīfokōi ixiki. A mia noikaspaifo Ĕ ato mī nāmā nīchinō, ixō yoini Niospa. Nānori t̄apixō David yoikĩ kirika kenei,” ixō Pedro yoini.

<sup>36</sup> Askata Pedro anā ato yoini: “Ĕri mato anori yoikai, israelifāfe, Ĕ mato p̄araima. Mā Jesús retekĩ mā mastayamea. Akka Niospa yoini Jesucristo nōko Ifokōi inō,” ixō Pedro ato yoini.

<sup>37</sup> Ato askafaito nikakakĩ shinānifo: “¿Afeskakĩ

Jesús askafayameafomē?” ixō shinākī ato ōitinī shināketsanifo, Jesús shinākakī. Askata Pedro yafi a Jesúsnoa yoimis fetsafori yōkanifo: “No fe yorafāfe, nō mato nikai. ¿Nō anā afeskatiromē?” ixō ato yōkanifo.

<sup>38</sup> Askafaifāfe nikakī Pedro ato yoini: “Iskaratīa māto chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafaifono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kikī mato fe rafekōinō.

<sup>39</sup> Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Māto fakefori, māto fenafori a chai ikafo tiiri nā fake refonoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

<sup>40</sup> Ato askafakī yoita anā Pedro ato yoini ato iskafakī yoivanā: “Māto chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexemesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe ĩpaxanō,” ixō Pedro ato yoini.

<sup>41</sup> Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekī. A ato maotisafaifo tres mil yorafo ini. Nāskax ato fe rafenifo a Jesús Ifofakakī taefanifo fe.

<sup>42</sup> Nāskakē keyokōichi ato nikakōinifo a Jesúsnoa yoimifāfe ato yoiaifono. Nāskax Jesús Ifofaafō fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús

shinã kakĩ, a ato nãxoyamea. Nãskakẽ Nios kĩfitai fapaonifo pena tii ichanãkaxõ.

*Jesús Ifofamisfo isharakõipaonifo*

<sup>43</sup> Nãskaxõ anoxõ a Jesúsnoa yoimisfãfe, nã docefãfe, afama mĩshtifo apaonifo, yonaifono ato sharafata, afara fetsafori apaonifo, nãskaxõ afama mĩshti faifãfe ato tãpinõfo. Nãskafaiãfe õikani keyokõi anoax yorafo ratenifo.

<sup>44</sup> Jesús chanĩmara fakani pena tii ichanãnifo. Anoax ãto afama mĩshti paxkanãi fetsexikakĩ.

<sup>45</sup> ãto afarafo ato minikaxõ kori fixõ, a afaama-isfo kori inãnifo tosa afayakẽma.

<sup>46</sup> Nãskata pena tii Nios kĩfiti pexefã mẽranoax ichanãkaxõ Nios kĩfinifo. Nãskaxõ ãto pexe mẽraxõ a Jesús ato nãxoyamea shinãkakĩ pãa torepakexõ pinifo inimakõiyana.

<sup>47</sup> “Aicho, Nios fãsi sharaki,” ikanax inimai finakõinifo. Askaiãfe õikani a Jerusalén ano ikafãfe ato yoinifo iskafakakĩ: “Na Jesús Ifofaafõ isharakõiafo,” ixõ ato yoinifo. Nãskakẽ pena tii a yora fetsafãferi Jesús Ifofaifono Niospa ato chaka soaxoni. Nãskax nã Jesús rama Ifofaifo fe ano fistiax ichanãnifo, ato fe rafekanax.

### 3

*Pedro feta Juan yora finimisma sharafanifo*

<sup>1</sup> Askata a Nios kĩfiti pexefã mẽra Pedro fe Juan yãtapake fonifo. Yãtapakes anoxõ yorafãfe Nios kĩfifokani fopaonifo.

<sup>2</sup> Nã Nios kĩfiti pexefã kãiti ano feronãfake finimisma nãskarapa kãini tsaoa ini. Nã mẽxotaima iyopaonifo pexe fepoti ano, nã pexe fepotinĩ afe

ane “Sharashta” fanifo. Anoxō ikiaifāfe ato kori yōkanō iyopaonifo.

<sup>3</sup> Pedro fe Juan ikifainaifāfe ōikī a finimismato ato kori yōkani iskafakī: “Ea kori inākāfe,” ato faito,

<sup>4</sup> Pedro feta Juan feesnifo. Pedro yoini iskafakī: “Noko feisfe,” fani.

<sup>5</sup> Askafaito, “Ea kori inākanira,” ixō ato feisni.

<sup>6</sup> Ato feisaito Pedro yoini: “Ē mia kori ināima. Ē koriyama. Ē mia kori inākima ē mia sharafatiro. Nikafe, ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

<sup>7</sup> Askata Pedro mētsoinīfofāni aō pōya mēste aōxori. Nāskax a finimisma fininākafani. Pedro mētsoinīfofānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni.

<sup>8</sup> Nāskax inimakōini. Askata mono mono ini. Mono mono ita Pedro fe Juan ikifainaifono, akairi ato fe ikikaini ichotiri ichotiri ikani inimayanā. Nios kīfiti pexefā mēra ato fe ikikaini. Askata mekani: “Aicho, Niospa mā ea sharafaki,” ixō Nios sharafani.

<sup>9</sup> Askaito yorafāfe a ichanāfo anoxō ōiketsanifo kafāsaito Nios yoisharayanā.

<sup>10</sup> Askata, “Kee, ōikapo. Mā finia, na pexe kāiti āfe ane ‘Sharashta’ ano tsaotiani, a ato kori yōkamis. ¿Afeskax finiamē?” ikanax yoinānifo, rateyanā.

*Nios kīfiti pexefā kene fetsa āfe ane Salomón anoxō Pedro ato yoini*

<sup>11</sup> Pedro fe Juan kaino ato fe kani nā finimisma mā sharax. Nā Nios kīfiti pexefā kene fetsa mēra ikifainifo. A pexe kene āfe ane “Salomón” ini. Askaito nikakani yorafāfe ōifokani ichonifo ano

ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax.

12 Askaifāfe ōikī Pedro ato yoini iskafakī: “Israelifāfe, ea nikakāfe. ¿Afeskax nā finimisma sharamē ixō mā shināimē? ¿Afeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani.

13 Askata anā Pedro ato yoini: “Nōko xinifo Abraham, Jacobo, Isaaca atiito Nios Ifofapaonifo. Afia fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiyameama. Nāskakē xanīfo Pilato Jesús shinākī, ‘Nō reteimakai’ fafiaito, ‘Maa, nō sharafaima, ato retemafe,’ ixō Pilato mā yoiyamea, Jesús retenōfo.

14 Jesús ōiti sharayaxō afaa pishta chakafamisma, akka mā noikaspayamea. Nāskakē mā Pilato yoikī: ‘A chaka kāimayamafe,’ mā fayamea. Pilato Jesús kāimapaifiaino a yora chakakōi Barrabás kāimakaspakī. Askafaito mā iskafayamea: ‘Barrabás kāimafe, Jesúsroko ato retemafe,’ mā fayamea.

15 Akka nā Jesús taefakī yora onifani, iskaratīari noko īkinā, aōnoax nō nia. Nāskafekē mā reteyamea. Mā mā retefiano Apa Niospa afianā otofayamea. Nāskaito Juan feta nō ōiyamea. Mā anā otoyamea. Iskaratīa nia.

16 Nāskakē nā finimisma Jesús chanīmara faax mā fininākaḡana. Jesúsnoax mā shara. Nāskakē keyokōichi mā ōi.

17 “Nāskakē ē mato yoi, efe yora mīshtichi. Akka ēfi mē mato tāpimiskī. Akka mā tāpixoma mā Jesús reteyamea, ‘Niospa Fakemara,’ ixō. Askata mātō

xanĩfofofãferi tãpiyameafoma. Jesús nõko Ifokõi fi-ano tãpixoma reteyameafo.

<sup>18</sup> Nãskakẽ afetiama Niospa yoini a inõpokoai mã tãpixõ: ‘Èfe Fake Cristo retexikani,’ ixõ Niospa yoini. Nãnori yorafãfe kirika kenenifo, Niospa ato shinãmanaino. Nãskakẽ mã reteyameafo a Niosnoa ato yoimisfãfe nãnorikõiri yoinifo. Mã askakõia. Akka Niospa mã tãpiano, mã askakõifayamea.

<sup>19</sup> Nãskakẽ mãto chaka xatekãfe. Mã afara chakafamiskĩ anã anori shinãyamakãfe. Nãskakẽ Epa Nios fisti shinãkãfe, mãto chaka mato soax-onõ.

<sup>20</sup> Nãskaxõ nõko Ifãfe mãto õiti mato inima-masharakõinõ. Nãskakẽ mato ano Cristo Jesús Niospa anã nĩchixii, mãto Ifokõi mato nĩchioxii. Æfe Fake Cristo Jesús katonni mato ifimis inõ.

<sup>21</sup> Iskaratĩa Apa fe nai mẽra iyoa, oyoxoma na nãmã anoafõ keyokõi Niospa fena shara fayoi. Askata chipo nãmã Jesús anã fotoxii. Nãnori a Niosnoa yoimisfãfe yoiyopaonifo a inõpokoai yoi kakĩ, Niospa ato shinãmanaino.

<sup>22</sup> Moisésri nãnori yoikĩ kirika keneni iskafakĩ afia Nios fistichi shinãmanaino: ‘Nõko Ifo Niospa mato mẽra fisti nĩchixii mato Nios yoixomis inõ, ea ani keskafakĩ. Nãato mato yoiai anori nikasharakõikãfe.

<sup>23</sup> Akka a nikakaspaifo Niospa afe yorafo mẽra ato ifixiima. Ato makinoa ato potaxii anã ato fe inõfoma.’

<sup>24</sup> Na iskaratĩa nõ õiai yoikĩ Samuel taefakĩ yoini a inõpokoai yoikĩ. Nãnori fisti a Niosnoa yoimis fetsafãferi keyokõichi yoinifo Niospa ato shinãmanaino.

<sup>25</sup> Nāskax mā mǎto xinifǎfe āto fenakōifokī mā. Nāskakē Niospa mǎto xinifo iskakakī yoini: ‘Mǎto fenafoōxō ē ato sharafai keyokōi nǎ maniafo tii,’ ixō Niospa Abraham yoini.

<sup>26</sup> Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

## 4

### *Pedro yafi Juan xanīfofo ano yionifo*

<sup>1-2</sup> Pedro feta Juan Jesúsnoa yorafā rasi yoiiafono ōikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nǎfo atoki fekanax ōitifishkinifo, Pedro feta Juan mā Jesús naflax anā otoita ato faifono.

<sup>3</sup> Nāskakata yātapakē ato achixō karaxa mēra ato ikimanifo. Fakishchāi ishinifo a mēra.

<sup>4</sup> Ato ikimayofafomano a yora rasi ato yoiiafono nikakakī ato chanīmara fakōinifo. Afia penata cinco mil yora rasichi Jesús Ifofanifo.

<sup>5</sup> Pedro fe Juan karaxa mēra ikafono, Jerusalén anoax judeofǎfe xanīfofo fe a xanīfo fetsafori, askatari a Moisés yoikī kirika keneni keskara ato tāpimamisfori pena fetsa fakishpari ichanānifo.

<sup>6</sup> Nānōri a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifás ini, Juanri ini, Alejandrōri ini, a ato Nios yoixomisfǎfe āto kaifori ato fe inifo, ano fisti ichanākani.

<sup>7</sup> Nāskaxō Pedro yafi Juan kenanifo ato yōkakikakī. Tsōaōxō a finimisma sharafafomāki tāpipai kakī Pedro yafi Juan kenanifo karaxa

mēranoa. Mā feafono ato nakirafe nīchikaxō ato yōkanifo iskafakakī: “¿Tsōaōxō na finimisma mā sharafaitamē?” ato fanifo.

<sup>8</sup> Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofofāfe, efe anifofofāfe, ea nikakapo ē mato yoinō.

<sup>9</sup> ¿Tsōaōxō nō yora sharafatiromē mā tāpipaimē? Na mā tāpipaiyai finimisma tsōaōnoax sharamākī mā noko yōkaito ē mato yoinō. Ea nikakāfe.

<sup>10</sup> Tāpixikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi ōiaifo Jesús Nazarete anoato mā sharafaita. Nā mā ifi cruz ikaki mastaitato mā Apa otoaitano nāato mā sharafaa,” Pedro ato fani.

<sup>11</sup> “Aōnoa yoiyokī yōra kirika keneni iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano. Nāskakaxō chipo tāpinifo nā tokiri sharafinakōifiano.

Nāskarifikā nā Jesucristo tokiri keskarafiano mā potamis sharafinakōifiano. Mā mā potafiano Epa Niospa ifini aōnoax mā afe yorafo inō.

<sup>12</sup> Anā fato yora fetsakai nāmā ikama noko shara fatiro. Jesús fistichi nōko ōiti noko shara faxotiro nō afe nīpaxanō,” ixō Pedro ato yoini.

<sup>13</sup> Ato askafaito nikakani a xanīfofo āa ranā yoinānifo: “¿Afeskakī iskara yoimē kirika kenekī tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’ ” ikanax yoinānifo.

<sup>14</sup> Nāskaxō ōiaifono nā finimisma mā finiax ato fefotai kafāsaito ōinifo mā sharax. Nāskakē na rafeta



afaa chakafafoma ixõ atoõnoa afaa yoitiroma inifo nã finimisma mã shara õikakĩ.

<sup>15</sup> Nãskakaxõ Pedro yafi Juan nĩchinifo ato maki-noax fotanõfo. Pedro fe Juan mã kãifainaifono, nã xanĩfofo ãa ranã yoinãnifo iskakani:

<sup>16</sup> “¿Na rafe nõ afeska faimẽ? Akka keyokõi Jerusalén anoafãfe mã tãpiafo, na feronãfake rafeta finimisma sharafaito õitaxakakĩ. Fato feronãfake fẽtsakai iskara finimisma sharafatiroma. Iskarakai nõ fomãtiroma.

<sup>17</sup> Akka iskaratĩa nõ ato yoinõ anã Jesúsnoax mekanõfoma. Nõ ato yoinõ iskafakĩ: ‘Mã anã Jesúsnoa yoiaito nõ nikakĩ nõ mato omiskõimani,’” ikanax ãa ranã yoinãnifo.

<sup>18</sup> Askaxõ ato kenanifo pexe emãitinoa. Ato kenakaxõ ato yoinifo: “Anã mã Jesúsnoa afaa yoikĩ.”

<sup>19</sup> Ato askafaifãfe nikakĩ Pedro feta Juan ato ke-manı iskafakakĩ: “¿Akka nõ tsoa nikaimẽ? Mato nõ nikasharairaka, askayamakĩ Nios nõ nikairaka. Mã shinãkãfe fato sharamãkĩ.

<sup>20</sup> Nã nõ Jesús õifafaina keskafakĩ, nã noko Jesús yoiaito nõ nikafafaina keskafakĩ nõ yoipaketiro enetama,” ixõ Pedro feta Juan ato yoini.

<sup>21</sup> Ato askafaifono ato yoinifo iskafakakĩ: “Mã anã Jesúsnoa yoiaito nikaxõ nõ mato omiskõimani,” ato fanifo xanĩfo tiito. Ato askafakaxõ ato nĩchinifo yora fetsafãfemãı ato õiaifono. A xanĩfo tiito ato koshapaifikakĩ ato koshanifoma yorafoki mesekakĩ. Akka a yorafãfe, “Epa Nios sharakõira,” fanifo Pedro feta Juanmãı Niosxõ ato sharafaino.

<sup>22</sup> A finimisma nãskara kãini ini mã cuarenta xinia akano Pedro feta Juan sharafanifo Niospa Yõshi Sharaõxõ.

*Jesús Ifofaafāfe Nios kīfinifo mitsisipakōi ixikakī*

<sup>23</sup> Nāskata a xanīfofofāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anifofofāfe ato yoiāfo keskara.

<sup>24</sup> Ato askafakī yoiāifono nikakaxō a Jesús Ifofamisfāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi onifani. Nai yafi mai mī onifani. Fākafāri mī onifani. Nai mēranoari mī onifani. Nāmānoafori mī onifani, fākafā mēranoafori mī onifani, afama mīshtifo.

<sup>25-26</sup> Akka nā mia yonoxomis nōko xini David mī Yōshi Sharapa mī shināmani mīōxō ato yoini iskafakī:

¿Afeskai na yorafo Nioski ōitifishkikanimē? Keyokōichi yorafāfe āa shinākani Nios potapaikakī. Askafikaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko nīchixoxiai Cristori noikaspaxikani. Āa askara shinākakī, ixō David kirika keneni mīōxō yoikōikī.

<sup>27</sup> “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitāfo mī Fake Cristo Sharafinakōia ifixō mī nīchifinino chakafakani.

<sup>28</sup> Nā mī yoiyoni keskafakī mā nāskakōi faitafo a inōpokoai mī yoini keskafakī.

<sup>29</sup> Epa Niosi, noko nikāfe mīōxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mī meka shara nō ato ranotamakōi yoinō mitsisipakōi noko imafe.

<sup>30</sup> Epa Niosi, mĩ sharaõxõ a isinĩ ikaifo ato sharafafe, afama mĩshtifo ato õimayanã a mia yonoxomis Jesucristo aneõxõ,” ixõ Epa Nios kĩfinifo.

<sup>31</sup> Mã askafakakĩ kĩfikĩ xateaifono nã ichanãfo anoax mai naya naya ini. Nãskaino Niospa Yõshi Shara ãto mẽra naneaino ranotamakõi Niospa meka shara yoinifo.

### *Nã afarafo keyokõi atonã ini*

<sup>32</sup> Jesús Ifofaafãfe nãnorĩ fistis shinãnifo ãto õitinĩ. Nãskakanax na afarafo nõkonã fistis ixõ tsõa shinãnima. Askakimaroko keyokõi atonã ini.

<sup>33</sup> A Jesúsnoa yoimisfãfe, “Nõko Ifo Jesús noko nãxofiax mã anã otoni,” ixõ ato yoinifo Niospa Yõshi Sharapa ato shinãmanaino. Nãskakẽ keyokõi nã chanĩmara faafo Epa Niospa ato shinãmasharaino inimakõinifo.

<sup>34-35</sup> A Jesús Ifofaafãfe atirito ãto tarefoya ãto pexefo ato minikaxõ kori fikaxõ nã Jesúsnoa yoimisfo ato inãnifo afãferi a afaamaisfo ato inãnõfo tsõa afaa yopayamanõ.

<sup>36</sup> Akka José Leví ãfe fena ini. Chipre anoax fakea ini. Nãskakẽ a Jesúsnoa yoimisfãfe ãa anenifo iskafakakĩ: “Yora Inimamamis” fanifo. Akka ãfe ane kaiyakõi Bernabé ini.

<sup>37</sup> Nã feronãfake tareya ini. Nãato ãfe tare ato minixõ kori fixõ a Jesúsnoa ato yoimisfo inãni a afaamaisfo ato inãnõfo.

## 5

### *Ãfe ãfi feta Ananías ato feparapaini*

<sup>1</sup> Akka feronāfake fetsa āfe ane Ananías ini. Āfe āfinī ane Safira ini. Nāato āfe tare ato minini kori fixii.

<sup>2</sup> Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimisfo inānifo keyokōi mā noko ināfo ixō shinānōfo.

<sup>3</sup> Nāskaito Pedro yoini iskafakī: “Ananías, ¿afeskai mī mēra Satanás naneamē mī Niospa Yōshi Shara feparapainō ranāri mā mī kori fifiaxō mī tareōxō?”

<sup>4</sup> Akka, ¿taeyoi mī tare iyoamamē? Akka mā mī ato minia, akka, ¿na kori mīnāmamē? Nāskakē nā mī apaiyai keskafatiro. Akka atiri mekepaikī mī noko yoia shara ikerana. Askatamaroko mī noko fomāpai. Mīkai noko pāraima, akka Nios mī pārapai,” ixō Pedro yoini.

<sup>5</sup> Askafaifāfe nikai Ananías koshikōi nani. Askaito nikakani yorafā rasi ratei fetsenifo.

<sup>6</sup> Nāskakē naetapafo fēkaxō Ananías rakonifo mā nakē. Nāskafakāta maifaifokakī iyonifo.

<sup>7</sup> Mā askai samarakano āfe āfiri ikitoshini, afaa tãpiamax.

<sup>8</sup> Nokotoshiaito Pedro yōkani iskafakī: “Ea yoipo mā tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito,

<sup>9</sup> Pedro yoikī iskafani: “¿Afeskakī mī fene feta mā shināxō nōko Ifāfe āfe Yōshi Shara mā feparapaimē? Mā mī fene nakē maifatakani a pexe kachiori fekani. Ōipo, iskaratīari mia iyoi fokani,” ixō Pedro yoini.

<sup>10</sup> Askafaito nikai Safira koshikōi nātani. Pedro nia nāmā pakeni. Naetapa tiito mā fene

maifatakani ikiferakakĩ òiafo mã ãfe ãfiri naa fichi-toshinifo. Ari ififainifo maifaifokakĩ, fene ketaxamei.

<sup>11</sup> Askaito nikakani a Jesús Ifofamisfo ratenifo. Yora fetsafori askanifo nikakani akairi ratei fet-senifo.

### *Iskarafokai tsõa õiyomisma inifo*

<sup>12</sup> Tsõa atiroma keskakakĩ nã Jesúsnoa yoimisfoõxõ afama mĩshtifo fanifo yorafãfe õinõfo. Nãskakanax keyokõi ichanãnifo pexe kene ãfe ane Salomón anoax.

<sup>13</sup> Atiri a Nios Ifofaafoma a Nios Ifofaafo fe ato fe rafenifoma. Akka ato askafafiaifono yorafãfe, “Na Nios Ifofaafo isharakõiafo,” ato fanifo.

<sup>14</sup> Ato askaifaifono yorafãfe nõko Ifo nikakõinifo, feronãfakefo feta kērofãfe. Nãskax ichapakõi inifo.

<sup>15</sup> Nãskakata a isinĩ ikaifo xafakĩa ato kãimanifo ãto rakatiki ato ratakaxõ fãi kesemẽ, “Pedro ãfe yõra ato fakish faafofãnaino sharatirofora,” ikaxõ.

<sup>16</sup> Nãskakata a chaima ikafori yora kaya Jerusalén ano fonifo. A isinĩ ikaifo ato efeyanã a niafaka chakata ato mēra nanexõ ato fekaxtefaifori ato efenifo. Nãfo a Jesúsnoa ato yoimisfãfe ato sharafapanifo.

### *A Jesúsnoa ato yoimisfo ato omiskõimakõinifo*

<sup>17</sup> A Nios ato kĩfixomis xanĩfo fe saduceofo afe ikanax õitifishkinifo, afeskakĩ noko nikakanimamẽ ikanax.

<sup>18</sup> Nãskakaxõ a Jesúsnoa ato yoimisfo ato achikaxõ karaxa mēra ato ikimanifo.

<sup>19</sup> Akka Niospa ãfe ãjiri fakishi oxõ karaxa ãfe fepoti fepexõ ato kãimani iskafakĩ ato yoiyanã:

20 “Nonoax kãifaikaxõ a Nios kĩfiti pexefã mëraxõ ato yoitakãfe afeskaxõ nõko Ifo Jesús ato ìkitiromãkĩ,” ato fani.

21 Nã ãjirinĩ ato yoiaito nikafo keskakani penakaiama Nios kĩfiti pexefã mëra ikifainifo, anoxõ ato yoixikakĩ.

Nãskaifono a ato Nios kĩfixomis xanĩfãfe, a afe ikafoya israeli xanĩfofo ato kenani, ano fistiax ichanãi fenõfo xanĩfo finakõia anoax, anoxõ a Jesúsnoa yoimisfo ato ifitanõfo ato fe ichanãi fenõfo.

22 Mã ato nĩchiafono a ato kexemisfo fokaxõ õiafo a karaxa mëra tsoa inima. Nãskakë anã ato yoifekani fenifo.

23 Iskafakĩ ato yoinifo: “Kaxõ nõ õia karaxa fetaoxikõina nõ fichitoshia, sorarofãfe kexekõiafono kãiti ano. Akka a mëra ikikaixõ nõ õia ano tsoa ikama,” ato faifono,

24 nikakani a Nios kĩfiti pexefã kexemisfãfe a ato xanĩfofo fe, a ato Nios kĩfixomisfo xanĩfokõifo ãa ranã yoinãnifo: “¡Aira! ¿Afeska tsekeafomë?” ikanax ratenifo.

25 Askaifono feronãfake fetsa atoki oxõ ato yoini iskafakĩ: “Nikakapo a mã ato karaxa mëra iki-manita feronãfake rafeta, a Nios kĩfiti pexefã mëraxõ mã ato yoikani,” ato faino,

26 a ato kexemisfãfe ãto xanĩfo ãfe inafõ fe kani ato ifikai. Akka mã fokaxõ ato efenifo. Nãskaxõ ato afeska fanifoma yorafoki mesekakĩ tokirinĩ noko tsakatirofora ikaxõ.

27 Mã fokaxõ ato iyonifo a xanĩfo finakõia ano. Nãnoxõ a ato Nios kĩfixomis xanĩfãfe ato yoini iskafakĩ:

28 “Mā nō mato yoita, ‘Anā ato Jesúsnoa yoiya-makāfe,’ nō mato feita, akka, ¿afeskakī Jesúsnoa mā ato yoirifaimē? Jerusalén anoafō mā ato yoiki mā mā ato tāpimakōia. Nāskaxō mā noko pārāpai nafāfe Jesús reteitafora mā noko fapai, noko chakafapaikī.”

29 Ato askafaifono Pedro a afe rafeafo feta ato kemani: “Akka nōfi Nios nikaikai. Yorafokai nō nikapaima.

30 Nōko xinifāfe āto Niospa Jesús otoaita, mā mā retelitano ifi cruz ikaki mastaxō.

31 Nāskaxō Niospa Jesús a keskara xanīfofinakōi imani yorafo ato ifixō ato ĩkikōipakexanō. Nāskakē israelifāfe keyokōichi Nios chanīmara fanōfo, a afara chakafamisfono āto chaka ato soaxonō.

32 Chanīma mā nō ōimis, askatari Niospa Yōshi Sharapa mā tāpia. Akka a nikaifo Niospa āfe Yōshi Shara ato mēra nanea,” Pedro ato fani.

33 Ato askafaito nikakakī akiki ōitifishkiyanā ato retepainifo.

34 Akka nā xanīfofo fe fariseo āfe ane Gamaliel ato fe ini. Nāato a Moisés yoikī kirika keneni keskara ato tāpimamis ini. Yorafāfe aōnoa yoisharakōimisfo. Nāato niinākafā ato yoini iskafakī: “Xafakīa ato kāimayokāfe,” ato fani.

35 Nāskaxō ato kāimaxō a xanīfo fetsafo yoini: “Efe yorafāfe israelifāfe, ea nikakapo ē mato yoinō. Māfi na feronāfake rafe retepaikāi, ¿afeskaito mā ato retepaimē? Shināsharakāfe. Ato retepaikakīma,” ato fani.

36 Nāskata anā ato yoini: “Shinākapo, oa feronāfake Teudas xanīfo iyoni. Xanīfo finakōia ipaiyaito cuatro cientos yorafāfe chīfafainifo. Akka

nã mã yora fetsafãfe retenifo. Mã reteafono ãfe inafopaxkanãi fetsenifo. Nãskakanax ariax keyonifo.

<sup>37</sup> Askatari chipo ãto anefo kenekakĩ censo akai-fono, Judas fetsa. Galilea anoa ini. Xanĩfo ipaikĩ ato yoini yorafãfe chĩfafãinõfo. Askafafiaino nãri retenifo. Nãskakẽ ãfe inaforti paxkanãi fetsenifo.

<sup>38</sup> Nãskakẽ ẽ mato yoi na feronãfake rafe ato enekãfe ato afeska fakakĩma. Akka a Niospa shinãi anori ato yoyimakakĩ, ãa ato yoikakĩ kaxpa ato yoitirofo. Nãskakanax keyotirofo.

<sup>39</sup> Akka Nios ato fe ikano mã ato afeska fatiroma. Mãroko kexemesharakãfe ato chakafayanã Niosri mã chakafatiroki,” ixõ Gamaliel ato yoiaito nikanifo.

<sup>40</sup> Ato askafaito nikakakĩ, a Jesúsnoa yoimisfo ato kenakaxõ ato koshakata, “Anã Jesúsxõ mã afaa yoiki,” ato fakaxõ ato nĩchinifo.

<sup>41</sup> Nãskakẽ a Niosnoa yoimisfo xanĩfofo anoax tsekekani inimakõinifo, Niosnoaxmãi omiskõikanax Jesúsnoa meka shara ato yoikani.

<sup>42</sup> Nãskakẽ pena tii nõko Ifo Cristo Jesúsnoa meka shara ato yoinifo. A Nios kĩfiti pexefã anoxõ ato yoita pexefo anoxori ato yoifofãsafanifo.

## 6

*Jesúsxõ tãpimisfãfe docefãfe feronãfake fetsafo si-ete ato ifinifo ato feta yononõfo*

<sup>1</sup> Nãskaifono a Jesús Ifofaifo ichapakõi inifo. Akka fetsafo a griego mekapa ikaifãfe, hebreofo ato mekafakakĩ taefanifo ato iskafakakĩ: “¿Afeskakĩ nõko kaifo a fenemaisfo a piaifo mã ato inãsharaimamẽ? Akka mãto kaifo fisti mã ato inãi,” ikaxõ ato mekafanifo.



<sup>2</sup> Ato askafaifāfe nikakata a Jesúsxō yoimisfāfe nā docefāfe a Jesús Ifofamisfo ato ichanāfakaxō ato yoinifo iskafakakī: “Nō mato Niospa meka yoikī nō xatetiroma a ma piai mato paxkaxoxiki. Akka pena tii nō mato Niospa meka yoifafāini,” ato fanifo.

<sup>3</sup> “Efe yora mīshtichi, feronāfakefo siete fenakāfe a mā piai mato ināsharanōfo. Mā mā tāpiakī fato-fomākī Niospa Yōshi Shara fe rafeafo. Nāfo nō ato yonomanō a mā piai mato ināsharanōfo.

<sup>4</sup> Akka nō pena tii Epa Nios kīfifafāinikai, āfe meka sharari yoianā,” ixō ato yoinifo.

<sup>5</sup> Ato askafaifono nikakani keyokōi inimanifo. Nāskakata Esteban ifinifo, nāato Nios chanīmara fakōina ini, āfe Yōshi Shara a mēra naneano. Feliperi ifinifo, Prócorori ifinifo, Nicanori ifinifo, Timónri ifinifo, Parmenasri ifinifo, Nicolásri ifinifo. Nā Nicolás Antioquía anoa ini. Judeofāfe Nios Ifofaifo keskafakī Nicolás Nios shināmis ini.

<sup>6</sup> Ato askafakāta a ato Jesúsnoa yoimisfo ano ato iyonifo. Anoxō ato Nios kīfixoyanā ato māmānifo.

<sup>7</sup> A Jesúsxō yoimisfāfe Niospa meka ato yoiaifono atoōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

### *Esteban achinifo*

<sup>8</sup> Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīshtifofakī ato ōimani.

<sup>9</sup> Akka judeofo fetsafo nā ichanāti pexe mēranoax ichanāpaonifo. Nā ichanāti pexe anenifo: “Anā Ato Inafoma,” fakakī. Nāfo Cirene anoafo

ikaino Alejandría anoafo ikaino Cilicia anoafo ikaino fetsafori Asia anoafori nãfo ichanãkanax Esteban fe feratenãnifo.

<sup>10</sup> Meka finõmapaifiaifono Niospa ãfe Yõshi Sharapa Esteban ãfe õiti mēra shinãmani. Shinãsharakõita ato yoini. Ato askafaito tsõa Esteban kemanima.

<sup>11</sup> Ato askafaito nikakakĩ akiki õitifishkiyanã yora fetsafo ato kori inãnifo ato iskafayanã: “Nõ mato kori inãnõ Esteban mã pāratakãfe iskafakĩ: ‘Na Esteban Moisés yoini keskara chakafaito nõ nika, Niosri chakafayanã,’ ixõ ato yoitakãfe,” ato fanifo.

<sup>12</sup> Mã fokaxõ ato yoikĩ askafaifono, yorafo õitifishkikani mekaĩ fetsenifo, a judeofãfe ãto xanĩfo fe a Moisés yoikĩ kirika keneni keskara ato tãpimamisfori askanifo. Nãskakaxõ Esteban achikaxõ xanĩfokõi ano iyonifo.

<sup>13</sup> Mã iyokaxõ ãa pãranifo ãa chanĩ fetsekakĩ iskafakakĩ: “Na feronãfãke nõko Nios kĩfiti pexefã mēxotaima chakafai, askatari a Moisés yoini keskara chakafai.

<sup>14</sup> Nãskatari, ‘Nã Jesús Nazarete anoato nã Nios kĩfiti pexefã pãoxii kiki,’ ikaito nõ nikamis. Nãskatari, ‘A Moisés yoini keskara ã fetsafaxii,’ ikaito nõ nikamis,” fanifo ãa pãrakakĩ.

<sup>15</sup> Askafaifono xanĩfofo feta a ano tsaofãfe õiafo Esteban ãfe femãnã nã ãjirinĩ femãnã keskarakõi õinifo.

## 7

### *Esteban ato kemasharakõini*

<sup>1</sup> A judeofo Nios kĩfixomis xanĩfo finakõiato Esteban yõkani: “¿Chanĩmamakĩ a mĩõnoa yoiaifo keskara?”

<sup>2</sup> Askafaito nikakĩ Esteban kemani iskafakĩ: “Efe yora mĩshtichi, ea nikakapo. Nõko Nios fãsi sharakõixõ afetĩama nõko xini Abraham yoini, Mesopotamia ano iyoano, Harán mai ano kayoamano.

<sup>3</sup> Iskafakĩ yoini: ‘Na mai anoax tsekekaini katãfe, mefe yorafoya ato õifaini. Nã mĩ kai ano ẽ mia ispaikai,’ ixõ Niospa Abraham yoini.

<sup>4</sup> Nãskakẽ Abraham Caldea anoax tsekekaini kanĩ, Harán ano ikikai. Mã anoax ãfe apa naano Niospa Abraham efeni na mai ano, na iskaratĩa nõ ika ano.

<sup>5</sup> Akka Niospa afaa pishta inãyonima. Mairi fena inãnima. Akka iskafakĩ yoini: ‘Ë mia na mai inãxii,’ ixõ yoiyoni. ‘Akka mã mĩ nanino mĩ fenafo ẽ ato inãxii,’ ixõ Niospa Abraham yoiyoni ãfe ãfi feta fake akamano.

<sup>6</sup> Askata Niospa anã yoini iskafakĩ: ‘Mĩ fenafo yora fetsa keskarakanax mai fetsa ano iyonõfo. Nãnoax ãto yonomati keskarakanax omiskõikõiyonõfo cuatrocientos xinia akani.’

<sup>7</sup> Nãskata anã yoini iskafakĩ: ‘Ë na yorafo omiskõimani, nã ato yonomakĩ omiskõimanaifo. Ë ato askafaino anoax mĩ fenafo tsekefaixikani. Mã anoax fokaxõ nã Canaán mai anoxõ ea nikasharakõixikani,’ ixõ Epa Niospa Abraham yoini.

<sup>8</sup> Niospa afetĩama Abraham yoini: ‘Mĩ fake feronãfake mĩ foshki repa xatetiro,’ ixõ yoiyoni. Nãskakẽ Abraham ãfe fake Isaaca mã ocho nia ikano foshki repa xateni. Nãskarifikĩ Isaaca ãfe fake Jacobori askafani. Nãskarifikĩ Jacobo ãfe fakefo ato foshki repa xatepakeni.

<sup>9</sup> “Jacobõ ãfe fakefo nõko xinifo ipaonifo, nããfe

ãto exto José õikaspapaonifo. Nãskakaxõ Egipto anoax foaifono yora fetsafo ato inãnifo aõxõ kori fixikakĩ nãfãfe Egipto ari iyotanõfo. Askafafiai-fono Epa Niospa José potanima.

<sup>10</sup> José omiskõiaito Epa Niospa ifini. Nãskaxõ shinãsharamani. Nãskakẽ Egipto anoxõ ato xanĩfokõichi José noisharakõini. Nãskaxõ xanĩfãfe José xanĩfo imani, Egipto anoxõ ãfe pexe anoax xanĩfokõi inõ.

<sup>11</sup> “Nãskakẽ Ejipto anoafõ fe Canaán anoax fonãiki finakõinifo omiskõiyana. Nãskakẽ nõko xinifãfe afaa pinifoma.

<sup>12</sup> Akka Jacobo nikani Egipto ano a piaifo ichapakẽ. Nãskakẽ nãri ãfe fakefo nĩchini a piaifo fitanõfo, nã nõko xinifo. Ari fokatsaxakakĩma foitaenifo.

<sup>13</sup> Nãskakata afianã fonifo. Mã anã foafono José ãfe ochifo tãpimani. Nãskakẽ nã xanĩfo Faraón tãpini José ãfe kaifo.

<sup>14</sup> Nãskata chipo José apa kenamani Egipto ano onõ ãfe fakefo fe. Nã yorafo setenta y cinco inifo Egipto ano ikifeaifo.

<sup>15</sup> Nãskakẽ Jacobo kani Egipto ano ikikai. Nãnoax Jacobo nani, nãnoaxri nõko xinifori nãpanifo.

<sup>16</sup> Nãskakẽ Jacobo ãfe xafo Siquem ano fonifo maifaifokakĩ. Nã mai nõko xini Abraham afetĩama fini, feronãfake ãfe ane Hamor minini. Nã mai kini mēra nõko xinifo maifanifo.

<sup>17</sup> “Akka mã anoax chaima tsekeaifono nã Epa Niospa Abraham yoiyoni keskai, mã Egipto anoax kaikanax fakefo ichapakõi kainifo.

<sup>18</sup> Nãskatari Egipto anoax nã xanĩfo fetsa finakõiato José õimisma ini.

19 Nā xanĩfāfe nōko kaifofo ato pārapaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo.

20 Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharpaoni. Tres oxe anifo kexekakĩ.

21 Mā tres oxe akano apa feta āfa fētamā fepoxō faka ketokonō ratanifo. Nānoa Faraón fake xomay-ato fichixō ifini āfe fake keskarakōi inō.

22 Nāskakē Moisés nā Egipto anoxō tāpiafo keskarari tāpikōini. Mā yosixō yoikĩ tāpisharakōia ini a xanĩfāfe yoitiro keskafakĩ.

23 “Mā cuarenta xinia axō Moisés āfe kaifo israelifo ōikai kani.

24 Akka mā kaxō ōia Egipto anoato āfe kaifo koshaito ōini. Askafaito ōikĩ timamapaikĩ, Moisés Egipto anoa feronāfake koshakĩ reteni.

25 Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima.

26 Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakĩ: ‘Nā yora fistifiax ¿afeskai mā setenāimē?’

27 Ato askafaino a fētsa seteai Moiséski ōiti fishkiyanā yoini iskafakĩ: ‘¿Tsōa mia xanĩfo imamē mĩ noko ĩkinō?’

28 ¿Akka mĩ ea retepaimē nā Egipto anoa mĩ retelaiyamea keskafakĩ?’ ixō yoini akiki ōiti fishkiyanā.

29 Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax

ãfiyaxõ fake feronãfake rafe ani.

<sup>30</sup> “Nãrixõ Moisés mã cuarenta xinia akano, tsõa istoma machi Sinai chaima akiki ãjiri nokoni, oa fanafo kooai keskara mẽranoax.

<sup>31</sup> Askaito nikai Moisés rateyanã namakẽ õia fani. Nãskakẽ akiki chaimashta kaxõ õipaikĩ nika a mẽranoax Nios mekaito nikani iskafakĩ yoiaito,

<sup>32</sup> ‘Ëfi mĩ xinifãfe ato Nioski. Abraham ikaino Isaaca ikaino Jacobo ikaino ãfi ãto Nioskõikĩ,’ ixõ Niospa yoiaito nikai Moisés rateyanã choani. Nãskakẽ anã ari naisnima.

<sup>33</sup> Nãskaito Epa Niospa yoini iskafakĩ: ‘Mĩ zapato pekafe, nã mĩ nia ano sharakõikĩ.

<sup>34</sup> Efe yorafo mẽ õia omiskõiaifãfe Egipto anoax. Mẽ ato nika tetsosikaifãfe. Nãskax ã fotoa ato ifiyoi. Nãskakẽ iskaratĩa Egipto ano ã mia nĩchi,’ Niospa Moisés fani.

<sup>35</sup> “Ãfe kaifãfe noikaspakakĩ iskafafianifono: ‘¿Tsõa mia yoiamẽ mĩ nõko xanĩfo inõ noko ãkixikĩ?’ ixõ yoifinifono. Akka Epa Niospa xanĩfo imaxõ nĩchini ãfe kaifo ifitanõ, ãfe ãjiriõxõ.

<sup>36</sup> Mã Moisés kaxõ Egipto anoa nõko xinifo ifini. Mã ato ifitani oxõ Moisés afama mĩshti fani tsõa atiroma keskara fakĩ. Nã mai anoxõ cuarenta xinia ani. Nã ãmamãfãnẽ ãfe ane Õshi anoax tsõa istoma ipaonifo.

<sup>37</sup> Moisés ãfe kaifo israelifo yoikĩ iskafani: ‘Niospa fatora fetsa ea keskara mato ano nĩchixii kiki. Nikasharakãfe,’ ato fani.

<sup>38</sup> Nã Moisés judeofo fe tsõa istoma ano ipaoni. Nãnoax ãjiri fe mekani machi Sinai anoax, nã ãjirinĩ yoia keskafakĩ nõko xinifo yoini. Nã Moisés a noko ãkipakexatiro Niospa meka shara fini, nã meka

sharapa noko ĩkipakexatiro ixõ ato yoini.

<sup>39</sup> “Akka nõko xinifãfe nikakaspayanã chakafanifo. Nãskakanax afianã Egipto ano fepainifo.

<sup>40</sup> Nãskakaxõ Aarón yoinifo iskafakakĩ: ‘Noko nios faxõfe noko ĩkinõ. Fakira Moisés kaaki nõ tãpiamaki, Egipto anoa noko efefiitaxakĩ.’

<sup>41</sup> Nãskafaifãfe Aarón ato fakka fake keskara oro ato onifaxoni. Mã ato onifaxõano yoinã retexõ inãyanã akiki inimayanã fista axonifo. ‘Aicho, nõko nios fasi sharakõ,’ fanifo ãa onifakaxõ.

<sup>42</sup> Nãskakẽ Nios ato makinoax paxkani iskafakĩ ato yoiyanã: ‘Na fishifo nai mẽranoafo nõko niosra mã fatiro,’ ato fani. Akka nã Niosnoa yoimisfãfe, nãnorikõĩ kirikaki kenenifo iskafakĩ:

Israelifãfe tsõa istomaxõ mã mã cuarenta xinia afixõ mãkai yoinã retexõ mã ea inãpaonima,

<sup>43</sup> Askatamaroko mãa mã afara fetsa onifaxõ, ‘Nã nõko niosra,’ ixõ Moloc mã iyafofãsafamis. Askata mãto nios Refán ãfe fishifori mã noimis. Na nõko niosra ixõ mã afara onifanixakĩ, akiki mã inima kakãini. Nãskakẽ ã mãto na tsõa istoma anoa ã mato chai nĩchi, Babilonia finõfãĩ, Niospa ato fani.

<sup>44</sup> “Nãskakẽ nõko xinifãfe tsõa istomaxõ nã Moisés Niospa yoini keskafakĩ pexe fakanax ipaonifo. Nã Niospa Moisés yoini iskafakĩ: ‘Karpa pexe fafe nã ã mia õimana keskara fakĩ,’ ixõ yoini.

<sup>45</sup> Nãskakẽ mã xini ichapa finõta nõko xinifãfe nã karpa pexe finifo. Akka mã Josué xanĩfoxõ ato iyoni yora fetsafo potaxõ ato mai fĩaifonõfo. Niospa ato axõfaino ato mai fĩanifo. Mã askapakeafono Davidri chipo xanĩfoni.

<sup>46</sup> Xanĩfo Davidki Nios fãsi inimakõini. Nãskakẽ David Nios yoini iskafakĩ: ‘Epa Niosi, ẽ pexe efapa shara mia faxopai ano Jacobo ãfe fenafo inõ,’ ixõ yoini.

<sup>47</sup> Askafakĩ yoifixõ axonima, ãfe fake Salomón Epa Nios pexe faxoni.

<sup>48</sup> Akka yorafãfe pexe faxõfiafono nã Nios finakõia a pexe mẽra itiroma. Niospa keyokõi ìkinã ixõ a Niosnoa yoimisto kirika keneni iskafakĩ:

<sup>49</sup> Ẽ nai mẽra ika. Nãrixõ na mai anoafõ ẽ onifani tii keyokõi ẽ ìkinã. Akka, ¿afeskakĩ mã ea pexe faxotiomẽ a fisti mẽra ẽ inõ faki kafã saxikima?

<sup>50</sup> Akka, ¿ẽ afama mĩshti onifanimamẽ? ixõ Niospa ato yoini.

<sup>51</sup> “Akka mãfi mãto xinifo keskarakĩ. Mã nikayospakõifo Epa Niospa meka mã nikakaspakõimis, chanĩmarakai mã famisma. Niospa Yõshi Sharapa mato yoimis mã nikakõimisma.

<sup>52</sup> Nãskaxõ mãto xinifãfe a Niospa meka ato yoimisfo ato omiskõimapaonifo. Nãfãferi retenifo, ‘A sharafinakõia nokoki fotoxii kiki,’ ixõ aõnoa yoinifo. Akka nã sharafinakõia mã nokoki oano, mã achixõ ato retemayamea.

<sup>53</sup> Niospa ãjirifoõxõ Moisés Niospa meka shara mato yoifimisno mã nikakaspamis,” ixõ Esteban ato yoini.

### *Esteban retenifo*

<sup>54</sup> Esteban ato yoikĩ askafaito nikakani judeofãfe Esteban noikaspakani, akiki õitifishikĩ finakõinifo.

<sup>55</sup> Askafiaifono Esteban shinãchakanima mãmã Niospa ãfe Yõshi Shara ãfe õiti mẽra naneano.



Askata nai ari foisnĩfofãkĩ òia Niospa ãfe shara chaxasharakòiaito òini, Jesús Apa fe ketaxamei nikẽ.

<sup>56</sup> Nãskaxõ ato yoini iskafakĩ: “¡Õikapo! Mã nai fepekemea ã òikai Jesucristo Apa ketaxamei niakĩ,” ixõ Esteban ato yoini.

<sup>57</sup> Ato askafaito nikakaspakõikakĩ fãsikõi fiisiyanã paopomenifo. Nãskakaxõ noikaspayanã akiki fareke ferakaxõ,

<sup>58</sup> mã achikaxõ pexe rasi pasotai iyokaxõ nã Esteban yõaitafãfe feronãfake naetapa ãfe ane Saulo rapati inãnifo ato kexexonõ. Nãskakaxõ chipo Esteban tokirinĩ tsakaketsanifo.

<sup>59</sup> Nãskafakĩ tokirinĩ tsakaketsaifono Esteban Epa Nios kĩfini iskafakĩ: “Ifo Jesús, ãfe fẽro mẽsho ifife,” ixõ yoini.

<sup>60</sup> Nãskata ratokonõ mai chachipakefofã, fãsikõi fiisini. Iskafakĩ yoini: “Ifo, ea chakafakani kiki ato raefãfe,” ixõ yoiax nani.

## 8

### *A Jesús Ifofafo Saulo ato omiskõimani*

<sup>1</sup> Mã Esteban reteafono Saulo inimayanã: “Mã mã akakõikĩ,” ato fani. Nãskata afia penata nã Jesús Ifofamisfo ato omiskõimakĩ finakõinifo Jerusalén anoxõ. Akka Jesúsxõ tãpimisfo ichonifoma, Jerusalén ano nẽtenifo. Akka nã ato omiskõimanaifo ichokanax paxkanãi fetsenifo. Ranãri Judea mai ari foaifono, ranãri Samãria ari fonifo.

<sup>2</sup> Atiri yorafãfe a Nios Ifofamisfãfe Esteban maifakani oiai finakõinifo aõ noikani.

3 Akka nã Saulo Jesús Ifofamisfo ato omiskõimani pexefo tii mēra ikikafākakāini ato achixõ karaxa mēra ato ikimaxiki, kērofoya feronāfakefo.

*Niospa meka sharaõnoa Samāria anoa ato yoinifo*

4 Akka nã Jerusalén anoax ichoafāfe Jesucristoõnoa meka shara ato yoifofāsafanifo nã foaifo arixõ.

5 Felipe pexe rasi Samāria ano kani, anoxõ Cristoõnoa ato yoikai.

6 Ato yoiato nikakani yorafo ichanākaxõ Felipe nikakõinifo. Askatari Niospa Yõshi Sharaõxõ tsõa atiroma keskakakĩ Felipe afama mīshtifo faito õinifo.

7 Askata a niafaka chakafo ato mēra nanea ato makinoa potapakeni. Nāskakē niafaka chakafo ato makinoax tsekei fiisiki fetsenifo. Askatari a finimisfoma sharafata chātofori sharafani.

8 Askafaito õikani a pexe rasi anoafu Felipeki inimakõinifo, ato sharafapaito õikani.

9 Akka nã Samāria mai anoa feronāfake āfe ane Simón ini. Taeyoi yõfe iyopaoni, nāato Samāria anoafu ato pārapaoni: “Ē feronāfake shara-finakõiara,” ixõ.

10 Keyokõichi fakefofaxõ anifofofāfe nikakõisharanifo iskakakĩ yoiyanā: “A nã yoimisfo a nato Niosxõ afama mīshtifo fai kiki,” ixõ yoinifo.

11 Nāskakē akiki inimakakĩ nikakõipaonifo āfe yõfeõxomāi mā ato pārapakemiskē.

12 Akka askafiaifono Felipe Nios xanĩfoõnoa yafi Jesucristoõnoa meka shara ato yoiato nikakakĩ

chanĩmara fakõinifo. Nãskakẽ chanĩmara faifãfe Felipe faka mẽra ato ikimapakeni maotisafakĩ ãto chaka xatenõfo. Feronãfakefoya kẽrofoya ato faka mẽra ikimapakeni.

<sup>13</sup> Askatari a Simón yõfe ifiakatsaxakĩ atori Jesús chanĩmara faxõ Ifofani. Askafaito õikĩ aari Felipe maotisafani. Nãskax nã Simón Felipe afe kapaoni. Akka Felipe tsõa atiroma keskafakĩ Niosxõ afarafo sharafaito õikĩ yoini iskafakĩ: “Aira. ¿Afeskaxõ iskafaimẽ?” ixõ Simón yoini.

<sup>14</sup> Nãskaifono a Jesús fe rafemisfãfe Jerusalén anoxõ nikanifo Samãria anoxõ yorafãfe Niosnoa meka shara chanĩmara faifãfe. Nãskakẽ Pedro yafi Juan nĩchinifo, Samãria ari fotanõfo.

<sup>15</sup> Mã Samãria ano nokokaxõ a Nios Ifofaafo ato Nios kĩfixonifo Niospa Yõshi Shara ato mẽra nanenõ.

<sup>16</sup> Ato mẽra Epa Niospa Yõshi Shara naneyoamano Jesús aneõnoax maotisanifo.

<sup>17</sup> Nãskakẽ Pedro feta Juan ato mãmãnifo ato Nios kĩfixoyanã. Ato askafaifono Niospa Yõshi Shara ato mẽra naneni.

<sup>18</sup> Nãskakẽ Simón õini Niospa Yõshi Shara ato mẽra naneaito Pedro feta Juan ato Nios kĩfixoyanã ato mãmãifono. Ato askafaifono õikĩ Simón ato kori inãpaini.

<sup>19</sup> Ato iskafakĩ yoiyanã: “Earri na kerex shara inãkãfe ãri ato mãmãpakenõ Niospa Yõshi Shara ato mẽra nanenõ,” ixõ Simón ato yoini.

<sup>20</sup> Ato askafaito Pedro kemani: “A na mĩ koriya mĩ nai, akka mĩ shinã korioxõ a Niospa noko inãpaiyai keskara nõ fitiro. Maa, askarakaima.

21 Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī ōiti mēraxokai mī shināsharaima.

22 Nāskakē mī chaka xatefe a mī shināi anori anā shinākima. Nios yōkafe mī kīfaiato mia chaka soaxotiroki.

23 Mē mia ōi mī ōitifishkiki finaito mīmāi chakakōiax,” ixō Pedro yoini.

24 Askafaito nikakī Simón kemani iskafakī: “Ea Nios kīfixōfe, nā mīa yoiai keskafakī, Niospa ea omiskōimayamanō,” ixō yoini.

25 Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

*Mā fekakī pexe rasi anoafō Jesúsnoa meka shara ato yoifenifo*

26 Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani.

27 Askata Felipe fininākfāta kani. Fāi kai feronāfake Etiopía anoaki nokoni. Nā feronāfake xanīfori ini. Nāato kēro xanīfokōi kori kexexopaoni Etiopía anoa. Nāato Jerusalén ano kaxō Epa Nios kīfitani.

28 Mā āfe kaifo mēra okī āfe karo mēra tsoaxō kirika anefeni, nā Isaías Niosnoa yoikī keneni.

29 Nāskata Niospa Yōshi Sharapa anā yoini Felipe: “Oa karo ano katāfe,” fani.

30 Mā Felipe akiki kaxō nikani nā feronāfake Etiopía anoato kirika aneaito, nā Isaías keneni. Nāskaxō yōkani: “¿Mā mī tāpiamē a mī aneai?” faito,

31 Etiopía anoato kemani iskafakī: “¿Afeskaxō ē tāpitiromē? ¿Tsōa ea tāpimatiromē?” fata nāskaxō nā

feronãfãke Felipe kenani: “Ëfe karomã naneyofe efe tsaoxiki,” fani.

<sup>32</sup> A kirika kenea anakĩ õiai iska ini:

Oveja iyokaxõ retetirofo keskafakĩ, ari iyonifo retexikakĩ. Ovejanã fake achikaxõ ãfe rani xateafono feroitiroma keskai ari tooxinima.

<sup>33</sup> Rãfinĩ fanifo afaa chakafayamafiakẽ noikaspa kakĩ. A xanĩfofo aõ rafanã inifoma aõ rafanã itamaroko retenifo. Akka ãfe fenafãfe nikanakafoma, ixõ Isaías keneni õini.

<sup>34</sup> Nãskata nã xanĩfo Etiopía anoato Felipe yõkani: “Ea yoife ã tãpinõ na Niospa meka yoimisto yoini afaa ikamãkĩ, fetsaõnoa yoikĩ kenenimãkĩ askayamakĩ ãa anoi yoimekĩ kenenimãkĩ,” faito,

<sup>35</sup> Felipe yoini iskafakĩ: “Na mũ kirika õiai Isaías keneni a Jesucristo noko nãxoxiai yoikĩ keneni,” fani. Nãskafaxõ Jesúsnoa meka shara yoipakeni.

<sup>36</sup> Nãskakata fãi fokani faka ano nokonifo. Nãnoxõ a xanĩfo Etiopía anoato Felipe yoini: “Na faka õipo. ¿Na fãka mũ ea maotisafatiromamẽ?” fani.

<sup>37</sup> Askafaito Felipe yoini: “Mĩ õiti mẽraxõ mũ chanĩmara fakõinaito ã mia atiro,” fani. Askafaito a feronãfãke kemani: “Ëje, ã chanĩmara fai Jesucristo Niospa Fake,” fani.

<sup>38</sup> Askafaito nikakĩ Felipe, “Mĩ karo nẽtefafe,” fani. Mã karo nẽtefakata nã rafe fotopakefofãnifo faka ano. Nãnoxõ Felipe a feronãfake Etiopía ano maotisafani.

<sup>39</sup> Mã faka anoax feaifono, Niospa Yõshi Sharapa Felipe iyofaino yamarisatani. Nãskakẽ a feronãfake Etiopía anoato Felipe anã õinima.

40 Nāskata Felipe mai fetsa, Azoto ano nokoni. Nānoax kakī a pexe rasi anoafo Jesúsnoa meka shara ato yoifoikaax, Cesarea ari nokoni.

## 9

### *Saulo Jesús chanĩmara fani Damasco ano kakī (Hch. 22.6-16; 26.12-18)*

1 Nāskatari nā Saulo mēxotaima ě mato reteikai ixō ato retepaipaoni a Jesús Ifofaafu. Nāskakē a ato Nios kīfixomisfo āfe xanīfo ano kani.

2 Mā kaxō ato yoini iskafakī: “Ea kirika kenexokāfe ě aya katanō, ichanāti pexefo Damasco ano a Jesús chanĩmara faifo ě ato achitanō, feronāfakefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini.

3 Akka mā pexe rasi Damasco chaima fāi kaino, nai mēraxō a kemataima chaxatanaino,

4 Saulo pakeni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī,

5 Saulo kemani: “Ifo, ¿mī tsoamē?” faito kemakī iskafani: “Ĕkīa Jesús, a mī ea omiskōimanai.

6 Fininākakā. Pexe rasi ano katāxiki. Anoxō mia yoikani kiki mī afaa afeska faimākai,” fani.

7 Akka a Saulo fe foaifo ratekōinifo mekaito nikakani. Akka anoa mekaito nikafikakī tsoa ōinifoma.

8 Nāskata Saulo fininākakani. Fininākakāta ōipaikī anā ōinima, mā fēxoa ini. Nāskakē mētsokaxō iy-onifo Damasco ano.

9 Nā Damasco ano tres nia ini ōiaxma. Askatari afaa pinima, afaari ayanima.

10 Akka nã Damasco ano Jesús Ifofaa fisti ika ini, ãfe ane Ananías. Nãato namakẽ õini nõko Ifãfe yoiaito iskafakĩ: “Ananías,” faito, “Ëkĩa, Ifo,” fani.

11 Askafaito nõko Ifãfe yoini: “Na fai ãfe ane ‘Mẽstekõi’ ari katãfe. Mã nokoxõ Judaspa pexe ano yõkafe nãnoa feronãfake Tarso anoa, mĩ fichikai ãfe ane Saulo. Nãnoxõ Epa Nios kĩfi kiki.

12 Anoxõ mia namakẽ õiafai kiki, mĩ mĩfi mĩ mãmãito, anã õisharaxiki,” ixõ yoiaito,

13 nikakĩ Ananías kemani: “Ifo, na feronãfakeõnoa ea yoiãifãfe mẽ nikamis. Nãato keyokõi Jerusalén anoafõ chakafaito a mia Ifofaafõ.

14 Akka mã nono oa a ato Nios kĩfixomis xanĩfofãfe nĩchiafono. A mia Ifofamisfo ato karaxa mẽra nĩchixikĩ mã ato ifiyõa,” faito,

15 anã nõko Ifãfe yoini iskafakĩ: “Mẽ na feronãfake katoa eõnoa meka shara ato yoinõ mai fet-safo anoafõya ãto xanĩfofõya israelifõya ato yoinõ.

16 Nãskakẽ ã Saulo õimana eõnoax omiskõifinakõinõ,” ixõ yoini.

17 Askafaito nikafaini Ananías kani. Kaax pexe mẽra ikitoshita nãnoa Saulo fichitoshini. Nãskaxõ ãfe mĩfi mãmãni iskafakĩ yoiyanã: “Saulo, ãfi mefe yorakĩ. Nõko Ifo Jesús nã mĩ fãi oaito mikiki nokoi-tato, ea nĩchia ã mia fero sharafaxonõ, askatari Niospa Yõshi Shara mĩ mẽra ã nanenõ,” faino,

18 koshikõi Saulo fero mẽranoax oa foe pese keskara pakeni. Nãskaxõ õisharakõitani. Nãskakẽ Ananías maotisafani faka mẽra ikimakĩ.

19 Nãskaxõ mã pixõ meea ãfe yora sharakõi ini, anã ãfe yora pachi inima. Nãskakẽ nã Jesús Ifo-faafõ fe Damasco ano ato fe oxa ranãyonifo.

### *Damasco anoxõ Saulo Niosnoa yoini*

<sup>20</sup> Askata Saulo ichanãti pexe mẽraxõ ato yoikĩ taefani iskafakĩ: “Jesús Niospa Fakekõi,” ixõ ato yoini.

<sup>21</sup> Ato askafaito nikakani ratei fetsenifo. Nãskaxõ yoinifo iskafakakĩ: “Akka, ¿nato Jerusalén anoxõ a Jesús Ifofamisfo ato omiskõimamismamẽ? Akka, ¿naamamẽ? Mã nono oa nonoafõ ato achiyoi, a Nios kĩfixomisfãfe ãto xanĩfofo ato iyoxoni axiki.”

<sup>22</sup> Akka taeyoi Saulo ratepishtakĩ yoiyoni. Nãskaxõ feyafani fãsikõi yoikĩ. Nãskaxõ mẽstekõi ato yoini Niospa ãfe Fake Jesús nokoki nĩchini. Nãskakẽ judeofãfe Damasco anoxõ tãpipaiketsanifo. “¿Fato nõ chanĩmara faimẽ?” ikaxõ, “Jesucristofi Niospa Fakekõikĩ,” ixõ ato yoiaito.

### *Saulo judeofoki mesei onekaini*

<sup>23</sup> Nãskata mã oxai ichapano, judeofãfe ichanãkaxõ shinãnifo: “¿Afeskaxõ nõ Saulo retetiromẽ?” ikaxõ,

<sup>24</sup> akka Saulo tãpini yoiaifono. Pena yafi fakishchãi manaifono pexe rasi kãiti anoxõ retepaikakĩ.

<sup>25</sup> Askaito õikakĩ a Jesús Ifofamisfãfe Saulo fẽta mẽra nanexõ kene fomãkĩaxõ risfichi fakishi fotomanifo a tsoa niama anori. Mã fotomanafono onekaini.

### *Saulo Jerusalén ari kani*

<sup>26</sup> Mã Saulo Jerusalén ano nokoax a Jesús Ifofamisfo fe rafepaiyaito, akka keyokõichi omisnifo tãpikaxoma koshikairoko Nios Ifofara ikaxõ.

<sup>27</sup> Askaito õikĩ Bernabé Saulo iyoni Jesús ãfe inakõifo ari. Nãskaxõ ato yoini iskafakĩ: “Na Saulo



nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, ‘Jesús Niospa Fakekōi,’ ixō ato yoia ranotamakōi,” Bernabé ato fani.

<sup>28</sup> Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoifofāsafapaoni mesetāma.

<sup>29</sup> Anoxō ato yoiaito judeofāfe griego meka tāpikaxō fochishpamanifo. Nāskakaxō afeskaxoma retepainifo.

<sup>30</sup> Askafaifono a Jesús Ifofaafāfe mā tāpikaxō Saulo iyonifo Cesarea ano. Nānoxō Tarso ano nīchinifo.

<sup>31</sup> Nāskakē a Jesús Ifofaafō Judea anoax ita Galilea anoax ita Samāria anoax ita isharakōinifo anā tsōa ato omiskōimanaimano. Anoxō Nios nikasharakōinifo isharakōikaxō Niospa Yōshi Sharapa ato axosharaino. Nāskakē a Nios Ifofaafō ichapakōi inifo.

### *Pedro Eneas sharafani*

<sup>32</sup> Nāskakē Pedro kafāsani a Nios Ifofaafō ato ōifofāsafai. A Lida ano ikaxō Nios Ifofaafari ato ōikai kani.

<sup>33</sup> Nānoa feronāfake āfe ane Eneas fichini. Rakatiani mā ocho xinia aka ini.

<sup>34</sup> Fichixō Pedro yoini iskafakī: “Eneas, Jesucristo mia sharafaaki fininākfāta mī oxati itipinīfāfe,” ixō yoiaino, Eneas koshikōi fininākfani.

<sup>35</sup> Nāskakē Lida ano ikafāfe, Sarón anoafāferi ōikakī nōko Ifo Jesús chanīmara fanifo.

### *Mā Dorcas naano Jesúsxō Pedro otofani*

<sup>36</sup> Nāskaifono nā pexe rasi Jope ano kēro Nios Ifofaa ika ini, āfe ane Tabita. Griego mekapa

Dorcas famisfo. Nã kēromã isharakōixō ato ax-osharakōipaoni ato afara ināsharakōikī.

<sup>37</sup> Nãato askafai, Dorcas isinī iki nani. Mã nakē chokakaxō fomākīa mǎpemainīfofã pexe kene fetsa ano ratanifo.

<sup>38</sup> Akka Jope fe Lida chaima ini. Nã Lida ano Pedro ika ini. Nãno ikē nã Nios Ifofaafãfe tǎpikaxō feronãfake rafe nīchinifo, iskafakī yoitanōfo: “Jope anoxō mia kenafō mī koshi kanō,” ixō yoitanōfo.

<sup>39</sup> Askafaifono Pedro ato fe kani. Mã nokoano fomākīa mǎpemainīfofānifo a Dorcas raka ano. Anoax a kēro fenemaisfo oiakakī Dorcas nayox-oma ato samafaxomis ispanifo.

<sup>40</sup> Askafãfe ōikī Pedro ato kǎimani. Ato kǎimata ratokonō mai chachipakefofã Epa Nios kīfini. Nãskata a kēro naa ōiyanā yoini iskafakī: “Tabita, fininākafãfe,” faino, nã kēromã Pedro feista nãskax tsaoinākafāni.

<sup>41</sup> Nãskata Pedro mētsoxō fininīfofāni. Nãskata a Jesús Ifofaafoya a kēro ifomafafo ato kenani ato ōimaxiki mǎ Dorcas anā otoano.

<sup>42</sup> Askaito nikanifo a pexe rasi Jope anoafãfe. Nãskakē ichapakōichi nōko Ifo chanīmara fakōinifo.

<sup>43</sup> Mã askafata Pedro Jope pexe rasi ano oxaranāyoni, a Simón anoxō fichi shinã famis ano.

## 10

### *Pedro fe Cornelio*

<sup>1</sup> Nã pexe rasi Cesarea anoa feronãfake ãfe ane Cornelio ini. Sorarofãfe ãto xanīfo ipaoni. Nã sorarofō, “Italianōra,” ato famisfo.

<sup>2</sup> Nã feronãfake ãfe yorafo fe isharakōixō Epa Nios kīfipaonifo. Nãskatari judeofo ato

axosharayanã kori ichapa ato inãpaoni. Nãskaxõ Epa Nios mēxotaima kīfipaoni.

<sup>3</sup> Nãskata pena fetsa yātapake oa namakē ōia fani, Niospa āfe ājiri xafakīakōi ōini akiki oxõ iskafaito: “Cornelio,” faito.

<sup>4</sup> Nãskakē Cornelio ājiris ōini. Nãskaxõ rateifinakōiyanã yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfifaito mā Epa Niospa mia nikakōia, a yora afaamaisfo ato axosharayanã mī ato kori inãito.”

<sup>5</sup> Nãskaxõ yoini: “Fatora fetsa nīchife Jope pexe rasi ano kaxõ Simón ifitanõfo. Āfe ane fetsa Pedro.

<sup>6</sup> Simón fetsa pexe ano oxaki nã Simón ĩamãfã ketokonõ ikaki fīchi koiro fai.”

<sup>7</sup> Askafakī yoiax mā ājiri kaino, Cornelio a yonoxomis rafeya āfe soraro fisti kenani nã soraronõ kexekōimis ini. Akka nã soraronõ Nios shināmis ini.

<sup>8</sup> Nã ājirinī yoia keskara mā ato yoixõ Jope ari ato nīchini.

<sup>9</sup> Penama xini keya mā Jope chaima faifoafono, Pedro pexe māmākīa māpeinīfofāni arixõ Epa Nios kīfikakī.

<sup>10</sup> Nãskax fonāikōikī pipaini. Akka pixikakī mā pīchaifono Pedro namakē ōia fani.

<sup>11</sup> Ōia nai fepekemeaito ōini ariax sabanã keskara petapafã nexeax nai mēranoax nāmā fotopakekafanaito.

<sup>12</sup> Nã sabanã petapafã mēra yoinã fetsa fetsatapafo ōini ronofoya, peyafo, afama mīshti ini.

<sup>13</sup> Nãskata mekaito nikani iskafakī yoiaito: “Pedro, fininākafāfe. Nafu retexõ pixiki,” faito nikani.

14 Askafaito nikakĩ Pedro kemani: “Maa, Ifo, nafo ẽ pimisma, Moisés noko yoini nafo nõ pitiroma,” faito,

15 afianã yoiaito nikani iskafakĩ: “Niospa nafo shara imaki. Akka nafo chakara fayamafe,” faito nikani.

16 Yoikĩ tres fata nãskax nã sabanã petapafã anã nai mēra kaito õini.

17 Nãskakē Pedro shinãchakakõiyanaã tãpipaini. “¿Afaa iskara Niospa ea yoipaimē na namakē õia keskara ẽ õiai?” ixõ Pedro shinãni. Nãskaino a Cornelio ato nĩchia fokaxõ, pexe fepoti anoxõ ato yõkanifo: “¿Fatomē Simón pexe?” ixõ ato yõkanifo.

18 Anoxõ fãsikõi ato yõkanifo: “¿Fanĩ Simón fetsa oxamē, ãfe ane fetsa Pedro?” ixõ ato yõkanifo.

19 Oa namakē õia keskara õixõ Pedro shinãpaiyaino, Niospa Yõshi Sharapa yoini iskafakĩ: “Õipo, feronãfake trespa mia fenai feafokĩ.

20 Fininãkafãfe. Nã mã fotoax ato fe kataxiki tanaimakõi, ẽ ato nĩchia feafoki,” faino,

21 Pedro fotopakekafãxõ a feronãfake tii ato yoini iskafakĩ: “¿Afaa mã akiyoamē? Ërokonõ a mã ea fenai,” Pedro ato fani.

22 Ato askafaino kemanifo: “Nõ oa nã sorarofãfe ãto xanĩfo Cornelio noko nĩchiano nã feronãfakefi sharakõiki. Nios nikakõimis. Judeofãfe aõnoa meka shara yoimisfo sharara famisfo, Niospa ãfe ãjirinĩ yoia mia kenanõ ãfe pexe ano mĩ kanõ, nãato mia nikasharai mĩ yoiaito,” fanifo.

23 Askafaifãfe nikakĩ Pedro ato ikimani. Nãno afe oxa fistinifo, nãskata Pedro ato fe penama kani. A afe rafeafori Nios Ifofakanax Pedro fe fonifo Jope anoax.

24 Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax.

25 Mā Pedro pexe ano nokoano, Cornelio āfe pexe anoax kāinākfā Pedro ifikai kani. Mā kaxō a nāmā ratokonō mai chachipakefofā: “Mī fāsi sharakōira,” fani.

26 Askafaito ōikī Pedro fininīfofāni iskafakī yoiyanā: “Fininākfāfe. Ēri yoraki mia keskara,” fani.

27 Nāskax afe mekayanā pexe mēra ikikaikī ōia yora ichapakōifo ichanā inifo.

28 Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tsoa chakafatama ē ato noisharakōinō.

29 Nāskakē ea yoiainono ē koshi oa, ē okaspama. Akka ē tāpipai afeskakī mī ea kenamāki,” faito,

30 Cornelio kēmani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kīfiaino yātapake, feronāfake rapati fafekōiai safeax ekeki nokoita,

31 ea yoikī iskafaita: ‘Cornelio, mā Niospa nika mī kīfiaito. A mī akai keskarari mā tāpia, a afaama-isfo mī ato afara ināsharaito,’ ea faito ē ōita.

32 ‘Nāskaxō feronāfake tres pexe rasi Jope ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fētsa fichi koiro shinā famiski ĩamāfā kesemē ikaki,’ ixō ea yoita.

33 Nāskakē feronāfake tres ē koshikōi nīchita mia ififonōfo. Akka mī nokoki osharakōiyanā mī noko

inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

*Pedro ato yoini Cornelio pexe anoxō*

<sup>34</sup> Askafaito nikakī Pedro yoini iskafakī: “Chanīma mē tāpikōia Niospa noko yora fetsa keskara ōima, keyokōi nā yora fisti keskara noko ōi.

<sup>35</sup> Askakimaroko nā mani fetsafāferi Nios nikakōikakī, afarafo sharakōi fakanax, Epa Niospa fake itirofo.

<sup>36</sup> Niospa israelifāfe fenafo meka sharaōnoa ato yoini, inimasharakōinōfo. Jesucristoōxō ato yoini, nā nōko Ifoōxō.

<sup>37</sup> Mā mā nikamiski a Judea mai anoax ini keskara. Taefakī Galilea anoxō ato yoikī taefani: ‘Māto chaka xatekāfe Nios chanīmara fakāfe ē mato maotisafapanō,’ ixō Juan ato yoini.

<sup>38</sup> Akka mā mā tāpia Niospa āfe kerex sharafoya āfe Yōshi Shara Jesús mēra naneni. Jesús afama mīshtifo fapaoni, ato sharafayanā a omiskōiaifo, ni-afaka chakata ato omiskōimanaino. Nāskakē afama mīshtifo fatiro Niosmāi afe ikano.

<sup>39</sup> Akka nō ōiyamea Jesús afama mīshtifo faito judeofāfe āto mai anoxō ata Jerusalén anoxori akaito nō ōiyamea. Nāskafafaito reteyameafo ifi cruz ikakī mastakaxō.

<sup>40</sup> Akka mā retefitafono Epa Niospa tres nia oxata otoyamea. Nāskakē nokoki nokoaito nō ōiyamea.

<sup>41</sup> Akka atiri yorafoki nokoyameama, nokoki nokoaito nō ōiyamea. Afetīamamāi Niospa noko ka-

tonixakĩ chanĩmakõi nõ mato yoi. Nõ a feta piyanã nõ afeta ayayamea mã Niospa otofayameano.

<sup>42</sup> Nãato noko nĩchiyamea pexe rasi anoafõ nõ ato yoinõ iskafaki: ‘Niospa Jesús nĩchini,’ ato yoinõ fatofomãkĩ afe nĩpanakafo mã nafianixakakĩ, askatari a niafori ato yoixii.

<sup>43</sup> A Niosnoa yoimisfãfe a nã Jesús iskanõpokoai yoikĩ aõnoa yoionifo. Iskafakakĩ yoinifo: ‘Nã chanĩmara faifono aõxõ Epa Niospa ato chaka soaxotiro,’ ixõ yoinifo,” Pedro ato fani.

### *Nã judeofomafãfe Niospa Yõshi Shara finifo*

<sup>44</sup> Pedro ato yoikĩ xateamano Niospa Yõshi Shara ato mēra naneni ãfe meka shara nikaifono.

<sup>45</sup> Nãskakē a judeofãfe Jesús Ifofamisfãfe Pedro fe foitaxakakĩ ato õinifo. Ato iskafanifo: “Aira. Õikapo. Na nõko kaifomafo Niospa Yõshi Shara ato mēra naneakekafana,” ikax yoinãnifo.

<sup>46</sup> Anoxõ ato nikanifo meka fetsapa mekaifãfe iskakani a ato kaifomafo: “Nios fãsi sharakõi,” ikanax mekaifãfe ato nikanifo judeofãfe.

<sup>47</sup> Askaiãfe Pedro ato yoini: “Akka tsõa na yorafo ato maotisano fayamakãfe noko fatirofoma. Akka Niospa Yõshi Shara mã ato mēra nanea, nõmēra naneni keskai.”

<sup>48</sup> Pedro ato yoini Jesucristo aneõxõ ato maotisano fanõfo. Mã ato maotisano faafono, Pedro nĩchikaspanifo. “Kayamafe, nono nofe iyoxiki,” fanifo.

## 11

### *Pedro a Nios Ifofaafo Jerusalén anoafõ ato yoini*

<sup>1</sup> Nã Cesarea anoafãfe Jesús Ifofanifo judeofo yamafikaxõ. Afãfe Jesús Ifofaifãfe ato nikanifo a Jesúsxõ täpimiskõifãfe. A Nios Ifofamisfo fetsafãferi nikanifo. Atiixõ ato nikanifo âto mai Judea anoxõ.

<sup>2</sup> Askata Pedro Cesarea anoax kani Jerusalén ano. Anoxõ a Jesús Ifofamis fetsafãfe Pedro mekafanifo a Moisés keneni täpiafãfe: “Judeofoma fe mĩ rafeira,” ikaxõ.

<sup>3</sup> Iskafanifo: “¿Afeskai a nõko kaifoma ano mĩ kaitamē? Anoxõ ato fe rafexõ mĩ ato feta piaito nõ nikaita a Moisés yoini keskafakĩ nõ ato feta pitiroma,” fanifo.

<sup>4</sup> Askafaiãfe nikakĩ Pedro ato yoini a namakē õiafaita keskara,

<sup>5</sup> iskafakĩ: “Ë pexe rasi Jope anoxõ ã Nios kĩfianã oa namakē õia keskara ã õita. Ë õita oa sabanã keskara nexeax nai mēranoax fotopakekafanaito a ã nia ano.

<sup>6</sup> Askaito ã õia a mēra yoinã fetsa fetsatapafo ikita askatari a xõchixaraifoya peyaforti ã õita a mēra kechokomekē.

<sup>7</sup> Askata mekaito ã nikaita ea yoikĩ iskafaito: ‘Pedro, fininãkafãfe. Na fetsa retexõ pixiki,’ ea feita.

<sup>8</sup> Ea askafaito nikakĩ ã kemakĩ iskafaita: ‘Maa, Ifo. Moisés yoikĩ keneni keskafakĩ, nafo nõ pitiroma. Nãskakē na yoinãfo ã pimisma,’ ã feita.

<sup>9</sup> Ë askafaito afianã nai mēraxõ iskafakĩ ea yoiaito ã nikaita: ‘Niospa yoia nafo mĩ pitiroki. Pife, sharaki, chakafakĩma,’ ea feito ã nikaita.

<sup>10</sup> Ea yoikĩ tres fata, afianã nai mēra kaito ã õita.

<sup>11</sup> Askaino Cesarea anoax feronãfake tres ekeki feitafo. Ato nĩchiafono ea fenai fekanĩ. Mã fekanax pexe ano nokoitafo a ã ika ano.



<sup>12</sup> Nāskakē Niospa Yōshi Sharapa ea nīchita iskafakī ea yoiyanā: ‘Shināchakakīma ato fe katāfe,’ ea feita. Nāskatari a Nios Ifofaafo seis feronāfabe efe foitafo. Nāskakē ato fe yora yamafiāx Cornelio peXe mēra nō ikitoshita.

<sup>13</sup> Nānoxō noko Cornelio yoita a āfe peXe anoxō ājiri ōitaxakī iskafakī yoiāito: ‘Fatora fetsa peXe rasi Jope ano nīchife Simón ifitanōfo, āfe ane fetsa Pedro.

<sup>14</sup> Nāato mia yoi kiki afeskax Nios fe mī ipax-atiromākī, mefe yorafo fe,’ ixō Niospa yoitano Cornelio ea yoita,” Pedro ato fani.

<sup>15</sup> “Ē ato yoiaino Niospa Yōshi Shara ato mēra naneita, taeyoi nō mēra naneni keskai.

<sup>16</sup> Nāskakē ē shināfaita a nōko Ifāfe noko yoiyamea anori chanīma. ‘Juan ato fāka maotisafani, akka Niospa āfe Yōshi Shara mato mēra nanei,’ ixō Jesús noko yoiyamea.

<sup>17</sup> Epa Niospa āfe Yōshi Shara ato mēra naneita a nōmēra naneni keskafakī, nōko Ifo Jesucristo nō chanīmara faito. Akka ē, ‘Mī Yōshi Shara ato mēra naneyamafe,’ ē Nios fatiroma,” ixō Pedro ato yoini.

<sup>18</sup> Ato askafaito nikakani a Nios Ifofamisfo Jerusalén anoax anā tsoa tooxinima, Nioskiroko inimanifo. Iskafakī yoinifo: “Aicho, Nios fāsi sharakōi, nā noko ināni keskafakī, āfe Yōshi Shara ato mēra nanea, a nikakōisharakanax afe ĩpaxanōfo,” ixō yoinifo.

### *Antioquía anoafāfe Jesús Ifofanifo*

<sup>19</sup> Mā Esteban reteitafono a Jesús Ifofamisfo ato omiskōimakī taefanifo. Ato askafaifono ranāri Fenicia ari ichonifo, ranāri Chipre ari

fonifo, ranāri Antioquía ari fonifo. Nārixō judeofo Jesúsnoa meka shara ato yoinifo. Yora fetsafo ato yoinifoma, judeofos ato yoinifo.

<sup>20</sup> Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquía ano. Mā fēkaxō a judeofoma nōko Ifo Jesúsnoa meka shara ato yoinifo.

<sup>21</sup> Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmakikāta nōko Ifo chanīmara fakōinifo.

<sup>22</sup> Askaifono a Jesús Ifofamisfāfe Jerusalén anoxō ato nikanifo. Nāskakē Bernabé Antioquía ano nīchinifo.

<sup>23</sup> Mā Bernabé nokoxō ōia Niospa ato imasharakōia ōitoshini. Askaifāfe ōikī Bernabé inimasharakōini. Nāskaxō ato yoisharakōini shināsharakōixō. “Isharakōixō nōko Ifo nikasharakōikāfe,” ato fani.

<sup>24</sup> Akka Bernabé feronāfake sharakōi ini. Niospa Yōshi Shara āfe ōiti mēra nanea, Jesús chanīmara fakōina. Nāskakē yorafāfe aōxō nōko Ifo Jesús chanīmara fakōinifo.

<sup>25</sup> Mā askata Bernabé Tarso ano kani Saulo fe-naikai. Mā fichixō Antioquía ano iyoni.

<sup>26</sup> Nārixō a Nios Ifofaafo feta xinia fisti ani, yora ichapafo ato tāpimayanā. Antioquía anoxō taefakī ato anenifo a Jesús Ifofaafo. “Cristianōra,” ato fanifo.

<sup>27</sup> Askaifono a Niospa ato shināmanaino Niosnoa ato yoipaonifo nāfo Jerusalén anoax Antioquía ano fonifo.

<sup>28</sup> Mā fokaxō fishtichi niinākafāxō ato yoini āfe ane Agabo, Niospa Yōshi Sharapa shināmanaino, “Nā maitio anoax fonāiki finakōixikanira,” ixō ato

yoini. Akka chanĩma, askakõini Claudio xanĩfo ikano.

<sup>29</sup> Nãskakẽ a Nios Ifofaafãfe Antioquía anoxõ shinãnifo a Nios Ifofaa fetsafo Judea anoafõ ato kori manamaxikakĩ, afe tii ato fomakanimãkai.

<sup>30</sup> Nãskakaxõ Bernabé yafi Saulo inãnifo ato foxotanõfo. Nãno a Jesús Ifofamisfo Judea ano xanĩfofo ikafo inifo. Nãfo ato kori inãnifo ato paxkaketsaxonõfo.

## 12

### *Santiago retekãta Pedro karaxa mẽra ikimanifo*

<sup>1</sup> Nãskaino Herodes xanĩfãfe a Jesús Ifofamisfo atiri ato achixõ karaxa mẽra ato ikimani ato omiskõimayanã.

<sup>2</sup> Nãskata Herodes ato yoini Santiago retenõfo kenopa. Nã Santiago Juan fe nanea ini.

<sup>3</sup> Mã Herodes Santiago ato retemanano õikani judeofo akiki inimanifo. Askafaiãfãfe õikĩ Herodes ãfe inafõ yoini Pedrori achinõfo. Nãato askafanifo fistatĩa pãa faraxaxoma piyanã.

<sup>4</sup> Mã Pedro achiafono Herodes Pedro karaxa mẽra ikimani. Nãnoxõ dieciseis sorarofãfe kex-enifo. Herodes shinãni: “Mã fista senẽano chipo ã Pedro kãimanõ yorafãfe õinõfo,” ixõ shinãni.

<sup>5</sup> Nãskakẽ Pedro karaxa mẽra ini, sorarofãfe kex-ekõiafono. Askafafiaifono a Jesús Ifofamisfãfe Epa Nios kifixonifo Niospa kexesharakõinõ.

### *Niospa Pedro kãimani karaxa mẽranao*

<sup>6</sup> Nã fakish fistichi Herodes shinãni: “Ë pe-nama Pedro kãimanikai yorafãfe õinõfo,” ixõ, akka

karaxa mēranoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoxō kexeshinifo.

<sup>7</sup> Nāskaino nōko Ifāfe āfe ājiri akiki nokorisatani. Karaxa mēra fakishfiax penasharakōi itani. Nāskaxō ājirinī Pedro mōini ramāyanā iskafakī yoini: “Fininākafe kataxiki,” faino koshikōi Pedro mifi inoax cadenās mepekemetani.

<sup>8</sup> Nāskafata ājirinī yoini iskafakī: “Mī rapati yafi mī sapato safefe,” faito nikakī Pedro koshi āfe rapati yafi āfe sapato safeni. Nāskaxō ājirinī anā yoini: “Mī tariri safefe efe kaxiki,” fani.

<sup>9</sup> Nāskafaino Pedro ājiri acho kani. Acho kakī shināpaini: “¿Chanīmamē mā ea ājirinī kāimanamē? Akka ē namakē ōiafai keskara ē ōi,” ixō shināpaini.

<sup>10</sup> Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

<sup>11</sup> Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiyaifono ea kāimana,” ixō shināni.

<sup>12</sup> Mā tāpiax Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā María pexe anoxō yora ichapafāfe ichanākaxō Epa Nios kīfiaifono Pedro kani.

<sup>13</sup> Mā kaxō pexe fepoti anoxō ato kenaino, nā xomayato María yonoxomis āfe ane Rode, nāato kaxō ōini tsoamāki.

<sup>14</sup> Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā

Pedro oa. Na pexe fepoti ano nia,” ato fani.

<sup>15</sup> Ato askafaito tsōa chanĩmara fanima. Iskafanifo: “Mĩ chanĩ, Pedrokai oama,” faifono, “Maa, mẽ Pedro ãfe meka nikakōia,” ato fani. Ato askafaino iskafakĩ yoinifo: “Aamaki, ãfe ãjiriki,” fanifo.

<sup>16</sup> Askafaifono Pedro pexe fepoti anoxō mẽxotaima ato kenani. Mã fēkaxō fepoti fepekaxō Pedro fichikanax ratenifo.

<sup>17</sup> Askafãfe òikĩ Pedro ãfe mẽkemã mekayamakãfe ato fani. Nãskaxō ato yoini afeskaxō nõko Ifãfe karaxa mẽranoa kãimanamãkĩ. Nãskata anã ato yoini iskafakĩ: “Santiago yafi a Nios Ifofamisfo ato yoitakãfe,” ato fani. Ato askafakĩ yoita pexe fetsa ari kani.

<sup>18</sup> Akka mã penano anoa Pedro õikanima sorarofo yoinãnifo, tãpikanamax Pedro afeskamẽ ikanax.

<sup>19</sup> Mã kãikaina nikaxō, Herodes ato fenamani, “Akka mã fenafikãki fichiyamaifono mã kexesharamaki,” ixō Herodes, “Nã sorarofo retekãfe,” ato fani. Ato askafata Herodes Judea anoax kani Cesarea ari ikikai.

### *Herodes nani*

<sup>20</sup> Herodes atoki õitifishkini Tiro pexe rasi anoafo yafi Sidón pexe rasi anoafoki. Atoki õitifishkikaino Tiro anoa feta Sidón anoafãfe shinãnifo Herodes yõkaifoxikakĩ anã atoki õitifishkiyamanõ. Nãskakaxō xanĩfo Blasto yoinifo: “Noko Herodes yoixõfe nõ afe mekapaikai. Nokoki õitifishkiki kiki, nõ afe rafepaisharaikai anã nokoki õitifishkiyamanõ. Nokoki õitifishkiki afe yorafo yoitiroki a nõ piyai noko inãnõfoma,” ixō Tiro anoafo feta Sidón anoafãfe Blasto yoiaino. Nã yoiaino keskafakĩ Blasto Herodes yoini.

<sup>21</sup> Askafaito nikakĩ, “Pena fetsa ě ato fe mekanõ,” fani. Nãskata pena fetsa mã akiki feaifono, rapati sharakõi nã xanĩfãfe safemis keskara safeax tsaoti sharakõi ano tsaoni, anoxõ ato yoixiki.

<sup>22</sup> Ato yoikĩ askafaino fãsikõi yorafo mekainĩfofãnifo. Iskafakĩ yoinifo: “Na mekai yora mekaima, nios mekai,” fanifo.

<sup>23</sup> Askafaifono nõko Ifãfe ãfe ajirinĩ Herodes isinĩ imani, “Ĕ Niosma. Nios sharakõi,” ato faimano. Nãskax Herodes nani xenafãfe xaki mēraxõ piaino.

<sup>24</sup> Askano Niospa meka shara Jesúsnoa ato yoifofãsafanifo akairi Niospa meka shara nikakaxõ chanĩmara fanõfo.

<sup>25</sup> Nãskafaifono Bernabé feta Saulo mã yonokĩ mitokanax Jerusalén anoax fonifo, Antioquía ano. Juanri ato fe kani, ãfe ane fetsa Marcos inĩ.

## 13

### *Bernabé feta Saulo Niospa meka ato yoikĩ tae-fanifo*

<sup>1</sup> Antioquía ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomãkĩ ixõ ato tãpimamisfori ano ato fe inifo. Bernabé ikaino, Simón ãfe ane fetsa Nã Fisora fapaonifo ikaino, Lucio a Cirene anoa ikaino, Manaén xanĩfo Herodes fe yosini ikaino, nã Saulori ato fe inĩ.

<sup>2</sup> Akka pena fetsa foni teneyanã nõko Ifo kĩfiaifono Epa Niospa Yõshi Sharapa ato yoini iskafakĩ: “Bernabé yafi Saulo ato paxkanãfakãfe ě ato katoaki eõxõ yononõfo,” ato fani.

<sup>3</sup> Nãskata foni teneyanã mã Epa Nios kĩfikaxõ Bernabé yafi Saulo ato mĩfi mãmãkaxõ Epa Nios

ato kīfixoyanā, ato nīchinifo fetsafo ari fokaxō Epa Niospa meka shara ato yoitanōfo.

### *Bernabé fe Saulo Chipre ano fonifo*

<sup>4</sup> Mā Niospa Yōshi Sharapa ato nīchia fokanax Bernabé fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā ĩamāfā fakafā nakirafe mai toomāfā ano fokani.

<sup>5</sup> Mā fokanax pexe rasi Salamina ano nokokaxō judeofāfe āto ichanāti pexe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

<sup>6</sup> Nā ĩamāfā nakirafe mai toomāfā anoa ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ē Niosxō yoirā iki.

<sup>7</sup> Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabé yafi Saulo kenamani, Niospa meka shara nikapaikōiki.

<sup>8</sup> Akka nā yōfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō.

<sup>9</sup> Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini.

<sup>10</sup> Nāskaxō yoini iskafakī: “Chanīchakapa nīafaka fake, nā sharafo mī noikaspamis. Mī chanīmis ato pārapaiyanā nōko Ifāfe mēstekōi ato yoifimisno, akka anorima mī ato yoimis. ¿Afeskai mī xateimamē?

<sup>11</sup> Akka iskaratīa nōko Ifāfe mia omiskōimani. Mī anā fēro ōima, xinī chaxafiaino mī anā fena ōiyonakama,” fani.

Askafaino Elimas anã fẽro õinima. Fakish mẽra nia keskara ini. Askaxõ ato kenani mêtsoxõ iyoi-fonõfo anã fẽro õiyamaito.

<sup>12</sup> Nãskaito õikĩ xanĩfãfe nõko Ifo chanĩmara fani. “Aira, Jesús afama mĩshti fatiro,” ixõ yoinifo.

*Pablo fe Bernabé Antioquía ano inifo. Nã Antioquía Pisidia mai ano ini*

<sup>13</sup> Pablo afe rafeafo fe Pafos anoax kanõanãfãnẽ nanefainifo pexe rasi Perge ano fokani. Nã Perge Panfilia mai ano ini. Nãnoax Juan anã ato fe kanima. Nãno nẽteax anã oni, Jerusalén ano.

<sup>14</sup> Nã Perge anoxõ Antioquía finõfainifo, Antioquía anoxõ shinã Pisidia chaima ini. Nãriax pena tenetitĩa ichanãti pexe mẽra ikifaikanax tsaonifo.

<sup>15</sup> A Moisés Niospa meka yoikĩ kirikaki keneni yafi a Niospa ato shinãmanaino yoipaonifo keskara anekãta, a ichanãti pexe kexemisfo xanĩfofõfãfe Pablo yafi Bernabé ato yoini iskafakakĩ: “Nõko kaifo rafeta mã noko afara yoipaimãkai noko yoikãfe, noko inimamaxikakĩ,” ixõ ato yoinifo.

<sup>16</sup> Ato askafaifono Pablo niinãkafã atokiri mẽshainãkafã mekayamakãfe ato fani. Nãskaxõ ato yoini iskafakĩ: “Ea nikakãfe ẽfe kaifo israelifãfe yora fetsafo feta mã nofeta Epa Nios kĩfipaimãkai ẽ mato yoisharanõ.

<sup>17</sup> Israelifãfe ãto Niospa taefakĩ nõko xinifo katonni afe yora inõfo. Nãskakẽ Egipto anoax kainifo yora fetsafo mẽra iyokanax Ejipto mai anoax. Nãskakẽ chipo Epa Niospa ãfe kerex sharaõxõ Ejipto anoa ato iyoni.

<sup>18</sup> Nãskakẽ Niospa meka tsõa nikasharayamafi-aifono, Niospa ato kexepaoni cuarenta xinia tsõa istoma anoxõ.



19 Nāskata Niospa Canaán mai anoxō siete faxō mani fetsafo ato potani, nōko xinifo a mai ato ināxiki.

20 Nāskakē cuatrocientos cincuenta xinia ayonifo. Fena Canaán mai ano fonifoma. Mā cuatrocientos cincuenta xinia finōta xanifo ya inōfo Niospa ato yoini.

“Nāskatari chipo nā Niospa meka ato yoimisri Samuel xanifo ini.

21 Nāskakē, ‘Xanifo finakōia nō fichipai noko ikinō,’ ixō yoinifo. Nāskakē Niospa Saúl cuarenta xinia imani xanifokī. Akka nā Saúl āfe apa Cis ini, Benjamín āfe kaifo.

22 Nāskata Epa Niospa Saúl tsekani anā xanifo iyamanō. Akka Epa Niospa David xanifo inō imani. Nāskaxō yoini iskafakī: ‘Isaí āfe fāke David mā ea inimamakōi nā ē apaiyai keskafaki nāto akōini,’ ixō yoini.

23 Nā David āfe fena ini Jesús. Epa Niospa nai mēraxō nāmā nīchini israelifo ato ifipakexanō nā yoiyoni keskafakī.

24 Askatari Jesús oyoamano israelifo Juan Jesúsnoa meka shara ato yoini iskafakī: ‘Māto chaka xatexō Nios Ifofakāfe maotisaxakakī fetsafāfe tāpinōfo mā māto chaka mā xateano,’ ixō ato yoini.

25 Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanifo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

26 “Ēfe kaifo mīshtichi, māfi Abraham fenafokī, ea nikakapo a ēfe kaifomafo feta ē mato yoinō.

Mãfi Epa Nios chanĩmara fapaikai. Nã meka sharaõnoa nikakãfe Epa Niospa ãfe Fake nĩchiniki noko ifipakexanõ.

<sup>27</sup> Nã Jerusalén ano ikafãfe ãto xanĩfofo feta tãpinifoma Jesús tsoamãki. A inõpokoai yoikĩ aõnoa kirika kenenifori tsõa tãpiyameama, pena tenetitĩa ichanãti pexe mēraxõ anefikakĩ. Nãskakaxõ reteyameafo nã aõnoa yoikĩ kenenifo keskakõifakĩ.

<sup>28</sup> Afaa chakafaito õiyamafikakĩ retepaikakĩ. ‘Ato retemafe,’ yorafãfe Pilato fanifo.

<sup>29</sup> Nãskakē nã aõnoa yoikĩ kirika kenenifo keskakõifakĩ, mã askafayameafo retekaxõ ifi cruz ikakinoa fotomapakefõkaxõ mafa kini mēra maifanifo.

<sup>30</sup> Akka mã mafa kini mēra maifafiafono Epa Niospa otofayamea.

<sup>31</sup> Mã oxa ranãta a Galilea anoax Jerusalén ano afe foitafãfe atoki nokoaito õiyameafo. Nãfãfe jude-  
ofo Jesúsnoa ato yoikani.

<sup>32-33</sup> “Nãskakē na meka shara aõnoa nõ mato yoi, Epa Niospa nõko xinifo yoini keskafakĩ. Mã noko askafaxokõia nõ ãto fenafokē. Nãskakē Epa Niospa mã retefitafono Jesús otoayamea. A kirika Salmo ano kenea iskai:

Mĩ ěfe Fake. Iskaratĩa ě mia nima,  
ixõ kenenifo.

<sup>34</sup> Niospa afetĩama yoiyoni iskafakĩ:

Mĩ nafiano ě mia otofaxii mã yora pisiyamanõ,  
ixõ yoinino, nãnorikõi aõnoa kirika kenenifo:

Chanĩma, nã ě David yoini keskafakĩ ě mia  
sharafai,  
ixõ Niospa yoini.

<sup>35</sup> Nãskakē ana aõnoa yoikĩ yõra kenei iskafakĩ:

Epa Niosi, mĩ Fake mĩ kexesharai ãfe yora  
pisinõma,  
ixõ kenenĩ.

<sup>36</sup> Chanĩma, David nayoxoma ato ĩkiyopaoni, Niospa  
yoiaino. Nãskax chipo nani ãfe xinifo nãpa keskai,  
nã ãfe xinifo mai anori David maifanifo. Anoax ãfe  
yora pisini.

<sup>37</sup> Akka Jesús mã nafiakẽ Epa Niospa otoani. Ato  
ãfe yora pisinima.

<sup>38-39</sup> Efe yora mĩshtichi, mã nõ mato yoimis mãri  
tãpisharakãfe, mãto chaka mã soapaimãkai Jesúsxõ  
mã atiro. Mã chanĩmara feito aõxõ Epa Niospa  
mato chaka soaxotiro. Akka a Moisés noko yoin-  
ioxõkai nõko chaka nõ soatiroma.

<sup>40</sup> Kexemesharakãfe a inõpokoai yoikĩ Niospa  
meka yoimifãfe kenenifo keskai mã askatiroki.  
Iskafakĩ yoinifo:

<sup>41</sup> Akka ẽ yoiaito mã ea nikakaspai, ekeki  
kaxemetsamayanã. Nãskakẽ ẽ afarafõ akaito  
õiax rateyanã mã nai iskarafõ nõ õimisma ikax.  
Nãskakẽ mã chanĩmara famisma, fetsafãfe mato  
yoifiaifono,

ixõ kenenifo,” ixõ Pablo ato yoini.

<sup>42</sup> Mã Pablo afe rafeafõ fe judeofãfe ãto ichanãti  
pexe mẽranoax tsekefainaifono, nã judeofõfãfema  
ato iskafanifo: “Mã noko yoia keskafakĩ pena  
teneti fetsatĩa noko anã yoifaixakãfe,” ixõ ato  
yoinifo.

<sup>43</sup> Mã ichanãti pexe anoax ichanãi xateafono,  
judeofõ feta yora fetsafãfe a Epa Nios Ifofaafõ  
keskafakĩ akairi Epa Nios Ifofapaikani ato fe  
fonifo, Pablo fe Bernabé foaifono. ato fe foai-  
fono ato iskafanifo: “Nofe yora mĩshtichi, Niospa

mato yoiai anori tãpisharakãfe. Niospa mato afara sharafaxõfai keskara shinãkãfe inimayanã,” ato fanifo.

<sup>44</sup> Nãskata afianã pena fetsa pena tenetitĩa, pexe rasi anoax yora ichapakõifo ichanãnifo nõko Ifãfe ãfe meka shara nikakani.

<sup>45</sup> Nãskaifono judeofãfe ato õinifo yõrafã rasichi Pablo yafi Bernabé ato nikaifono. Nãskakẽ õitifishkikõinifo. Nãskaifono judeofo Pabloki õitifishkianã mekafakĩ chakafayanã ichanifo.

<sup>46</sup> Ato askafaifono Pablo feta Bernabé mese-tama ato kemanifo ato iskafakakĩ: “Nõ mato Niospa meka sharaõnoa yoikĩ taefafiaino, mã nikakaspamis. Nikakaspaxkai mã Epa Nios fe İpanakama. Nãskakẽ nã judeofoma nõ ato yoikai.

<sup>47</sup> Nãskakẽ nõko Ifãfe noko nĩchini iskafakĩ yoivanã:

Ë mato nĩchi oa luzpa keyokõi chaxa keskara faxõ, eõnoa mã ato yoifotanõ, efe İpaxanõfo. Maifo tii anoa na chai ikafo ari kaxõ mã ato yoitanõ,”

ixõ noko nĩchini.

<sup>48</sup> Ato askafaifono nikakani, a judeofoma in-imakõinifo. Nãskaxõ yoinifo iskafakakĩ: “Nõko Ifãfe ãfe meka sharakõi,” fanifo. Nãfãfe chanĩmara fakõinifo a Niospa ato katoafo afe ipanakafora ikaxõ.

<sup>49</sup> Nãskakẽ nã mai anoafo, nõko Ifãfe ãfe meka sharaõnoa ato yoifofãsafanifo.

<sup>50</sup> Ato askafaifono judeofo nã kẽrofo isharakõimisfo fe mekanifo, a pexe rasi anoaxanĩfofo feri inifo. Nãskakaxõ ato yoinifo Pablo yafi Bernabé ato chakafakĩ ato omiskõimata a mai anoxõ ato potanõfo.

<sup>51</sup> Ato askafaifono Pablo feta Bernabé ãto sapato tsekakaxõ taatakanifo yorafãfe ato tãpinõfo. Nãskanax Pablo fe Bernabé Iconio ari fonifo.

<sup>52</sup> Akka nã Nios Ifofafo inimakõinifo, Epa Niospa Yõshi Shara ato fe ikano, mã Pablo fe Bernabé foaifono.

## 14

### *Pablo fe Bernabé Iconio ano inifo*

<sup>1</sup> Mã fokanax Pablo fe Bernabé Iconio ano nokonifo. Nãnoax judeofãfe ichanãti pexe mēra ikifainifo. Nãnoxõ Niospa meka sharaõnoa ato yoiaifono ato nikakõisharayanã ato chanĩmara fanifo, judeofãfe yora fetsafo feta.

<sup>2</sup> Askaifono judeofãfe ato nikakaspakakĩ, a judeofoma ato yoinifo iskafakakĩ: “Ato nikayamakãfe ãa chanĩkani kiki,” ato fanifo Pablo yafi Bernabé nikanõfoma.

<sup>3</sup> Ato askafafiaifono Pablo fe Bernabé nãno ato fe iyopaonifo. Nãnoxõ nõko Ifoõxõ mesetamakõi ato yoipaonifo. “Nõko Ifãfe noko chaka soaxotiro Nios fe nõ ãpaxanõ,” ixõ ato yoinifo. Nãskaxõ afama mĩshtifo fakakĩ ato ispanifo. Askafaifono Niospa ato noikĩ ato õimani aõxõ ato yoinõfo.

<sup>4</sup> Akka yorafãfe pexe rasi Iconio anoxõ anoris shinãnifoma. Ranãrito judeofo chanĩmara faifono, ranãritori Pablo yafi Bernabé chanĩmara fanifo.

<sup>5</sup> Nãskaifono judeofo yora fetsafo fe xanĩfofo fe yoinãnifo, Pablo yafi Bernabé ato tokirinĩ tsakakĩ omiskõimaxikakĩ.

<sup>6-7</sup> Ato askafapaiyaifono Pablo feta Bernabé mã tãpikanax Iconio anoax Listra ano fonifo, nãnoax Derbe ano fonifo. Nã pexe rasi Listra fe Derbe

Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

*Listra anoxō tokirinī Pablo tsakaketsanifo*

<sup>8</sup> Listra ano feronāfake finimisma ika ini, kafāsamisma chatomāiax. Nāskarapa kāini tsaoa ini.

<sup>9</sup> Pablo yoiaito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni.

<sup>10</sup> Nāskaxō fāsikōi yoini iskafakī: “Fininākafāfe,” faino, koshikōi fininākafānax kafāsani.

<sup>11</sup> Pablo askafaito ōikani, yorafo Licaonia mekapa mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

<sup>12</sup> Nāskakaxō Bernabé na nōko nios Zeus fakaxō, Pablōri ato yoiaito, “Na nōko nioskōi Hermes,” fanifo.

<sup>13</sup> Zeus kīfiti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexpainifo ato ināxikakī.

<sup>14</sup> Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo

<sup>15</sup> iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoiyoi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi

nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani.

<sup>16</sup> Nā iyopaonifāfe afara chakafakī xateafomano Epa Niospa ato xatemanima āa anōfo.

<sup>17</sup> Nāskafiaifono Niosxō afarafo sharafakakī ato ōimanifo, tāpinōfo Nios tsoamāki. Akka nāato mato oi imaxona, māto fanafori mato fofaimasharaxona, a mā piari mato ināsharataifa, mā inimasharakōinō,” Pablo feta Bernabé ato fani.

<sup>18</sup> Ato askafakī yoifikakī ato xatematiroma inifo, ato fakka retexopaiyaifono nōko niosra ixō ato ināpaikakī.

<sup>19</sup> Ato askafaifono judeofo Antioquía anoax fekāta Iconio anoax fenifo. Ato pārai fekani, “Pablo feta Bernabé mato pārakani,” ixō ato yoinifo. Ato askafaifono Pablo tokirinī tsakaketsanifo. Mā nō reteara ikaxō xarafokaxō pexe rasi pasotai potanifo.

<sup>20</sup> Askafaifono a Jesús Ifofaafo a mǎnǎo niakekaxō ōiaifono Pablo fininākafani. Askata finikaini pexe rasi mēra anā kani. Nāskata nǎnoax pena fetsa Bernabé fe Derbe ano kani.

<sup>21</sup> Derbe anoxō Niospa meka sharaōnoa ato yoiaifono yōrafā rasichī ato nikakaxō Nios Ifofasharakōinifo. Mā ato yoikanax Listra ano fenifo, nǎnoax Iconio ano fenifo, nǎnoax Antioquía ano nokonifo.

<sup>22</sup> Nǎriafo a Nios Ifofaafo ato yoifofāsafakakī ato inimamakōinifo, “Isharakōikāfe Nios nikakōisharayanā. Epa Nios xanīfo fe ipaxakakī, nai mēra oyoamano nono mai anoax mā omiskōi finakōitiro,” ixō ato yoinifo.

<sup>23</sup> Nāskatari Pablo feta Bernabé a Nios Ifofaafo anoafō a ato kexeaifo xanīfofo katonifo, Nios chanīmara fakōinafono. Mā foni teneyanā Epa Nios kīfikaxō iskafakakī: “Epa Niospa, ato kexesharafe mia chanīmara fakani kiki,” ixō yoinifo.

*Pablo fe Bernabé anā Antioquía ano fenifo nā Antioquía Siria mai ano ini*

<sup>24</sup> Mā anoax fokakī Pisidia finōfāikanax Panfilia ano nokonifo.

<sup>25</sup> Nāskakata Perge anoxō Niospa meka sharaōnoa ato yoikata, Atalia ano fonifo.

<sup>26</sup> Nānoax kanōanāfānē fonifo Antioquía ano anā fokani. Nā Antioquía anoxō ato nīchinifo. “Niosnoax fokaxō ato yoisharatakāfe,” ixō ato nīchiyameafono ato yoitakani anā fenifo.

<sup>27</sup> Mā Antioquía ano nokoafono a Jesús Ifofamisfo ato fe ichanāfono anoxō ato yoinifo a Niospa ato feta afama mīshti aka keskara. Iskafakī ato yoinifo: “Nōko Ifāfe a judeofoma ato chanīmara famaino mā Ifofaafo,” ixō ato yoinifo.

<sup>28</sup> Nāskakanax Pablo fe Bernabé nā Nios Ifofaafo fe nāno ato fe iyopaonifo.

## 15

*Jerusalén anoax a Jesús Ifofaafo ichanānifo*

<sup>1</sup> Nāskaifono feronāfakefo Judea anoax Antioquía ano fonifo. Mā nokokaxō a Jesús Ifofamisfo ato yoinifo iskafakakī: “Moisés noko yoini iskafakī: ‘Foshki repa xateyamax nō Nios ano katiroma,’ ixō noko yoini. Nāskakē nā Moisés noko yoini keskai nō askamis,” ixō ato yoinifo.

<sup>2</sup> Ato askafaifāfe nikakī Pablo feta Bernabé, “Maa, askarakaima. Fanīrira mā yoi,” ato fakanax



ato fe feratenānifo. Ato askafaifono Pablo yafi Bernabé a Jesús Ifofamisfo fetsafori ato katokaxō Jerusalén ari ato nīchinifo a Jesúsxō āfe meka ato yoimisfoya a Nios Ifofaafo ato kexemisfo ato yōkatanōfo chanīmamakī.

<sup>3</sup> Nā Nios Ifofaafāfe Antioquía anoxō ato nīchiafo fokakī, Finicia yafi Samāria finōfāikakī ato yoifainifo: “A judeofofāfema Nios Ifofakakī mā āto chaka xateafora,” ixō ato yoiaifono nikakani a Nios Ifofaafo inimakōinifo.

<sup>4</sup> Mā Pablo fe Bernabé Jerusalén ano nokoa-fono, a Jesús Ifofaafo feta a Jesúsxō āfe meka yoimisfo feta a ato kexemisfofāferi ato ifinifo, ato iskafayanā: “Aicho, mā nokoki osharakī,” ixō ato yoiyanā. Ato askafaifono anoxō ato yoinifo a Niosxō afama mīshtifofamisfo.

<sup>5</sup> Ato askafaifono nikaxō fariseofāfe Jesús Ifofakaxō ato iskafainifo: “Judeo yamafikaxō Nios Ifofakaxō āto foshki repa xatetirofo Moisés yoini keskafakī,” ixō ato yoinifo.

<sup>6</sup> Nāskaifono a Jesúsxō āfe meka ato yoimisfo fe ato kexemisfo fe ichanānifo tāpikikakī a yoiaifo keskara.

<sup>7</sup> Mā ichapa yoināfono Pedro fininākaḡā ato yoini iskafakī: “Efe yora mīshtichi, mā mā ea tāpia afetiāma Niospa ea katoni, mato mēranao āfe meka shara a judeofoma ē ato yoinō, akairi chanīmara fakanax afe ĩpaxanōfo.

<sup>8</sup> Niospa a shināifo keskara tāpikōia. Nāato ato tāpimani afe yora inōfo. Nāskaxō āfe Yōshi Shara ato mēra nanei, a nōmēra naneni keskafakī. Nāskakē keyokōichi tāpitirofo Niospa ato ifiaito.

<sup>9</sup> Niospa atoya yora fetsa keskara noko õima, nã yora fisti keskara noko õi. Nã noko ani keskafakĩ ãto chakari mã ato soaxona chanĩmara faifono.

<sup>10</sup> Akka mãto xinifãfe a Moisés yoini keskara nikakõipaonifoma. Nãskarifiakĩ mãri mã nikakõimisma. Akka a Moisés yoini keskara nikakõiyamafikatsaxakĩ, ¿afeskakĩ a judeofoma Jesús Ifofafafono a Moisés yoini keskara nikakõikãfe mã ato famismẽ? Nãskakẽ afãferi nikakõitirofoma. Akka Jesús fistichi noko nimafitirono, ¿afeskakĩ mã chanĩmara faimamẽ?

<sup>11</sup> Akka Moisés yoini keskarato noko nimatirora ixõ mã shinãmis. Akka nõko Ifo Jesús nõ chanĩmara feito, noko noikõixõ noko ifitiro afe nõ Ìpaxanõ. Nãskarifiakĩ a judeofoma ato ifitiro chanĩmara faifono,” ixõ Pedro ato yoini.

<sup>12</sup> Nãskakẽ anã tsoa tooxinima, ato nikakani. Akka Pablo feta Bernabé ato yoinifo a Niospa atoõxõ afama mĩshtifo faa, judeofoma mẽraxõ.

<sup>13</sup> Mã yoikĩ xateafono, Santiagori ato yoini iskafakĩ: “Efe yora mĩshtichi, eari nikakapo ã mato yoinõ.

<sup>14</sup> Simón Pedro noko yoyiamea Epa Niospa a judeofoma ato noikĩ mã ato katoa ãfe yorafo inõfo ixõ noko yoyiamea.

<sup>15</sup> Nãnorikõi a inõpokoai yoikakĩ a Niosnoa yoimisfãfe kenenifo. Iskafakĩ yoinifo na kirika ke-neano:

<sup>16</sup> Nãskata ã anã oxii a David ãfe kaifãfe ea anã shinãtama chaka shinãifono, ato chaka soaxoxiki. Ato õiti fepeaxosharayanã isharakõinõfo ea anã Ifofakanax.

<sup>17</sup> Ea õikakĩ fetsafãferi ea fenanõfo nã maitio ikafo feta nã ã ato katoafãfe ixõ Epa Niospa yoini.

<sup>18</sup> Nōko Ifāfe afetiāma afama mīshti tāpiyoni, ixō aōnoa yoikī kenenifo.

<sup>19</sup> “Nāskakē ē shinākī iskafai, nōko kaifāfema Nios Ifofapaiyaifono nō ato afara fetsa kerexkai antiroma.

<sup>20</sup> Askatamaroko nō ato kirika kenexō fomanō iskafaki yoikī:

Na nōko niosra ikaxō afara onifakaxō nami ināfo piyamakāfe. Askatari māto āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakafo āfe imi foyamaito piyamakāfe, āfe imiri ayayamakāfe, ixō nō ato kirika kenexō fomanō judeofoma.

<sup>21</sup> Nā taeyoi ato yoipaonifo keskafakī, iskaratiāri pexefo anoxō a Moisés ato yoipaoni keskafakī ato yoikani. Mēxotaima ichanāti pexe mēraxō pena tenetitīa nā kirika anemisfo.”

### *A judeofoma ato kirika kenexō fomanifo*

<sup>22</sup> Nāskakata a Jesúsxō ato yoimisfāfe a ato kexemisfāferi a Nios Ifofaafāferi shinānifo a Nios Ifofaa fetsafo katoxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo.

<sup>23</sup> Nāskakaxō mā foaifono ato kirika keneni inānifo ato foxotanōfo, iskafakī ato yoikaxō:

Nōfi Jesúsxō āfe meka yoikatsaxakī, ato kexemisfo feta a Jesús Ifofaafō nō mato kirika kenexō fomai, mā tāpinō. Efe yora mīshtichi, mā nōko kaifoyamafekē nō mato meka shara fomai,

Antioquía anoa fomata Siria anoa fomata Cilicia anoa fomata nō mato fai.

<sup>24</sup> Mā nō tāpia yora fetsafo nonoax foitafo nō ato nīchiamafiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiaifono mā ato tāpipai.

<sup>25</sup> Nāskakē ichanāxō nō shinā feronāfake fet-safo katoxiki noko anoax fokaxō mato ōitanōfo. A nō ato noiai Bernabé yafi Pablo nō katoa.

<sup>26</sup> Nā Bernabé feta Pablo nōko Ifo Jesucristoōnoa ato yoipaifiaifono ato retepaimisfo ato nikakaspakakī.

<sup>27</sup> Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskafakī.

<sup>28</sup> Nā Niospa Yōshi Sharapa shināi keskafakī nānorikōi nō shināi. Afaa fetsa nō mato yoipaima. Akka nā sharafinakōia nō mato yoipai mā nikanō:

<sup>29</sup> Na nōko niosra ikaxō afara onifakaxō yoinā retexō ināfo piyamakāfe. Askatari āfe imi ayayamakāfe. Yoinā ina fakaxō tetoxakafo āfe imi foyamaito piyamakāfe. Askatari mātō āfima chotayamakāfe, kērofāferi āto fenema chotamayamanōfo. Akka nā nō mato yoiai anori mā nikasharakōiax, mā isharakōikai. Nā tii nō mato yoi na kirikaki kenexō, ixō ato yoinifo.

<sup>30</sup> Nāskakaxō Jerusalén anoxō ato nīchiafono Antioquía ano fonifo. Mā fokaxō a Nios Ifofaafo ato ichanāfakaxō kirika kenea ato inānifo.

<sup>31</sup> A Nios Ifofaafāfe kirika anexō ōikani, ini-maifinakōinifo, “Aicho, noko kirika kenexō manamakakī noko inimamasharakōikani,” ikanax.

<sup>32</sup> Judas yafi Silas Niospa ato shinãmanaino Niospa meka tãpikaxõ Niosnoa meka shara ato yoikakĩ ato inimakõiyã ato nikamasharakõinifo ãto mekapa a Nios Ifofaafõ.

<sup>33</sup> Nã Antioquía ano ato fe iyopaonifo. Nãno ato fe ikafono nã Nios Ifofaafãfe ato nĩchinifo iskafakĩ ato yoiyanã: “Tanaima fosharatakãfe,” ato faifono, tanaimakõi fosharakõinifo a anoxõ ato nĩchiameafõ ano.

<sup>34</sup> Akka Silas anã Jerusalén ano kanima nãno ato fe nēteni. Judas fisti kani.

<sup>35</sup> Akka Pablo fe Bernabéri fonifoma, Antioquía ano nētenifo anoxõ fetsafo feta nõko Ifoõnoa meka shara yoixikakĩ.

*Pablo afianã kani Jesúsnoa meka shara pexefo tii ari ato yoikai*

<sup>36</sup> Mã askakãta Pablo Bernabé yoini iskafakĩ: “A Nios Ifofaafõ nõ anã ato õikanõ fokãfe pexe rasi anoafõ a nõko Ifoõnoa meka shara nõ ato yoikĩ taefaniano afeskax ikafomãki.”

<sup>37</sup> Bernabé Juan iyopaini ato fe kanõ, nã Juan ãfe ane fetsa Marcos ipaoni.

<sup>38</sup> Akka Pablo iyokaspani. Nã Marcosmãi Panfilia anoax ato makinoax nēteyameano, ato feta yonokaspakĩ.

<sup>39</sup> Askai feratenãkanax anoax paxkanãfainifo. Bernabé Marcos Chipre ano iyoikai kanõanãfãne nanekaini.

<sup>40</sup> Akka Pablo Silas ifini afe kaxiki, afeta Niospa meka shara ato yoi axiki. Askaito õikakĩ a Jesús Ifofamisfãfe ato Nios kĩfixonifo fosharakõitanõfo Niospa ato kexesharanõ.

41 Mā fokakī Siria yafi Cilicia anoafō Jesúsnoa meka shara ato yoifofāsafanifo, a Nios Ifofaafāfe Jesúsnoa tāpisharakōinōfo inimasharaxikakī.

## 16

*Timoteo ato fe kani Pablo feta Silaspa Niospa meka sharaōnoa ato yoikai foaifono*

1 Pablo fe Silas pe xe rasi Derbe ano nokonifo, nānoax Listra ano fonifo. Nānoa Nios Ifofaa fetsa āfe ane Timoteo fichinifo. Āfe afa Judea kēro ini, Nios Ifofa, akka āfe apa griego ini.

2 Nā Nios Ifofaafāfe Listra anoxō Iconio anoafāferi, “Na Timoteo feronāfake sharakōira,” fanifo.

3 Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe meka fayamanōfo, māmāi tāpikaxō Timoteo āfe apamāi griegokē.

4 Askata mā fokakī a pe xe rasi anoafō a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexemisfāfe Jerusalén anoxō ato yoitafo anori.

5 Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

*Pablo namakē ōia keskara fani feronāfake Macedonia anoa*

6 Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipaifiaifono. Nāskakē Frigia yafi Galacia fiñōfainifo.

7 Fokanax Misia mai xatea ano nokonifo. Nānoxō Bitinia ano fopaikakī shinānifo, ari

fopaiyaifono Jesús āfe Yōshi Sharapa ato nīchikaspani.

<sup>8</sup> Nāškakē Misia finōfaini fokanax Troas ano nokonifo.

<sup>9</sup> Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini.

<sup>10</sup> Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

### *Pablo fe Silas Filipos ano inifo*

<sup>11</sup> Nā Troas anoax nō kanōanāfānē nanekaini īamāfā nakirafe mai toomāfā ano kai āfe ane Samotracia ano. Nānoax kaax pena fetsa Neāpolis ano nō nokoni.

<sup>12</sup> Nānoax nō anā kani Filipos ano. Nā Filipos ano romanō xanīfokōifo ipaonifo nānoa āto pexe rasi sharafinakōia ini, nā Macedonia mai ano. Nāno nō oxa ranāyoni.

<sup>13</sup> Nānoax pena tenetitīa pexe rasi anoax nō tsekekainikax faka ketokonō nō kani, nō shinā anoxō judeofāfe Nios kīfikanira ixō. Nāno tsaioxō Niosnoa meka shara kērofo nō yoini ano ichanāfono.

<sup>14</sup> Nānoa fetsa āfe ane Lidia ini pexe rasi Tiatira anoa. Nā kēromā sama fexta nana sharakōi ato minimis ini. Askatari Nios shinākōimis. Nāskaxō Pablo Jesúsnoa yoiaito nikakōisharaito ōikī nōko Ifāfe āfe ōiti fepeaxosharakōini.

<sup>15</sup> Nāskaito ōikī afe yorafoya maotisafanifo faka mēra ikimakī. Nāskaxō noko yoini iskafakī: “Mā ea iskafaikai, mī nōko Ifo ifofaki mā ea faikai, ēfe

pexe ano oxai fekāfe,” noko fani. Noko askafaino nō nēteyoni.

<sup>16</sup> Nāskata pena fetsa a Nios kīfimisfo ano nō kaino nāno nokoki xomaya nokoni niafaka chaka a mēra naneano. Nāato ato ōnāxomis ini. Āto inakōima ini, āa ato onāxomis. Aōxō kori ichapa fimisfo ini.

<sup>17</sup> Nā xomayato noko chīfafaini Pablo fe nō kaino fāsikōi mekayanā noko yoifoni iskafakī: “Na feronāfakefofi Nios nā keyokōi finōato āfe inakōifoki. Afeskax nō Nios fe ipaxatiromāki noko yoi feafo,” ixō yoini.

<sup>18</sup> Pena tii noko askafafofāsa fani. Noko askafaito Pablo mā fekaxtexō anā teneyamakī, ifiakekafā nā niafaka yōshi chaka xomaya mēra nanekē iskafani: “Jesucristoōxō ẽ mia yoikai na xomaya makinoax tsekekaitāfe,” fani. Askafaino a makinoax niafaka chaka tsekekaini.

<sup>19</sup> Pablo askafaito ōikakī, akka a xomayato āfe ifofāfe shināchakakōinifo anā afaakema, anākairoko aōxō kori fikani. Nāskakaxō akiki ōitifishkikakī Pablo yafi Silas achikaxō xanīfo finakōia ano iy-onifo.

<sup>20</sup> Nāskakaxō xanīfofo ano ato iyokaxō iskafakī ato yoinifo: “Na judeo rafeta nōko pexe rasi anoa ato chakafakī mekafakani.

<sup>21</sup> Nō mato yoisharaira ikaxō nā imisfo keskapaikī anori ato yoipaikani. Akka nōa nō chanīpaima, askara yoikī nō feyafaima nōmāi romanōfoxō,” ixō ato xanīfofo yoinifo.

<sup>22</sup> Ato askafafāfe nikakani yorafā rasi atoki ōitifishkinifo Pablo yafi Silaski. Nāskakaxō āto xanīfofofāfē ato yoinifo ato rapati fīakaxō ato chati koshanōfo.



<sup>23</sup> Ato koshakĩ finakaxõ karaxa mēra ato iki-manifo. Nāskakaxõ a karaxa kexea yoinifo ato kexesharakõinõ tsekeyamanõfo.

<sup>24</sup> Yoikĩ askafaifāfe nikakĩ, a karaxa kexemisto oke mēra chaikõi ato ikimaxõ tafara rafe oyatamaxõ ato tsāoni.

<sup>25</sup> Ato askafafono Pablo fe Silas yame-nakekafanaino Epa Nios kīfiyanā fanāinifo. Askaifono a ato fe karaxa mēra ikafāfe ato nikanifo.

<sup>26</sup> Nāskaifono fāsikõi mai naya naya ikĩ, nā karaxa pexe simĩto posa posa akõini. Nāskafaino āfe fepotifo fepekemei fetseni. Nāskaino a karaxa mēra ikafo cadenās mepekemei fetsenifo.

<sup>27</sup> Askaino a karaxa kexea moinākfā õia mā karaxa āfe fepoti fepekemei fetsea õini. Askaito āfe espada tsekata āa retemepaini, mā tsekeafora ixõ shināi.

<sup>28</sup> Askaito Pablo fāsikõi yoini iskafakĩ: “Mīa rete-meyamafe. Nõ faki kaamaki,” faito nikakĩ.

<sup>29</sup> A karaxa kexeato āfe soraro fētsa, “Ea kirosĩ otaxõ fexõfe,” fani. Mā fexoano koshikõi ichoni choayanā ratei, nāskax Pablo fe Silas niafono ato nāmā ratokonõ mai chachipakefõfāni.

<sup>30</sup> Nāskata fininākāfe mā ato kaimaxõ ato yõkani iskafakĩ: “¿Afeskaxõ ēfe chaka ě soatiromē Nios fe ipaxakĩ?” ixõ ato yõkani.

<sup>31</sup> Ato askafaito nikakakĩ kemanifo iskafakakĩ: “Nõko Ifo Jesucristo chanĩmara fafe Ifokõi faax mefe yorafo fe mĩ afe nīpanakakĩ,” fanifo.

<sup>32</sup> Nāskakaxõ nõko Ifoõnoa meka shara yoinifo, a afe ikafori āfe pexe mēranoa ato yoinifo.

<sup>33</sup> Ato askafaifono nā fakish fistichi nā karaxa kexemisto a ato koshafõ ano ato fāka chokani. Ato

askafaino āfe āfiyafi āfe fakefoya ato maotisafanifo, ato faka mēra ikimapakekakī Jesús chanīmara faifono.

<sup>34</sup> Nāskaxō āfe pexe ari ato iyoxō ato pimani. Nāskax āfe āfi fe āfe fakefo fe inimakōini Nios chanīmara fakōikanax.

<sup>35</sup> Nāskata penama xanīfofofāfe āto sorarofono nīchinifo a karaxa kexeafono ato yoitanōfo Pablo yafi Silas ato kāimanōfo.

<sup>36</sup> Nā karaxa kexeato Pablo yoini iskafakī: “Xanīfofofāfe ea yoiafo ē mato kāimanō. Mā mā tanaima kasharatiro,” faino,

<sup>37</sup> Pablo a ato kexeafono yoini iskafakī: “Nōri romanōfiano noko koshaketsafo yorafāfe ferotai, noko yōkasharakaxoma. Nāskakaxō noko karaxa mēra ikimanafo. Akka, ¿afeskakī one mā noko kāimapaimē? Āakōi noko kāimani fenōfo ato yoitakāfe,” Pablo ato fani.

<sup>38</sup> Ato askafaito nikakakī mā fokaxō sorarofāfe ato xanīfofo yoinifo. Ato yoiaifono nikakani ratenifo: “Nōri romānōfora,” ato faifāfe nikakanax.

<sup>39</sup> Ato askafaifono xanīfofo mā fokaxō ato iskafanifo, Pablo yafi Silas: “Nō mato tāpiama māri romanōfo fekē nō mato koshaketsaxō karaxa mēra nō mato ikimana. Na karaxa mēranoax kāikāfe, nōko pexe rasi anoax fōtaxikakī,” ato fanifo.

<sup>40</sup> Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofafo Jesúsnoa meka shara ato yoikakī ato inimakōinifo. Nāato yoikī askafakanax ato makinoax fonifo.

## 17

*Tesalónica anoax mekai fetsenifo*

<sup>1</sup> Pablo fe Silas mã fokakĩ, Anfípõlis yafi Apolonia finõfãikanax, Tesalónica ano nokonifo. Nã Tesalónica ano judeofãfe ichanãti pexe ini.

<sup>2</sup> Pablo nã imis keskai pena tenetitã ichanãti pexe mẽra kapaoni. Tres simãnã anoxõ ani, anoax ato fe feratenãyanã a kirika ano Niospa meka kenifoõnoa ato yoiyãna.

<sup>3</sup> Anoxõ ato yoini: “A Cristo omiskõiax nani. Mã nafiakẽ anã Epa Niospa otoani. Nã Jesúsnoa ẽ mato yoikai nãfi Cristoki,” ixõ Pablo ato yoini.

<sup>4</sup> Ato askafaifãfe nikakakĩ atiri judeofãfe Jesús chanĩmara fanifo. Mã Jesús chanĩmara fakanax ato fe rafenifo. Askatari griegofãferi Nios chanĩmara fakaxõ Nios fãsi sharakõi fanifo, nã kẽrofo xanĩfofo feta.

<sup>5</sup> Askaifãfe õikani judeofo noko anã nikakanimaraka ikanax, Pablo yafi Silas mepaikani õitifishkinifo. Nãskakaxõ a yora xani chakafo ato fenaifokani fonifo, Pablo yafi Silas chakafakakĩ mekafanõfo, fetsafãfe pexefo tii anoxõ ato nikanõfo. Nãskakanax Jasón pexe ano fonifo Pablo yafi Silas fenaifokani, ato kãimaxikakĩ yorafãfe ato omiskõimanõfo.

<sup>6</sup> Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxõ ãto xanĩfofo ano ato iyonifo. Mã ato iyokaxõ fãsikõi ato iskafanifo: “Na feronãfakẽfãfe fanĩma mĩshtixõ ato chakafafõfãsafamisfo. Akka mã noko ano feafo.

<sup>7</sup> Na Jasón ãfe pexe mẽra ato ikimana. Nafãfe a romanõ xanĩfãfe yoimis anori anã nikakanima. Akka nãno nõko xanĩfo fetsa ãfe ane Jesús ikani,” ixõ ato yoinifo.

<sup>8</sup> Ato askafaifãfe nikakani xanĩfofo õitifishkikĩ

metsamanifo, noko anã nikakanimara ikanax.

<sup>9</sup> Akka Jasón feta fetsafãfe a xanĩfofo ato kori inãfono ato kãimanifo.

*Pablo fe Silas Berea ano fonifo*

<sup>10</sup> Nãskakata fakishi Pablo fe Silas Berea ano fotanõfo koshikõi ato nĩchinifo. Mã Berea ano nokokanax judeofãfe ichanãti pexe mēra ikifainifo.

<sup>11</sup> Nã judeofãfe Pablo feta Silaspa ato yoiãfono ato nikakõipainifo, Tesalónica anoafu keskara inifoma. Ato nikasharapaikõikakĩ Niospa meka shara nikakõinifo. Nãskakata pena tii kirika fepekaxõ õinifo a ato yoiãfo keskara chanĩmamãkĩ.

<sup>12</sup> Nãskakē judeofãfe Jesúsnoa chanĩmara fakõinifo. Askatari griegofãferi chanĩmara fakõinifo. Kērofãferi nikakõinifo a feronãfakefãfe nikaifo keskafakĩ.

<sup>13</sup> Akka judeofãfe Tesalónica anoxõ nikanifo Pablo Niosnoa meka shara Berea anoafu ato yoiãto. Nãskakanax Berea ari fonifo, mã ari fokaxõ ato yoinifo Pablo mekafakĩ chakafanõfo.

<sup>14</sup> Ato askafãfono, akka a Jesús Ifofamisfãfe Pablo koshikõi katanõ nĩchinifo fakafã kesemē ano. Akka Timoteo fe Silas fonifoma. Berea ano nētenifo.

<sup>15</sup> Akka a Pablo fe fofãifo, afe fonifo pexe rasi Atenas ano. Nãnoax anã feãfono Pablo ato yoini iskafakĩ: “Timoteo yafi Silas ea ato yoixotakãfe koshi ekeki fenõfo,” ixõ ato yoini.

*Pablo Atenas ano ini*

<sup>16</sup> Pablo Timoteo yafi Silas Atenas anoxõ ato manayanã õia Atenas anoxõ afarafo ichapakõifo onifakaxõ, “Na nõko niosra,” faifãfe õi. ãfe õiti mēraxõ shinãchakakõini.

17 Nāskakē Pablo nā judeofāfe ichanāti pexe mēranoax judeofo fe a judeofoma fe a Nios sharara faifo fe yoināni. Nāskatari a pexe emāiti niax yoināifo mēxotaima Pablo Jesúsnoa ato yoini.

18 Ato yoiaino yora fetsafo akiki fenifo afe feratenāxikaki. Nāfāfe shinānifo iskakakī: “Nā nō apaiyai keskafakī nō atiro noko inimamanō,” ixō shinānifo. Nāfāfe āto anefo epicureofo. Ranāri iskanifo: “Afara afeskara afiaino nō tenetiro,” ixō shinānifo. Nāfāfe āto anefo estóicofo. Nāfo epicureofo fe estóicofo Pablo fe feratenānifo. Iskakakī yoinifo: “Na mekakī finamisto ¿afaa noko yoipaimē?” ixō yoiaifono, fetsafāferi iskafanifo: “Nios fetsafoōnoa noko yoipai rakikīa,” ixō yoinifo. Nāskafakī fetsanifo. Pablo Jesúsnoa meka shara ato yoifiaito, mā Jesús nafiax anā otoyamea ixō ato yoifiaito nikakaspakakī.

19 Nāskakaxō Areópago ano Pablo iyonifo a anoax mēxotaima ichanāxaxō afarafo yoimisfo ano. Nānoxō yōkanifo iskafakakī: “Nō tāpinō na mī yoiai anori meka fenakōiki noko yoife.

20 Na mī noko yoiai anori nō nikamismaki. Afaa ikamākī noko yoife nō tāpinō,” fanifo.

21 Nā Atenas anoafo feta yora fetsafāfe anoxō ōikakī nikapaikōinifo a nikaifo keskara ato yoixikakī.

22 Nāskaxō nā ichanāmisfo āfe ane Areópago anoxō Pablo ato nēxpakīa niinānkāfe ato yoini: “Atenas anoafāfe, ea nikakapo, mē mato ōi mā Niosnoa nikapaikōiaito tāpipaikōiyanā.

23 Nā mā nios kīfimis ano kafasakī mē ōia. Nānoa ē fichia na nōko niosra ixō mā afara onifanixakī mā akiki kenekī iskafakē: ‘Nō na nios ōimisma,’ ixō

mã aõnoa yoikĩ keneni. Nã nios õikatsaxakĩma mã kĩfimis, nãõnoa ẽ mato yoi.

<sup>24</sup> “Nã Niospa keyokõi onifani, afama mĩshtifo nai mẽranoafoya mai anoafõ onifani ato Ifo ixikĩ. Nã Nios yorafãfe pexe faafõ mẽra ikama.

<sup>25</sup> Askatari ea afaa axokãfe ikima. Akka nãato keyokõi noko nima. Nõ xakainõ noko nefefaxoni, afara fetsafori ani.

<sup>26</sup> “Askata feronãfake fisti onifakĩ taefani, nãnoax nã maniafo tii kainõfo, nã mai tio ano ipaxakakĩ. Nãskaxõ ato yoini, afe tii xinia akanimãkai fanĩra ikaxõ.

<sup>27</sup> Nãskakẽ Niospa yorafo onifani keyokõichi fenanõfo tãpipaikakĩ. Akka fenakĩ fichitirofo. Chanĩma, Nios chai ikama, noko chai faama.

<sup>28</sup> Akka Niosnoax nõ nia. Akka Niosyamakẽkai nõ nikeranama. Akka nã mato tãpimamisfãfe kenenifo iskafakakĩ: ‘Nõ Niospa fenakõifo,’ ixõ yoinifo.

<sup>29</sup> Akka nõ Niospa fenafofiãxõ, nõ shinãtiroma Nios na yorafãfe afarafo onifaafõ keskara inõ, ãa shinãxõ yorafãfe onifaafõ keskara.

<sup>30</sup> Askafiaifonokai Niospa ato afeska fanima. Akka iskaratĩa keyokõi ato yoi ãto chaka xatekaxõ chanĩmara fanõfo.

<sup>31</sup> Nãskakẽ Niospa tãpiyoni afetĩa ato ichanãfaimãkai, a ato omiskõimanaitĩa, fatõfo sharafomãkĩ askayamai fatõfori chakafomãkĩ. Nã feronãfake katonioxõ ato askafaxii. Akka mã nafiakẽ Āpa otõfaito keyokõichi õinifo,” ato faito,

<sup>32</sup> a Jesús naax otoita nikakani, akiki kaxemet-samanifo. Ranãrito yoikĩ iskafanifo: “Mã nõ

nikakĩ a mĩ noko yoiaito, anã pena fetsa noko yoifaixãfe,” fanifo.

<sup>33</sup> Askafaifono a ichanãfo anoax Pablo kani.

<sup>34</sup> Akka Pablo mã kaino atiri afe fonifo Jesús chanĩmara fakanax. Dionisiori nãno ato fe ini, nã Dionisio Areópago anoxõ ato fe ichanãxõ ato yoimis ini. Kėrori nãno ato fe ini, ãfe ane Dámaris, kėro fetsafori ano ato fe inifo.

## 18

### *Pablo Corinto ano ini*

<sup>1</sup> Nãskata Pablo Atenas anoax kaax Corinto ano nokoni.

<sup>2</sup> Nãnoa feronãfake ãfe ane Aquilaki nokoni. Nã feronãfake Ponto pexe rasi anoa ini. Rama Italia anoax ãfe ãfi Priscila fe nokoita ini, nã Italia anoa ãto xanĩfãfe ãfe ane Claudio ato potaitano. Ato iskafayanã na judeofo Roma anoax fõtanõfo ixõ. Nãskakẽ Pablo ato õikai kani.

<sup>3</sup> Nã Pablo nã akaifo keskafakĩ akairi pexe fakãki tãpia ini, karapa pexe fakĩ. Nãskakẽ nãno ato fe nēteni, ato feta yonoxiki.

<sup>4</sup> Nãskakẽ nãnoax mēxotaima pena tenetitĩa ichanãti pexe mēra kapaoni. Anoxõ judeofoya a judeofoma ato Jesúsnoa meka shara nikamapai chanĩmara fanõfo.

<sup>5</sup> Akka Silas fe Timoteo mã Macedonia anoax akiki nokoafono Pablo Jesúsnoa meka shara judeofo ato yoifofãsafani: “Jesúsfi Cristoki Niospa katonĩ ãfe Fakekõĩ inõ,” ixõ ato yoini.

<sup>6</sup> Ato askafaito nikakakĩ judeofãfe Pablo iskafanifo: “Jesúskai Cristoma. Mĩa mĩ chanĩ,” fakaxõ Pablo ĩchaketsanifo. Askafaiãfe nikakĩ Pablo ãfe rapatiõnoa atoki mapo taa taani mã

anoax kakī ori fetsa ari ato iskafafāini: “Ē Niospa meka mato yoipaiſiaito mā ea nikakaspai. Māto shināmā mā iki. Nāskax naax mā Nios fe nīpanakama. Ē mato yoisharapaiſiaito mā ea nikakaspai. Nāskakē na judeofoma ari ē kai ariafo ato yoixiki,” ixō Pablo ato yoini.

<sup>7</sup> Nāato askafata āto ichanāti pexe anoax kāikaini feronāfake āfe ane Ticio Justo pexe ano kani. Nāato Epa Nios shinākōikī kīfipaoni. Nā ato ichanāti pexe chaima ika ini.

<sup>8</sup> Feronāfake Crispa ichanāti pexe anoā āto xanīfo ini. Nāato āfe āfi feta āfe fakefoyaō nōko Ifo nikakōiyānā chanīmara fani. Askatari nā Corinto anoafāferi chanīmara fakōinifo, Pablo Jesúsnoa meka shara ato yoiaito. Nāskakē chanīmara faifono ato maotisafakī faka mēra ato ikimapakenifo.

<sup>9</sup> Nāskano fakish fetsa Pablo namakē ōia fani, nōko Ifāfe yoiaito iskafakī: “Ratekima mēxotaima ēfe meka sharaōnoa ato yoi xateyamafe.

<sup>10</sup> Ē mefe ikaki mia tsōa afeska faima kiki. Na pexe rasi ano efe yorafo ichapa ikafokī,” ixō yoini.

<sup>11</sup> Nāskakē Pablo Corinto ano nēteni. Anoxō xinia fisti finōmata oxe seis ani. Nānoxō mēxotaima Niospa meka ato yoipaoni.

<sup>12</sup> Akka Acaya mai anoax Galión xanīfo finakōia ini. Nānox judeofo ichanānifo Pablo achixikāki. Mā achikaxō āto xanīfo finakōia ano iyonifo.

<sup>13</sup> Iskafakī āto xanīfo yoinifo: “Na feronāfāke ato pārafōfāsafai, yoipai mā Nios kīfiki iskafatiro ixō. A Moisés yoini anori ato yoima, fakirira ato yoi,” ixō yoinifo.

<sup>14</sup> Pablo mā ato kemapaiyaito nā xanīfo Galión judeofo yoini iskafakī: “Na feronāfāke afara



chakafakē, askayamakī ato retekē mā ea yoiaito ē mato nikakerana.

<sup>15</sup> Akka nā mātō xinifāfe yoipaonifo keskaraōnoa mā yoita, a mātō kaifāfe āfe aneōnoa yoita, a Moisés yoini keskaraōnoa mā yoi. Akka nā mā apaiyai keskafakāfe, ē aōnoa afaa tāpipaimakai.

<sup>16</sup> Nāskakē nonoax fotakāfe,” Galión xanīfāfe ato fani.

<sup>17</sup> Ato askafa fokaxō Sóstenes achinifo nā ichanāti pexe anoa xanīfo. Mā achikaxō nāri seteketsanifo xanīfāfe ferotaifi. Akka nā xanīfo Galión aō rafanā inima.

*Pablo anā Antioquía ano kani Niosnoa meka shara ato yoikai. Taeyoi kai rafenixakī anā kai fistini*

<sup>18</sup> Pablo Corinto ano oxaranāyoni. Nānoax a Nios Ifofaafo makinoax kani Priscila fe Aquila afe fonifo. Nāskakata kanōnāfānē nanefainifo Siria mai ano fokani. Mā fokanax akka Cencrea anoax kanōanāfā mēra nanexoma Pablo ato testemayoni. Akka Pablo Nios yoiyoni: “Ē mīōxō afara axii, mī ea ōiaino,” ixō yoini. Akka mā axō ato testemani tāpinōfo. Ē Nios afara afeskarafaxōara ikax.

<sup>19</sup> Nāskata mā fokanax Efeso ano nokonifo. Nāno Pablo ato nīchifaini Aquila yafi Priscila, ichanāti pexe mēra kakī nāanoax judeofo ichanāfono ato fe yoināxiki.

<sup>20</sup> Nānoxō nētefapainifo. “Kayamafe nono nofe iyofe,” fanifo. Askafaifono akka Pablo nētekaspani.

<sup>21</sup> “Maa, ē nētetiroma, mē kai,” ato fani iskafakī ato yoiyanā: “Epa Niospa ea nīchiaino anā oxō ē mato ōiyoxii.”

Nãato askafata Pablo kanõanãfãñē naneinãkafani Efeso anoax mã kai.

<sup>22</sup> Mã Cesarea ano nokoax, Jerusalén ano kani a Nios Ifofaafo ato yoisharaikai. Mã ato yoita anã kani Antioquía ano.

<sup>23</sup> Nãno ato fe ikatsaxakĩ, nãnoax anã kani Niospa meka sharaõnoa ato yoifofãsafaikai. Galacia anoxõ ato yoikĩ taefata, Frigia anoxori ato yoini. A Nios Ifofaafo ato inimamakõini, Niosnoa meka shara ato yoikĩ.

*Apolos Efeso anoafu Niosõnoa meka shara ato yoini*

<sup>24</sup> Nãskaifono Efeso ano judeo fisti nokoni ãfe ane Apolos pexe rasi Alejandría anoa ini. Nãato Niospa meka yoikĩ kirika kenenifo tãpikõia ini, xafakĩakõi ato yoimis.

<sup>25</sup> Nãato nõko Ifo Jesúsnoa tãpikõixõ ato yoini, inimakõikai nã tãpia anori xafakĩakõi Jesúsnoa ato yoini. Askafixõ Jesúsnoa tãpisharaxõ nã Juan ato maotisafakĩ faka mēra ato ikimani nã fisti tãpia ini.

<sup>26</sup> Nãskata Apolos ichanãti pexe mēraxõ ranotamakõi ato yoiaito nikakĩ. Aquila feta Priscila kenakaxõ ori iyokaxõ Niospa meka tãpimasharakõinifo nikasharakõinõ.

<sup>27</sup> Nãskakē Apolos Acaya mai ano kapaiyaito nikakĩ a Nios Ifofaafãfe iskafanifo: “Nõ a Jesús Ifofamisfo kirika kenexõ fomanõ mia ifisharakõinõfo,” ixõ yoinifo. Apolos mã Acaya mai ano kaxõ, ato yoisharakõini. Ato askafaito nikakani Niosnoax inimasharakõinifo.

<sup>28</sup> Nãnoxõ õiaifo judeofo Apolos yoini: “Jesús Niospa Fakemara,” faifono. Akka nã kirika ke-neaõxõ Apolos ato yoini iskafakĩ: “Nã nõ manai

Cristofi Niospa Fakeki,” ixõ xafakĩakõi ato yoiaito tsõa kemanima.

## 19

### *Pablo Efeso ano oni*

<sup>1</sup> Apolos Corinto ano iyoano, mãchi keya ari fai tãpiato kaax Efeso ano Pablo nokoni. Nãnoa Nios Ifofamisfo fichitoshini.

<sup>2</sup> “¿Mã Nios Ifofaxõ Niospa Yõshi Shara mato mēra mã nanenimē?” ixõ Pablo ato yõkaito, kemanifo iskafakakĩ: “Maa, nõkai aõnoa afaa nikayomisma, Niospa Yõshi Sharakai nõ nikamisma,” fanifo.

<sup>3</sup> Askafaifãfe nikakĩ anã Pablo ato yõkani: “¿Afeskai mã maotisanimē?” ato faito, kemanifo iskafakakĩ: “Juan noko yoinino nõ ini,” ixõ yoinifo.

<sup>4</sup> Askafaifono anã Pablo ato yoini iskafakĩ: “Juan ato maotisafani afara chakafakatsaxakakĩ ãto chaka xatepaiyaifono Nios Ifofapaikakĩ. Iskafakĩ ato yoiyanã a chipo oxiai nikakõisharaxikãfe ixõ ato yoini, Jesúsnoa yoikĩ,” ato Pablo fani.

<sup>5</sup> Pablo ato yoikĩ askafaino, nikakani nõko Ifo Jesús ãfe aneõnoax maotisanimifo fetsafãfe tãpinõfo.

<sup>6</sup> Askafaifono õikĩ Pablo ato mãmãpakeaino Niospa Yõshi Shara ato mēra naneni. Nãskakanax meka fetsapa mekai fetsenifo. Niosnoa meka shara nikakaxõ ato yoinifo.

<sup>7</sup> A ato mēra Niospa Yõshi Shara nanea, doce feronãfake ini.

<sup>8</sup> Nãskaifono Pablo nãno ato fe ikax mēxotaima ichanãti pexe mēra kapaoni. Anoxõ tres oxe ani. Niospa meka sharaõnoa ato yoiyanã ranotama, anoxõ Nios xanĩfoõnoa ato tãpimapaikõikĩ.

9 Ato askafafiaino atirifāfe nikakaspakakī yorafāfe ferotaiifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiaifono, Pablo ato makinoax kakī a Nios Ifofaafō ato iyonī, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni.

10 Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo.

11 Nāskakē Niospa Pabloōxō afama mīshtifo fakī ato ispani.

12 Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafo ato ramānifo. Ato askafaifono a isinī ikaifo fe a niafaka chaka naneafo sharai fet-senifo.

13 Nāskaifono atiri judeofāfe fofāsakakī niafaka chakafo yorafo makinoa pōtanifo pexefo tii fofāsakakī. Jesús āfe aneōxō niafaka chakafo yorafo makinoa ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

14 Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfixomisfāfe āto xanīfo ini.

15 Ato askafaifono a niafaka yōshi chaka yora mēra naneato ato kemani iskafakī: “Ē Jesús ōimis,

askatari Pablori ě tãpia. Akka, ¿mã tsoamẽ?” ato fata,

<sup>16</sup> nã niafaka yõshi chakayato ato rapati faxteyanã, fãsikõi ato achixõ ato seteketsayanã ato imi tofeni. Nãato askafakĩ fetsaino pexe mēranoax yorioma ichonifo.

<sup>17</sup> Nãato askafaano Efeso anoxõ judeofãfe yora fetsafo feta nikakani ratenifo. Nãskakaxõ, “Nõko Ifo Jesús fãsi sharakõi,” fanifo.

<sup>18</sup> Nãskakaxõ a Jesús chanĩmara famisfãfe fẽkaxõ a afara chakafapaoni xakakĩ yorafãfe ferotaifi yoinifo.

<sup>19</sup> Askatari a yõfe tãpiafãfe äto kirika fẽkaxõ yorafãfe ferotaifi koanifo, mã Jesús Ifofakaxõ. Nã kirika kene õiafo kopikõi ini, como cincuenta mil ini.

<sup>20</sup> Nãskakẽ nõko Ifãfe äfe mekashara nikaket-sanifo Jesús Ifofamisfãfe ato yoiaifãfe, äfe kerex sharaõxõ afama mĩshtifo fakakĩ.

<sup>21</sup> Nãskafata Pablo shinãni Macedonia yafi Acaya ano kaxiki. “Nãnoax Jerusalén ano ě kaikai, Jerusalén anoax Roma ano ě kaikai,” ixõ shinãni.

<sup>22</sup> Nãskaxõ a afeta yonomisfo rafe Macedonia ano ato nĩchini Timoteo yafi Erasto. Akka Pablo Asia ano nēteyoni.

### *Efeso anoax yorafo mekai fetsenifo*

<sup>23</sup> Nãskaifono nã Efeso anoafõ mekai fetsenifo: “Jesúsfi Niospa Fakekĩ aõnoax nõ Nios ari katiro,” Pablo ato faino,

<sup>24</sup> nãno feronãfake äfe ane Demetrio ini. Nãato yonokĩ afarafo kori exe keskara oxokõi onifapaoni. Nã feronãfake afara onifakĩ tãpikõia ini. Nãskaxõ këro õitsa onifani, na nõko niosra ixõ äfe

ane Artemisa. Ranãfaxõ këro õitsa fakĩ kafãshara mĩshtifo onifani. Nãskakẽ a afeta yonofaifãfe aõxõ kori ichapa fipaonifo.

<sup>25</sup> Nãskaxõ Demetrio ato ichanãfani, a afeta yonomisfo ato iskafayanã: “Efe yora mĩshtichi, mã mã tâpiakĩ nõko nios Artemisa yora keskara onifaxõ, aõxõ nõ kori ichapa fimiski.

<sup>26</sup> Akka mã mã õimis nikayanã, na Pablo ato yoifofãsafamis iskafakĩ: ‘Na yorafãfe niosra ixõ onifaafõ, akai niosma,’ ixõ ato yoi. Mã yora ichapafãfe chanĩmara fakõinafo ato yoiaito nikakakĩ. Na Efeso anoafos ato yoiaima, Asia mai anoafori ato yoimis.

<sup>27</sup> Na Pablo yoiai keskara mesekõi, ã shinãchakakõi. Anã noko tsõa kori inãyamaino nõ fenotiro, na nõko nios Artemisa anã tsõa kĩfitiroma, nã maitio ikafãfe Asia mai anoxõ kĩfimisfo. Askatari a nõko nios kĩfiti pexefã mẽranoax anã ichanãtirofoma,” ixõ Demetrio ato yoini.

<sup>28</sup> Demetrio ato askafaito nikakani Pabloki õitifishkiyanã fãsikõi yoinifo iskafakakĩ: “¡Na Artemisa Efesio anoafõ nã sharafinakõiafo, tsoa keskarama!” ikanax fãsikõi mekai fetsenifo.

<sup>29</sup> Nãskakanax pexe rasi anoax fekaxtei fetsenifo. Nãskakaxõ Gayo yafi Aristarco achinifo. Nã rafe Macedonia anoafõ inifo, Pablo fe feitafo. Nãskakaxõ a yora kaya ichanãfo ano ato iyonifo.

<sup>30</sup> Ato askafaifono Pablo ato mẽra ikipaini ar-ixõ yorafo yoixiki. Akka a Jesús Ifofaafãfe Pablo nĩchikaspanifo, “Mia retetirofoki,” ikaxõ.

<sup>31</sup> Askatari a Pablo fe rafemisfãfe, xanĩfofõfãfe Asia mai anoxõ ato yoinifo, Pablo yoitanõfo ato mẽra ikiyamanõ.

<sup>32</sup> Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārito tāpinifoma afeskai ichanāfomākī.

<sup>33</sup> Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifo ōiaifono ori nīxō ato yoitakāfe ikaxō. Nāskafaifono Alejandro niināka fā mēshaxō ato yoini iskafakī: “Mekayamakāfe, ē mato yoisharanō,” ixō Alejandro ato yoini.

<sup>34</sup> Akka mā tāpikaxō Alejandro judeokē, fāsikōi āa ranā mekai fetsenifo, iskakani: “Na Efeso anoafāfe āto Artemisa sharafinakōia,” ikaxō.

<sup>35</sup> Askaifāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskafakī: “Efesofo anoafāfe ea nikasharakāfe. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafo nai mēranoax pakeafori nō kexemis.

<sup>36</sup> Nāskakē āa chanīkanira tsoa itiroma. Nāskakē anā mekayamakāfe, afaa afeskafapaiyamakāfe shināsharaxoma.

<sup>37</sup> Akka na feronāfakefo mā ato efea afaa chakafayamafiafono, askatari na pexefā mēranoa tsōa afaa oneyamafiano, askatari na nōko nios Artemisa tsōa chakafakī mekafayamafiano mā ato efea.

<sup>38</sup> Akka na Demetrio afeta yonomisfo feta, a ato chakafapai xanīfofo ano ato iyotiro, anoxō ato yōkanō afaa chakafafomakī.

<sup>39</sup> Nāskaxō afara fetsa mā yoipaikī nā ichanāfo anoxō mā yoitiro.

<sup>40</sup> Mā iskaratīa ato chakafai keskafakī xanīfofofāfe nikaxō nokori askafatirofo. Na

yorafãfe afaa chakafayamafiamisfono, afeskakĩ mã yõachepeimẽ xanĩfofofãfe noko faifono nõ ato kematiroma,” ixõ a xanĩfo kenexomisto ato yoini.

<sup>41</sup> Ato yoikĩ askafata ato nĩchiaino fonifo.

## 20

### *Pablo Macedonia ano kata Grecia ariri kani*

<sup>1</sup> Mã mekakani nishpafono Pablo a Nios Ifofaafo kenani ato yoisharaxiki. Mã ato yoisharata, ato makinoax kani Macedonia ari kai.

<sup>2</sup> Mã kaxõ nãriafo Jesúsnoa meka shara ato yoifofãsafakĩ a Nios Ifofaafo ato inimamakõini. Nãskata Grecia ano nokoni.

<sup>3</sup> Nãnoxõ tres oxe ani anoax kanõanãfãnẽ Siria ano kapaikĩ, nikani judeofãfe kexeafono retepai kakĩ. Nãskakẽ fãi kakĩ, Macedonia anã finõfaini.

<sup>4</sup> Mã kaino feronãfake ranãri afe fonifo. A feronãfake fetsa ãfe ane Sópater Berea anoa ini. ãfe apa ane Pirro ini, Aristarcori ini, Segundori ini, nã Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tíquico fe Trófimo Asia mai anoa inifo. Nã tii Pablo fe fonifo.

<sup>5</sup> Nã tii rekẽ fokaxõ Troas anoxõ noko mananifo.

<sup>6</sup> Akka mã fista senẽano chipo nõ kani. Nã fistaĩa pãa faraxaxoma pimisfo ini. Nãskata Filipos anoax kanõanãfãnẽ nõ kai cinco nia mã nõ oxax Troas ano nõ atoki nokoni. Nãno nõ siete nia oxayoni ato fe.

### *Troas ano õikai Pablo kani*

<sup>7</sup> Nãskata mã pena nomĩkoaino nõ ichanãni pãa kaxke mĩshtixõ pixiki a Jesús noko nãxoyamea shinãkĩ. Anoxõ Pablo a Nios Ifofaafo yoini, mã penama kaxiki yamenake kafanaino ato yoikĩ xateni.



<sup>8</sup> Nãnoax pexe kene keya fomãkĩa anoax nõ ichanãni, a rãpari ichapa õtai fetsea anoax.

<sup>9</sup> Nãskaino naetapa ãfe ane Eutico pexe kene fomãkĩa ãfe naisti anori tsaoni. Pablo ato chaikõi yoiaino nã naetapa oxakatsaini. Nãskax mã oxachãi kaax pexe kene fomãkĩakõinoax pakeax nakẽ chishtoinĩfofãnifo.

<sup>10</sup> Nãskakẽ Pablo fotopakekafã chishtoinĩfofã nã naetapa ikõni, ato iskafakĩ yoiyanã: “Rateyama-kãfe, naamaki,” ato fani.

<sup>11</sup> Nãskafata anã pexe fomãkĩa Pablo mãpeiniĩfofãxõ ato pãa kaxkeketsaxoni ato feta pixiki. Nãskaxõ ato yoikĩ pena fani. Mã penano Pablo kani.

<sup>12</sup> Ato askafaino nã naetapa nafiax mã otokẽ afe yorafãfe xanẽnẽ iyonifo. Askafakĩ Pablo ato inimamakõini.

### *Troas anoax Pablo Mileto ano kani*

<sup>13</sup> Akka nõ kanõanãfãnẽ rekẽ kani, Aso anoxõ Pablo ifixiki. Akka noko iskafakĩ yoini: “Ë fãi kaikai rekẽ fokãfe,” ixõ noko yoini.

<sup>14</sup> Nã Aso anoa noko fichiax nofe feronãfãke kani. Nãskax Mitilene ano nõ nokoni.

<sup>15</sup> Nãskata nãnoax nõ tsekekainax pena fetsa Quío mai nõ finõfaini kaax pena fetsa Samos fai fototai nõ nokoni. Anã anoax kaax pena fetsa pexe rasi Mileto ano nõ nokoni.

<sup>16</sup> Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

*A Nios Ifofaafo ato kexemisfo Efeso anoafõ meka shara Pablo ato yoini*

17 Mileto anoxõ Pablo ato kenamani, Efeso anoxõ Nios Ifofaafo ato kexemisfo.

18 Mã feafono ato iskafani: “Mã mã ea õimis ã isharakõiaito nã ã oitachã. Na Asia mai anoxõ ã afaa afeska fama ã isharakõia Jesúsnoa meka shara mato yoi.

19 Mẽxotaima ã mato mẽra itiani, nõko Ifo yonoxoni. ã mato yoi ã oiatiani Nios mato Ifo sharafamapai. Askatari ea omiskõimanaifono ã omiskõimis judeofãfe ea askafaifono.

20 Akka ea askafafiaifono Jesúsnoa meka shara ã mato yoikĩ xateima. A meka sharakapafo ã mato yoimis. Ranotamakõ ã mato yoimis, ichanãti pexe anoxõ yoita a mãto pexekõifo anoxori ã mato yoimis.

21 Judeofo yoita a judeofomari mẽ yoimis ãto chaka xatekaxõ Nios Ifofanõfo nõko Ifo Jesucristori chanĩmara fakõinõfo.

22 “Akka iskaratĩa Jerusalén ano ã kai, Niospa Yõshi Sharapa ea nĩchiaino. ã tãpiama arixõ ea manafo ea afeskarafakani.

23 Akka mẽ tãpia Niospa Yõshi Sharapa ea yoiaito, pexe rasi anoxõ ea karaxa mẽra ikimakaxõ ea omiskõimakani.

24 Akka ea askafafiaifono ã shinãchakaima. Nã Epa Niospa ea amapaiyai keskara fisti ã shinã. Epa Niospa keyokõ yorafo noikõ na meka shara ato yoitãfe ea fani. Nã ea yoini keskara ã apai.

25 “ã mato mẽraxõ Nios xanĩfoõnoa ã mato yoimis. Akka mẽ tãpikõia anã mã ea õinakama.

26 Nãskakẽ ã mato yoipai. Na fetsafãfe ea nikakaspamisfo ã ato yoipaifaito tsõa ea nikamisma. Nãskax omiskõixikani. Nãskakẽ ã ato afeskafatiroma, mẽ ato yoimis.

27 Mē mato yoimis a Niospa fichipaiyai keskafakĩ ã mato yoikaspamisma.

28 Nãskakẽ kexemesharakãfe, a Nios Ifofaafori ato kexesharakãfe. Niospa Yõshi Sharapa mato ãkinãki, a Nios Ifofaafo mã ato kexesharanõ. Jesús nokoõnoax nai ãfe imi foniki.

29 Mē mato makinoax kaano, chipo a fanĩrira yoimisfo chakafo fekani mato fanĩrira yoipaikani. Oa poomãnã chaxo fichixõ pitiro keskafakĩ mato pãrapaikani mã anã Jesús shinãnõma.

30 Afianofi mã fetsa mã ranã mã pãranõnãxii nõ Niospa meka tãpiara ixõ mã ato pãraxii, a Nios Ifofaafãfe mato nikanõfo.

31 Kexemesharakõikãfe, akka shinãkapo. Tres xinia ã ani Niospa meka sharaõnoa mato yoikĩ. Penata yoita, fakishi yoikĩ ã mato famis, Niospa meka sharaõnoa ã mato yoi ã oiamis.

32 “Akka efe yora mĩshtichi, iskaratĩa ã Epa Nios kĩfi mato kexesharanõ, a mato noiai keskafakĩ ãfe meka shara mato mẽra nanenõ. Nãato ãfe kerex sharaõxõ ãfe meka shara mato inãtiro mato mẽra nanesharanõ askatari a yoiyoni keskafakĩ afe yorakõifo ato afara inãsharakõitiro afe ãpaxanõfo.

33 Ëakõi ã afaa fipaimisma, askatari ã mato kori yõkamisma, rapatiri ã tsoa yõkamisma.

34 Askatamaroko ãfe mifikõichi ã yonofaito mã mã õimis, a ã fichipaiyai fixiki, a efe ikafori ato inãxiki.

35 Mē mato õimamiski afeskaxõ mã yonotiromãki, a omiskõiaifo ato axosharayanã. Nõko Ifo Jesús ãfe meka sharaõnoa shinãyanã fetsafãfe noko afara inãino nõ inimatiro keskai, ‘Nõri fetsafo afara inãsharai nõ inimaifinakõitiro,’

ixō nōko Ifāfe noko yoini,” Pablo ato fani Efeso anoafō.

<sup>36</sup> Mā ato yoikī askafata ratokonō mai chachipakefofā Pablo ato Epa Nios kīfixoni.

<sup>37</sup> Anoax keyokōi oiayanā Pablo ikōketsayanā kokoketsanifo.

<sup>38</sup> Shināmitsakōinifo: “Ē anā mato ōinakamara,” ato faino, askakāta afe fakafā kesemē fonifo Pablo kaito ōifokani. Nāskax Pablo kanōanāfānē nanekaini mā kai.

## 21

### *Pablo Jerusalén ano kani*

<sup>1</sup> Anoa a Nios Ifofaafo nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni.

<sup>2</sup> Nā Pátara anoxō kanōanāfā nō fichini Fenicia ano kaino, nāo nō nanekaini.

<sup>3</sup> Kakī fakafā nakirafe Chipre mai toomāfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēranoa afama mīstifo māpemanifo.

<sup>4</sup> Nānoa a Nios Ifofaafo nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retepaikani kiki,” ixō yoinifo.

<sup>5</sup> Askafaifono mā siete nia finōta nō anoax kaino, keyokōi āto āfifō fe āto fakefo fe nofe fonifo pexe rasi pasotai. Nānoxō nā māshifā anoxō ratokonō mai chachipakefofā nō Epa Nios kīfini.

<sup>6</sup> Nāskata mā nō kakī nō ato yoisharaketsata, kanōanāfā mēra nō naneinākafani, akka atii anā fenifo āto pexe ano.

<sup>7</sup> Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios Ifofaafo fe nō ato fe yoināsharakōini, askatari nāno nō ato fe oxa fishtiyoni.

<sup>8</sup> Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoimis ini. A Jesús Ifofaaafē afetiāma Felipe ifinifo Jerusalén anoxō a piaifo ato paxkaxonō. Seis feronāfake fetsafoya Felipe ifinifo ato feta yononō. Nāato pexe ano nō nēteni.

<sup>9</sup> Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo.

<sup>10</sup> Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoimis ini, a inōpokoai yoikī.

<sup>11</sup> Mā noko ano nokoxō, Pablo āfe nanexemeti fīata, aō metexkere ita aō otekkere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

<sup>12</sup> Noko askafaito nikakī Cesarea anoafō feta, “Jerusalén ano kayamafe,” nō Pablo fani.

<sup>13</sup> Askafaifono Pablo noko kemani iskafakī: “¿Afeskakī mā oiayanā mā ea shināmitsamanimē? Mē itipinīshara ea nexayamakakī ea retekani Jerusalén anoxō, nōko Ifo Jesúsxō ea askafakani,” Pablo noko faito,

<sup>14</sup> nō anā afaa fanima noko nikayamaito.

Nāskaxō nō yoini iskafakī: “Nōko Ifāfe nā mia apaiyai keskafanō,” ixō nō yoini.

<sup>15</sup> Mā askata nō itipinī fani, nāskax nō Jerusalén ano kani.

<sup>16</sup> Nō kaino a Nios Ifofaafo ranāri nofe fonifo Cesarea anoax. Nāfāfe noko iyonifo feronāfake āfe ane Mnasón pexe ano, nā Mnasón Chipre anoa ini. Nāato afetiama Nios Ifofakī taefani. Nāskaxō āfe pexe anoxō noko ifini ano nō oxanō.

### *Pablo Santiago ōikai kani*

<sup>17</sup> Mā nō Jerusalén ano nokoano a nofeta Jesús Ifofamisfāfe noko ifinifo nokoki inimakōiyānā.

<sup>18</sup> Askata pena fetsa Pablo nofe kani Santiago ōikai. A Nios Ifofaafo ato kexemisfori nāno inifo.

<sup>19</sup> Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

<sup>20</sup> Ato yoiato nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesús chanīmara fafiakaxō, nāfāfe a Moisés yoini keskara nikapaikōimisfo.

<sup>21</sup> Nāfāfe yoiāfo judeofo a yora fetsafo mēra ikafo mī ato yoikē iskafaki: ‘A Moisés yoini keskara nikayamakāfe,’ ixō mī ato yoikē, ‘Askatari mātō fakefo foshki repa xateyamakāfe, askatari a mā imis keskai anā askayamakāfe,’ ixō mī ato yoimiskē.

<sup>22</sup> Akka, ¿nō afeskaimē, yorafāfe nikakani mā mī nono oano?

<sup>23</sup> Akka nã nõ mia yoiai keskafe. Na cuatro feronãfakefãfe Nios yoiafoki iskafakakĩ: ‘Epa Niosi, mĩ noko yoia keskai nõ askakõikai,’ ixõ yoiafoki.

<sup>24</sup> Akka na cuatro feronãfake fe Nios yoiti pexefã mẽra katãfe, nõ imis keskai ato fe ife mãto chaka soaxikakĩ. Mĩ ato kopifaxõfe mato testeaifono. Mĩ ato askafaito õikakĩ keyokõichi tãpitirofo a mĩõnoa yoiaifo ãa chanĩkani. Askatamaroko mĩri a Moisés yoini keskara mĩ nikakõimis.

<sup>25</sup> Akka a judeofofãfema a Jesús Ifofaafãfe mã chanĩmara fakõinafo. Akka mã nõ ato kirika kenexona iskafakĩ: ‘Nõ nami pitiroma na nõko niosra ixõ afara onifakaxõ fetsafãfe inãfono. Askatari yoinãfo ãfe imiri nõ ayatiroma. Askatari yoinã ina fakaxõ tetoxakafo ãfe imi foyamaitori ãfe nami nõ pitiroma, askatari nõko ãfima nõ chotatiroma, kẽromãri ãfe fenema chotamatiroma,’ ixõ nõ ato yoia,” Pablo fanifo.

### *Nios kĩfiti pexefã mẽraxõ Pablo achinifo*

<sup>26</sup> Nãskafaifono nã cuatro feronãfake Pablo ato iyoni. Nãskata pena fetsa ato fe Nios kĩfiti pexefã mẽra ikini, ãto chaka soaxikakĩ. Nãskata a Nios kĩfiti pexefã mẽra ikikaini xanĩfo yoixiki a Epa Niospa yoini keskara afetĩa keyoimãkai, nã tiitori yoinã retexõ Epa Nios inãpaikakĩ.

<sup>27</sup> Mã siete nia ikano judeofo Asia mai anoax fokaxõ Nios kĩfiti pexefã anoa Pablo õikakĩ yorafo yoinifo Pablo chakafakĩ mekafanõfo. Ato askafai-fono Pablo achinifo.

<sup>28</sup> Mã Pablo achikaxõ fãsikõi ato yoinifo iskafakakĩ: “Israelifãfe, nofeta nãkifẽkape, a na feronãfake kafãsakĩ yorafo ato pãrafõfãsa famiski. Nõko maifo tii anoa ato chakafakĩ

yoimiski. Askatari a Moisés noko yoini anori nikayamakāfe ato fai. Askatari nōko Nios kīfiti pexefā chakafakī mekafai. Askatari nōko Nios kīfiti pexefā sharafinakōifiano chakafaa, a mēra nōko kaifoma griego yorafo ikimana,” fanifo.

<sup>29</sup> Akka taeyoi Pablo ōinifo pexe rasi ano nā Trófimo fe kafāsaito. Nā Trófimo Efeso anoa ini. Na Pablo nōko Nios kīfiti pexefā mēra Trófimo ikikinaki ixō shinānifo aa yamafiano.

<sup>30</sup> Nāskakē pexe rasi anoax mekai fetsenifo, nāskaifono yorafo nikaferakani ichonifo. Nāskakaxō Pablo achikaxō Nios kīfiti pexefā mēraanoa kāimanifo. Nāskata Nios kīfiti pexefā koshikōi feponifo.

<sup>31</sup> Nāskaxō mā chaima reteaifono, romanō anoa sorarofāfe āto xanīfāfe nikani pexe rasi Jerusalén anoafāfe yōachēpeaifāfe.

<sup>32</sup> Nāskaifāfe nikakī a soraro xanīfāfe a afe rafeafoya āfe sorarofō ichanāfani. Nāskax ato fe koshikōi ichoni yorafo mēra, a soraro xanīfo āfe sorarofō fe kaito ōikakī anā tsōa Pablo seteketsanima enerisafanifo.

<sup>33</sup> Nāskata a soraro xanīfāfe mā Pabloki kaxō mā achixō, cadenās rafeta ato metexkere amani. Nāskaxō chipo yōkani tsoamāki, askatari afaa afeska faamāki.

<sup>34</sup> Akka askafaino yorafo fanīrira mekai fet-senifo anoris yoinifoma. Nāskai mekai fetseaifono soraro xanīfāfe tāpitiroma ini. Nāskaxō sorarofō mēra ato iyomani.

<sup>35</sup> Mā chaima sorarofō mēra nokoikaino, anoxō yorafāfe retapaiyaifono, sorarofāfe Pablo chish-tokaxō iyonifo yorafāfe afeska fanōfoma.



<sup>36</sup> Nāskakē keyokōi acho fokani fāsikōi meka-fonifo. “Aa chaka reterisafakāfe,” ato faafonifo.

*Askafafono yorafāfe ferotaifi Pablo ato yoini*

<sup>37</sup> A sorarofō ika mēra mā ikimanaifono, a sorarofāfe āto xanīfo Pablo yōkani: “¿Ē mefe pishta mekatromē?” faito soraro xanīfāfe kemani iskafakī: “¿Griego mekapa mī mekatromē?”

<sup>38</sup> Akka, ¿mīmamē a Ejipto anoa afetiama xanīfo potapaiyanā cuatro mil yorafo tsōa istoma iyoni?” ixō xanīfāfe yōkani.

<sup>39</sup> Askafaito nikakī Pablo kemani iskafakī: “Maa, ēma. Ēfi judeoki. Ēfi Tarso anoax fakeakī nā pexe rasi Cilicia mēranoax. Akka na yorafo ē ato yoinō ea yoife,” faito,

<sup>40</sup> nā soraro xanīfāfe, “Mī ato yoitiro,” fani. Nāskafaino Pablo kipiti ano niinākafā mēshainākafā, “Mekayamakāfe,” oinoma ato fani. Mā ato nish-pafaxō hebreo mekapa iskafakī ato yoini:

## 22

<sup>1</sup> “Efe yora mīshtichi, ea nikakāfe ē mato yoinō ea chakafafo keskara, ea anā chakafayamanōfo,” ixō ato yoini.

<sup>2</sup> Hebreo mekapa ato yoiaito nikakani, tsoa pishta tooxinima. Askaifono Pablo anā ato yoini,

<sup>3</sup> “Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe ōitifoyaxō ē Nios Ifofapaikī. Nā mā Nios Ifofapaiyai keskafakī ēri askafapaoni.

<sup>4</sup> Taefakĩ a Jesús Ifofaifo ã ato omiskõimakĩ ã ato retepaipaoni. Nãskaxõ ã ato achixõ karaxa mẽra ã ato ikimapaoni, feronãfakefoya kẽrofo.

<sup>5</sup> A ato Nios kifixomisfãfe ãto xanĩfofo feta a xanĩfo fetsafãfe mato yoitirofo nã ã mato yoiyai keskara. Nãfãfe ea kirika kenexõ inãnifo, nofe yorafo judeofo Damasco anoafõ ã ato foxotanõ. Nãskax ã ari kani a Nios Ifofaifo ato fenaikai, ato achixõ Jerusalén ano ato efexiki anoxõ ato omiskõimaxiki,” ixõ Pablo ato yoini.

*Pablo afeskaxõ Jesús Ifofamãki ato yoini  
(Hch. 9.1-19; 26.12-18)*

<sup>6</sup> Anã Pablo ato yoini iskafakĩ: “Akka fãi kaikĩ mẽ chaima Damasco faikaino, nãnoxõ xini keya oa luz keskarato nai mẽraxõ ea chaxakõitani.

<sup>7</sup> Ea askafaino ã nãmã pakeni. Nãskaxõ mekaito ã nikani, ea iskafaito: ‘Saulo, Saulo, ¿afeskakĩ mĩ ea omiskõimanimẽ?’ ea faito.

<sup>8</sup> Ea askafaito ã yõkani iskafakĩ: ‘¿Mĩ tsoamẽ, Ifo?’ ã faito ea kemani iskafakĩ: ‘Ëkã Jesús Nazarete anoafõ, nã mĩ ea omiskõimanai,’ ea fani.

<sup>9</sup> A efe foaifãfe luz keskarato ea chaxatanaito õikani ratenifo. Akka a ea yoi mekaito tsõa nikanima.

<sup>10</sup> Ea askafaito ã yõkani iskafakĩ: ‘¿Ifo, ã afeskatiromẽ?’ ã faito, nõko Ifãfe ea iskafani: ‘Fininãkafãta Damasco ano katãfe. Anoxõ ã mia yoi kaikai mĩ afaa afeskafaimãkai,’ ea fani.

<sup>11</sup> Akka anã ã fẽro õitiroma ini, nã luzpa ea fechaxki mã ea fẽxoano. Nãskakẽ a efe foaifãfe ea mêtsoxõ Damasco ano iyonifo.

<sup>12</sup> “Nãno feronãfake ãfe ane Ananías ika ini. Nãato Nios nikakõixõ a Moisés yoini keskara

nikakõipaoni. Nãnoxõ judeofãfe Damasco ano ikaxõ aõnoa yoisharapaonifo.

<sup>13</sup> Ë Damasco ano nokoano ekeki Ananías oni ea õiyoi. Mã ekeki oxõ ea iskafani: ‘Efe yorashta Saulo, anã õife,’ ea faino koshikõi ã anã fẽro õini. Nãskaxõ ã õisharakõini.

<sup>14</sup> Anoxõ ea yoini iskafakĩ: ‘Nõko xinifãfe ãto Niospa mia katoa, a mia amapaiyai keskara mĩ tãpinõ. Askatari ãfe Fake sharafinakõia mĩ õinõ, ãfe meka sharafinakõia nikayanã.

<sup>15</sup> Nãskaxõ mĩ ato yoixii Niosnoa, nã maniafo tii anoa, nã mĩ õiaifoya, nã mĩ nikaifo.

<sup>16</sup> Nãskakẽ samarakakima koshikõi fininãkafãta maotisafe faka mẽra ikipakekafãfe nõko Ifãfe ãfe aneõxõ mia chaka soaxonõ,’ ea fani” ixõ Pablo ato yoini.

### *Pablo ato yoini a judeofoma mẽra Epa Niospa nĩchini*

<sup>17</sup> Anã Pablo ato yoini iskafakĩ: “Mẽ Jerusalén ano anã oax, Nios kĩfiti pexefã mẽra ã kani anoxõ Nios kĩfikai. Nãnoxõ ã õia oa namakẽ õia ã fani.

<sup>18</sup> Ë nõko Ifo õini ea iskafaito: ‘Nã Jerusalén anoax koshi tsekekaitãfe, mĩ eõnoa yoiaito mia tsõa nikaima kiki,’ ea fani.

<sup>19</sup> Ea askafaito ã kemakĩ iskafani: ‘Ifo, mã ea tãpiafo nã ichanãti pexe mẽranoafo kaxõ ã ato achixõ karaxa mẽra ã ato ikimapaoni a mia Ifo-faifo. Askatari ã ato koshaketsapaoni.

<sup>20</sup> Askatari a mĩ inakõi Esteban reteaifono, ãri nãno ato fe ini reteaifono. Nãskaxõ ã ato rapati kexexoni.’

21 Ë askafaino nõko Ifãfe ea yoini: ‘Fininãkafãta fãi katãfe, mai fetsafo ari chaikõi ã mia nĩchikai a judeofoma ari,’ ea fani,” ixõ Pablo ato yoini.

*Soraro xanĩfãfe Pablo kexeni*

22 Ato askafaito nikakani, akka fãsikõi yorafo mekainĩfofãnifo: “Na feronãfake chaka retefe anã niyamanõ,” fayaná chakafakĩ mekafanifo.

23 Nãskakakĩ õititishkikĩ finayanã fãsikõi mekakakĩ ato rapati taa taa ayanã fomãkĩa mapo saakĩ fetsanifo.

24 Askafaifãfe nikakĩ a soraro xanĩfãfe ato yoini Pablo karaxa mẽra ikimanõfo, koshaketsakaxõ, nãskafaifono ato yoinõ afeskai a yorafo akiki chakai mekakanimãkai.

25 Akka mã metexkereakaxõ koshapaiyaifono, a soraro xanĩfo fẽtsa Pablo yoini iskafakĩ: “¿Tsõa mia yoiamẽ mã romanõ koshanõ xanĩfo yõkaxoma?”

26 Askafaito nikai a soraro xanĩfo ãfe xanĩfokõi yoikai kani iskafakĩ: “¿Mĩ afeska faimẽ, na feronãfakeri nofe romanõ?”

27 Askafaito nikakĩ soraro xanĩfokõi Pablo ano kani yõkaikai. “¿Mĩ chanĩmamẽ mĩ romanõmẽ?” ixõ yõkaito, “Ëje, ãri romanõki,” Pablo fani.

28 Askafaito nikakĩ a xanĩfãfe yoini iskafakĩ: “Ë romanõ ixiki kori ichapa ã ato inãni, akka taeyoi ã romanõ iyopaonima,” faito nikaki, Pablo kemani iskafakĩ: “Akka ãfi romanõkõiki,” fani.

29 Ato askafaito nikakani a koiro fichi koshapaiyaifo a makinoax fonifo. Nã soraro xanĩfãfe mã tãpiax Pablo romanõkõikẽ nikai ratekõini cadenã ato metexkereamax.

*Judeofãfe ãto xanĩfãfe ferotai fi Pablo yoini*

<sup>30</sup> Nāskata pena fetsa soraro xanīfokōichi tāpīpaikōikī judeofāfe aōnoa afaa yoiāfomākī, a cadenānā menexafo mēpeni. Nāskaxō ato ichanāfani a Niosnoa ato yoimisfo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

## 23

<sup>1</sup> A xanīfofo ōikī Pablo ato yoini iskafakī: “Efe yora mīshtichi, nā Epa Niospa ea yoikī taefani keskai, nē askakōimis. Ēfe ōiti mēraxō ē Nios shinākōiyānā ē sharakōimis,” ixō ato yoini.

<sup>2</sup> Akka Ananías ato Nios kīfixomis āfe xanīfo ini. Nāato a Pablo ketaxamei nia yoini Pablo apasnō.

<sup>3</sup> Askafaito ōikī Pablo kemani iskafakī: “Epa Niospa mia koshai mīkai afaa tāpīama. Mī ano tsaoxō mī ea pārai a Moisés yoini keskara nikaimara ixō. Akka mīroko a Moisés yoini keskara nikakaspakī, mī ea ato apasmana,” ixō Pablo yoiaino,

<sup>4</sup> a anoxō ōiaifāfe Pablo iskafanifo: “¿Afeskakī a ato Nios kīfixomis xanīfo mī chakafakī mekafaimē?” faifono,

<sup>5</sup> Pablo ato yoini: “Efe yora mīshtichi, ē tāpīama nato ato Nios kīfixomis xanīfofiano. Akka kirika ano kenekī iskafanifo: ‘Māto xanīfo chakafakī mekafayamakāfe,’ ixō yoinifo,” ixō Pablo ato yoini.

<sup>6</sup> Nāskaxō mā tāpīxō ano fisti ichanāfono saduce- ofoya fariseofo fāsikōi Pablo ato yoini: “Efe yora mīshtichi, ēri fariseo, ēfe kaifofori fariseofo. Akka ea chakafakī mekafakani, yora naax anā ototirora ixō ē chanīmara faino.”

<sup>7</sup> Pablo ato yoikĩ askafaito nikakani, fariseofo fe saduceofo ãa ranã feratenãnifo. Nãskakanax ichanãkanax paxkanãnifo.

<sup>8</sup> Akka saduceofãfe yoimisfo: “Naax nõ anã ototiroma,” famisfo. Askatari anokai ãjirima anorikai nõko yõshima famisfo. Akka fariseofãfe keyokõi chanĩmara famisfo.

<sup>9</sup> Nãskakanax fãsikõi mekainĩfofãnifo, akka nãno ranãri inifo a Moisés yoikĩ kirika keneni keskara ato tãpimamisfo. Nãfo fariseofo inifo, nãfãfe ni-inĩfofãkaxõ yoinifo iskafakakĩ: “Na feronãfakekai afaa chakafama. Öitsai, yõshi sharapa yoiyamãki Niospa ãjirinĩ yoia rakikã,” ixõ yoinifo.

<sup>10</sup> Ato askafaino fãsikõi mekai xatenifoma. Nãskakaxõ Pablo achikaxõ nini nini akanaifono nã soraro xanĩfo ratekõini. Nãskakẽ ãfe sorarofa kenamani, ato anoa ifixõ anã ãfe pexe ano iyoikaxiki.

<sup>11</sup> Nã fakishi Pabloki nõko Ifo nokoxõ iskafakĩ yoini: “Pablo, inimafe. Na Jerusalén anoafõ eõnoa mĩ ato yoimis keskafakĩ na Roma anoafori ato yoife,” fani.

### *Pablo retexikakĩ itipinĩsharanifo*

<sup>12</sup> Nãskata pena fetsa ranãri judeofo yoinãnifo Pablo retexikakĩ. “Nõ Pablo retexoma nõ foni tenekĩ taefanõ, afaa piamata afaari nõ ayaimakai, noko Niospa retetiroki. Akka mã Pablo retexõ chipo nõ pixikai,” ikanax yoinãnifo.

<sup>13</sup> Cuarenta feronãfakefo anori yoinãnifo.

<sup>14</sup> Nãskakata nã feronãfakefo fonifo a ato Nios kĩfixomisfãfe ãto xanĩfofo fe a judeofãfe ãto xanĩfofo ikafo ano. Iskafakĩ ato yoifokani: “Nõ yoia iskafakĩ: ‘Pablo reteyoxoma, nõ foni teneyoi nõ

afaa piyamata afaari nō ayaima. Nō askayamaino Epa Niospa noko retetiro,' ixō nō yoia," fanifo.

<sup>15</sup> “Akka iskaratīa mā na xanīfo fetsafo feta, na soraro xanīfo yoikāfe mato ano penama Pablo efenō. Feparaxō yoikī iskafakāfe: ‘Nō Pablo yōkasharapaikai noko nīchixōfe nō yōkanō afaa ađnoa yoiafomākī,' ixō yoikāfe. Oaito ōikī nō achixō reterisafanō,” fanifo.

<sup>16</sup> Nāskaifono Pablo āfe pīaka nikani nō Pablo retenō ikaifono. Nāskax sorarofō mēra kani anoa āfe koka Pablo yoikai.

<sup>17</sup> Mā Pablo nikaxō, soraro xanīfo fetsa kenaxō yoini iskafakī: “Na naetapa xanīfokōi ano iyotāfe, afara yoipai kiki,” fani.

<sup>18</sup> Nā soraro xanīfāfe āfe xanīfokōi kenaxō yoini iskafakī: “Na karaxa mēra ikato Pablo ea kenaxō ea yoia na naetapa ē mikiki efenō afara mia yoipai kiki,” faito,

<sup>19</sup> nā xanīfokōichi nā naetapa mētsofaixō a fisti iyoxō orixō yōkani: “¿Afaa mī ea yoipaimē? Ea yoife,” faito,

<sup>20</sup> nā naetāpa yoini iskafakī: “Mā judeofo yoināfo, mia yoixikakī mī penama a xanīfofo ichanāfo ano mī ato Pablo iyoxonō. Mia feparapaikani nō Pablo yōkasharapai ađnoa nō nikasharapai mia fai fekani.

<sup>21</sup> Akka mia askafaifono ato nikayamafe. Cuarenta feronāfakefo fai nēxpakīa kexekaxō ēfe koka manafoki achikaxō retexikakī. Nō Pablo retexii nō foni tenekī taefanō afaa piyamata afaari nō ayaimakai. Nō askayamaito Epa Niospa noko retetiroki. Akka mā Pablo retexō chipo nō pikai ikax yoināfo, mā itipinīkōikaxō mia manafo

mĩ ato afafaimākai,” ixõ nã naetãpa yoini.

<sup>22</sup> Askafaito nikakĩ a soraro xanĩfãfe nã naetapa nĩchini, “Na ea mĩa yoiai anori tsoa yoiyamafe,” fayanã.

*Pablo xanĩfo Félix ano nĩchinifo*

<sup>23</sup> Nãskaxõ a soraro xanĩfokõichi afe xanĩfo rafe kenaxõ ato yoini dos cientos sorarofõ yoixõ nĩchinõfo, askatari setenta kamayonõ fotanõfo, askatari dos cientos sorarofõ ashifoya fotanõfo Cesarea ari fõkani fakishi.

<sup>24</sup> Nãskata kamayori ato itipinĩfamani a kamaki Pablo tsaoax kanõ. Nãskaxõ ato yoini kexesharata iyotanõfo xanĩfo Félix ano.

<sup>25</sup> Nãskaxõ kirika kenexõ ato inãni a xanĩfo Félix foxotanõfo iskafakĩ kenexõ:

<sup>26</sup> Efe xanĩfo Félix, ekĩa Claudio Lisias, ã mia kirika kenexõ fomai mia yoisharayanã.

<sup>27</sup> Na feronãfake judeofãfe achixõ retepaiyai-fono, akka ã nikaita ãri romanõki ikaito, nãskaito nikakĩ ãfe sorarofõ fe kaxõ ã ifita.

<sup>28</sup> Afaa chakafaamakĩ ã tãpipaikĩ, judeo xanĩfofo ichanãfo ano ã iyoita.

<sup>29</sup> Anoxõ ea yoiaifãfe ã nikaita, na Pablo a Moisés yoini keskara shinãima ea faifãfe. Akka afaakai chakafama retepanãfãfe, askatari karaxa mẽra ikimapanãfãfe.

<sup>30</sup> Akka mẽ tãpia judeofãfe ea feparapaiyaifãfe Pablo retepai kakĩ. Nãskakẽ ã mikiki nĩchi. A Pablo chakafaifori nãfori ã mia ari nĩchi, afaa Pablo chakafamakĩ mia yoinõfo. Nã tii ã mia yoi efe xanĩfãfe, ixõ kenenĩ.



31 Āto xanĩfāfe ato yoia keskafakĩ kexesharakōixō, fakishi Pablo iyonifo Antípatris ano.

32 Askata pena fetsa sorarofa atiri nēteferakani āto peXe ano fenifo a tāe foaifo. Akka a kamayonō foaifo Pablo fe fonifo.

33 Mā Cesarea ano nokokaxō xanĩfo ano Pablo iyonifo, a āto xanĩfāfe kirika kenexō manamana, nā xanĩfo Félix inānifo.

34 Mā a kirika kene anexō, nā xanĩfāfe Pablo yōkani: “¿Mĩ fanĩamē?” faito, “Ē Cilicia anoa,” Pablo faito nikakĩ,

35 anā yoini iskafakĩ: “A mia mekafakĩ chakafaifo mā fēkaxō mĩōnoa yoiaifāfe ě nikanō mia afaa fakanimākai ě ato manayonō,” ixō yoini. Nāskaxō sorarofa yoini Herodes xanĩfo ika ano iyoxō Pablo kexesharakōinōfo.

## 24

### *Pablo xanĩfo Félix yoini*

1 Mā cinco nia oxata nā ato Nios kĩfixomis xanĩfokōi, āfe ane Ananías, Cesarea ano oni. Judeofāfe āto xanĩfo fetsafo fe feronāfake fetsari ato fe kani, āfe ane Tértulo, nāato ato yoixomis ini. Nāfo xanĩfo ano fonifo, Pablo chakafakĩ mekafaxikakĩ.

2 Mā nokoafono xanĩfāfe Pablo ifitanōfo ato yoini. Mā efeafono nā Tértulo Pablo yōani. Iskafakĩ nā xanĩfo Félix yoini: “Aicho xanĩfo, mĩ noko ĩkinā nō isharakōiaki. Aicho mĩ tāpisharakōiaki nōko maitio anoafu mĩ ato yoisharakōimis noko chakafanōfoma.

3 Fanĩmā mĩstixō mĩ askafaito nō nikamis. Nāskakē mĩ noko sharafamiskē nō mikiki inimasharakōimis.

4 Akka ẽ mia yoikĩ, ẽ mia chai samarata-paimakai. Nõ mia yoiaito noko pishta nikayofe.

5 Na feronãfake mã nõ õimis ato fekaxtefamis, fakima mĩshtifo kafãsakĩ ato pãrafofãsafakĩ judeofãfe anoris shinãnõfoma. Askatari ãto xanĩfo nazarenõfo ato mekamamis.

6 Askatari nõko Nios kĩfiti pexefã chakafakĩ mekafaito nikakĩ nõ achita.

7 Akka nã sorarofãfe ãto xanĩfo Lisias nomakino kerexkai ifita.

8 Anoxõ noko yoikĩ iskafaita: ‘Mãri Cesarea ano fotakãfe afaa Pablo chakafamãkĩ, a xanĩfo yoixikakĩ.’ Nãskakẽ nõ mia ano oa. Yõkaxõ mĩ tãpitiro nã afara chakafakẽ aõnoa nõ yoiaki keskara,” ixõ yoiainfo,

9 judeofãferi ano fisti ichanãkaxõ, nãnoriri yoinifo: “Chanĩma,” fanifo.

10 Askafaifãfe nikakĩ xanĩfãfe Pablo ãfe mẽkemã, “Mekafe,” faino, Pablo niinãkafã yoini iskafakĩ: “Inimakõikai ẽ mia yoi ẽ afaa chakafamisma. Mẽ tãpia na mai anoafãfe mĩ ãto xanĩfokõi, mã mĩ xini ichapa aka xanĩfokĩ.

11 Akka mĩ ato yõkaxõ mĩ tãpitiro ẽ oxa ichapama doce nia ẽ ika na Jerusalén ano ẽ oita anoxõ Epa Nios kĩfixikĩ.

12 Ẽ tsofe feratenãito ea õimisfoma, Nios kĩfiti pexefã mẽraxori ẽ tsoa mekafamisma, ichanãti peXe mẽraxori ẽ tsoa mekafamisma, askatari a peXe rasi mẽranoax ẽ tsofe feratenãito ea tsõa õimisma.

13 Na yorafokai ãa kaxpa chanĩtirofoma, ẽ afaa chakafaitokai ea õiafoma.

14 Akka ẽ mia yoitiro nõko xinifãfe ãto Nios ẽ shinãkĩ ẽ kĩfimis. Nõko Ifo noko yoipaoni keskafakĩ akka na yorafãfe ãa chanĩra ea famisfo. Akka

a Moisés yoikī kirika kenei nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis.

<sup>15</sup> Akka na ea yōaifāfe a yora sharafoya yora chakafo nafono Niospa ato otofaxii chanīmara famisfo keskafakī ēri nā akaifo keskafakī chanīmara famis.

<sup>16</sup> Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

<sup>17</sup> “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfiti pexefā mēraxō Nios afara ināxiki.

<sup>18</sup> Epa Niospa noko yoini keskarakōi ē faa. A nō imis keskai nē askakōikī Epa Niospa ferotai fi afaa chakafatama ē isharakōia. Akka yora ichapa ano efe ikafoma. Askatari anoax toa fāsi mekaitama. Akka atiri judeofo Asia mai anoax fenixakakī ea ōiafo.

<sup>19</sup> Nāfāfe ē afara chakafaito ea ōifikaxō jafeskai afo feafomamē, nonoxō ea yōaxikaki a ē afara chakafaito ōiafo keskara?

<sup>20</sup> Akka afo feyamaifono, nā nonofo mī ato yōkatiro ē afaa chakafaito ea ōiafomāki judeofāfe āto xanīfofōfāfe ferotai fi.

<sup>21</sup> Akka ē anoxō fāsikōi mekainākafā ē ato yoita iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoita,” Pablo xanīfo fani.

<sup>22</sup> Akka na Félixpa Jesúsnoa tāpia ini. Nāskaxō shināni iskafakī yoiyanā: “Mā soraro xanīfo Lisias oxō ea yoisharaiyonō ē tāpisharanō mī afaa chakafaamākī,” ixō yoini.

23 Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyaifāferi ato ikimanō.

24 Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiaito nikanifo Jesús meka shara afeskaxō nō Jesucristo Ifofatiromākī.

25 Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiaito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikai afaa afeska fayamakī,” ixō yoini.

26 Pablo askafaito nikakī Félixpa shināni ea Pablo kori ināno ē kāimaṭiro ixō. Nāskakī mēxotaima kenapaoni afe mekaxiki.

27 Nāskakī anoxō xīnia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane Porcio Festo. Akka Félixpa karaxa mēranoa Pablo kāimanima, judeofāfe aōnoa yoisharakōinōfo.

## 25

### *Festopa ferotaiḡi Pablo yoini*

1 Festo nokoni xanīfo ixiki. Mā tres nia ikax Cesarea anoax Jerusalén ari kani.

2 Nārixō a ato Nios yoixomisfāfe āto xanīfofōfāfe a judeo xanīfofo feta Pablo chakafakī mekafanifo.

3 Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiito shinānifo fai nēxpakīaxō nō Pablo retenōra ikaxō.

4 Askafaiḡāfe nikakī akka Festopa ato kemani iskafakī: “Pablo Cesarea ano karaxa mēra ika. Akka ari mē samama kai,” ato fani.

<sup>5</sup> Nāskaxō ato yoini iskafakī: “Nāskakē mātō xanīfofo Cesarea ano efe fotirofo, na Pablo afaa chakafaamakī arixō yoixikakī.”

<sup>6</sup> Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xanīfofo tsaomisfo anoxō tsaoxō ato yoini Pablo ifitanōfo.

<sup>7</sup> Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaifono, “Afaa Pablo chakafamākī ea yoikapo,” xanīfāfe ato faito, tsoa afaa inima Pablokairoko afaa chakafaito ōikanax āamāi noikaspakakī.

<sup>8</sup> Askafaifāfe nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoxō Nios kīfiti pexefāri ē chakafamisma, askatari romanō xanīfori ē chakafakī mekafamisma.”

<sup>9</sup> Askafaito nikakī judeofāfe nōko xanīfo Festo sharakōira fanōfo Pablo yōkani iskafakī: “¿Mī Jerusalén ano kapaimē? Anoxō ē ōikanō mī afaa afeska famākī.”

<sup>10</sup> Askafaito nikakī Pablo kemani: “Ē ari katiroma mīrimāi romanōfāfe xanīfokē nonoxō ea yōkatirofo. Mā mī tāpia, ē judeofo chakafamisma.

<sup>11</sup> Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pārakaxō ea ari nīchitirofoma ea retenōfo. Akka ē xanīfo finakōia César ano ē kapai anoxō ea yōkanō.”

<sup>12</sup> Askafaito nikakī Festopa a afe rafeafo feta yoini: “Mā mī yoiaki xanīfo finakōi ari katāfe arixō mia xanīfāfe yōkanō,” fani.

*Xanīfo Agripa ano Pablo iyonifo*

13 Mā ano ikatsaxakī pena fetsa xanīfo Agripa āfe chiko Berenice fe Cesarea ano fonifo Festo fe mekasharai fokani.

14 Nāri oxa ranāifono, Festopa Pabloōnoa xanīfokōi iskafakī yoini: “Na karaxa mēra feronāfake fisti ika Félixpa ikimayameano.

15 Ē Jerusalén ano ikano a Nios ato kīfixomisfāfe āto xanīfofo fe judeofāfe āto xanīfofo ekeki fēkaxō Pablo chakafakī mekafaitafo iskafakī ea yoiyanā na feronāfake omiskōimafe ea faitafo.

16 “Ea askafaifono ě ato yoikī iskafaita: ‘Nō romanōfāfe askara feyafamisma nikasharaxoma nō tsōa retetiroma. A chakafakī mekafaifo fe ato fe yoināmano, afeskakī aōnoa yoikī chakafakī mekafakanimākai.’

17 Nāskakē mā nono Cesarea ano feafono, pena fetsa mē xanīfoxō a xanīfofo tsaomisfo ano tsaoxō, ě ato manamayamea Pablo ifitanōfo.

18 Akka afaa chakafaamakī ea yoikapo ě ato fafiaino, tsōa aōnoa afaa chaka ea yoiama. Afara chakafakī finakē ea yoikanira ixō ě shināfiaino.

19 Akka aōnoa yoikī iskafaifāfe ě nikaita: ‘Na Pablo Niosnoa yoimisfo anori yoima, a feronāfake Jesús mā nafianino, mā anā otoyamea,’ ixō yoimisfaifāfe ě nikaita.

20 Ē afeskaimē na yoiainoakai ě tāpiama ixō ě shināita. Nāskaxō ě Pablo yōkaita, Jerusalén ano kapaimākai xanīfāfe anoxō yōkanō a aōnoa yoiaino keskara.

21 “Ē askafaito ea Pablo yoikī iskafaita: ‘Ē anā Jerusalén ano kapaima. Nonoxō ěfe xanīfokōichi ea yōkatiro,’ ixō ea yoita. Ea askafaito ě ato yoita anā Pablo karaxa mēra ikimanōfo, nā ě nīchiatīa,” ixō Festopa yoiaito,

<sup>22</sup> Agripa yoikĩ iskafani: “Ëri na feronãfakē nīkasharapaikōi,” ixō Agripa yoiāito, Festopa kemani iskafakĩ: “Mī penama nikatiro,” fani.

<sup>23</sup> Nāskata pena fetsa Agripa āfe chiko Berenice fe rapati sharakōi safekanax xanĩfāfe pexe mēra ikinifo. Soraro xanĩfofo fe a pexe rasi anoa xanĩfofori ato fe ikinifo. Nāskaifono Festopa Pablo ifitanōfo ato yoini.

<sup>24</sup> Mā Pablo efeafono Festopa xanĩfo Agripa iskafakĩ yoini: “Efe xanĩfo Agripa, a xanĩfo fetsafori nofe ichanãfāfe na feronãfakēkĩa ōikapo. Judeofāfe ekeki efeafō aōnoa afara chaka yoiyanā. Jerusalén anoxō chakafamisfo, nono Cesarea anoxori chakafamisfo. Mēxotaima fāsikōi mekayanā retefe ea famisfo.

<sup>25</sup> Akka afaa chakafakai ē ōima ē retepanā. Akka iskaito ē nika: ‘Ë xanĩfo yoipai ē afaa chakafamākĩ ea yoinō,’ ixō Pablo yoiāito ē nika.

<sup>26</sup> Akka afaa chakafaitokai ē ōiama, aōnoa yoikĩ ēfe xanĩfo ē kirika kenexō ē fomapanā. Nāskakē mato ano ē Pablo efea mīmāi xanĩfo finakōikē. Efe xanĩfo Agripa, mī Pablo yōkaxō mī ea yoitiro nānori yoikĩ ē xanĩfo kirika kenexō fomanō.

<sup>27</sup> Akka ē shinā askara sharama na feronãfakē xanĩfo ari nō nīchitiroma tāpīxoma afaa aōnoa yoiāfomākī.”

## 26

*Pablo xanĩfo Agripa ano kaxō yoini a aōnoa chakafakĩ yoiāfo keskara*

<sup>1</sup> Nāskakē xanĩfo Agripa Pablo yoini iskafakĩ: “Mī yoitiro afeskakĩ mia chakafakĩ mekafafomākĩ,” faito Pablo mēshainākafā ato yoini iskafakĩ:

<sup>2</sup> “Xanīfo Agripa, ẽ inimakōi mī ferotaiƒi yoi na judeofāfe eñoa afara chaka yoiāfo keskara yoi, na eñoa yoiāfo keskara mī chanīmara fanōma.

<sup>3</sup> Akka mī xanīfokōi mā mī ōimis, nā judeofo imis keskai nō yoināito. Nāskakē ẽ mia yoi, fekaxtekima mī ea nikayonō,” ixō Pablo yoini.

### *Pablo Jesús Ifofamax isharayopaonima*

<sup>4-5</sup> Anā Pablo ato yoini iskafakī: “Keyokōi judeofāfe tāpikōiafo a ẽ ato mēranoax imis keskara, ẽfe mai anoxō tāpikāta, Jerusalén anoxori tāpiafo. Askatari mā tāpiafo, akka mia yoipaikakī mia yoitirofo, ẽri fariseo. Nā nōko xinifāfe noko yoipaonifo keskara ẽ nikakōimis.

<sup>6</sup> Epa Niospa nōko xinifo yoini keskafakī, a yora naax anā ototirora ixō ẽ chanīmara faito, ea chakafakakī mato ano ea efeāfo.

<sup>7</sup> Ɛfe kaifo judeofāfe nā doce xoko fetsafāfe, nā Epa Niospa yoiyoni keskara ōipaikakī manamisfo. Nāskakē Epa Nios kīfimisfo, penata kīfita fakishi kīfikī famisfo. Nāskarifiakī ẽri ōipaikī ẽ manaino, na judeofāfe āa ea pāarakakī ea chakafakī mekafamisfo.

<sup>8</sup> ¿Afeskakī mā chanīmara faimamē, Niospa yora nakē otofafiatirono?” ixō Pablo ato yoini.

### *Pablo ato yoini a Jesús Ifofaāfo ato omiskōimapaonixakī*

<sup>9</sup> Anā Pablo ato yoini iskafakī: “Ɛa shināxō a Jesús Ifofaāfo ẽ ato omiskōimapaoni. Nā Jesús Nazarete ano ikano, āfe ane nikakaspakī ẽ chakafapaoni.



10 Jerusalén anoxō ē ato askafapaoni. A Nios ato kīfixomisfāfe āto xanīfofofāfe ea yoiafono a Nios Ifofafo ichapakōifo ē ato karaxa mēra ikimapaoni. Ato reteaifonori nō ato retenō ē ato fapaoni.

11 Mēxotaima ē ato omiskōimapaoni, anā Jesús sharara fayamakāfe ixō. Nā ichanāti pexefo mēraxō ē ato askafapaoni. Ē atoki ōitifishkikī finakōikī pexe rasi fetsafo mēra kaxori ē ato omiskōimapaoni,” ixō Pablo ato yoini.

*Pablo yoini afeskaxō Jesús Ifofamāki  
(Hch. 9.1-19; 22.6-16)*

12 Anā Pablo ato yoini iskafakī: “Nāskakē achixō ē ato omiskōimapai pexe rasi Damasco ano ē kani, a Nios ato kīfixomisfāfe āto xanīfofofāfe ea yoikaxō ea nīchiafono.

13 Xanīfo Damasco ari fāi kakī ē ōini xini keya nai mēraxō chaxatanaito oa xinī chaxa keskara inima, chaxakī finakōini. Ea kemataima chaxakōia ini, a efe fofaifori ato askafani.

14 Noko askafaino nō nāmā pakeni. Askata āfe meka ē nikani hebreo mekapa ea yoiaito iskafakī: ‘Saulo, Saulo, ¿afeskakī mī ea omiskōimanimē? Ea mīa iskafai, mīakōi mī chakamei oa fakka ifiki chachixō pae meetiro keskai.’

15 “Ea askafaito nikakī ē kemakī iskafaita: ‘¿Ifo, mī tsoamē?’ ē faito, nōko Ifāfe ea kemakī iskafaita: ‘Ēkīa Jesús, ea mīa omiskōimamis.

16 Fininākakāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari.

17 Ē mia kexesharaxii judeofāfe mia retepaiyai-fono, yora fetsafāferi mia askafaifono ē mia kexesharaxii. Nāskakē ato mēra ē mia nīchi.

18 Nāskakē ato mēra ĕ mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanās chakata ato yoiaito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe ĩpaxanōfo, ixō Jesús ea yoini,” ixō Pablo ato fani.

*Jesucristo yoiaito namakē ōia keskarafaxō Pablo nikakōini*

19 Anā Pablo ato yoini iskafakī: “Ĕfe xanīfo Agripa, ĕ nikakaspanima a ĕ namakē ōia keskarafaxō nī mēraxō ea yoiaito.

20 Damasco anoxō ĕ ato yoikī taefani Jesúsnoa meka shara ato yoikī. Nāskata Jerusalén anoafori ĕ ato yoini, Judea mai anoafori ĕ ato yoini. Askatari a judeofoma ĕ ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ĕ ato yoiaito,

21 judeofāfe ea achinifo Nios kīfiti pexefā mēraxō ea retepainifo.

22 Akka ea retepaiyaifono Epa Niospa ea kexesharani, iskaratīari ĕ isharakōia Niosnoa ato yoivanā. A xanīfokōifoya a afamafori ĕ ato yoimis. Afaa fetsa ĕ yoimisma. A ato Niospa shināmanaino Moisés feta yoipaonifo anori fisti ĕ yoimis.

23 Iskafakī ato yoipaonifo, na Niospa nīchia Cristo omiskōiax naxii. Mā nafiax anā otoxii, mā otoxō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

*Pablo Agripa shināmapaini akairi Jesús Ifofanō*

24 Pablo yoikī askafafiaino, Festopa mekati-mafani iskafakī yoini: “Pablo, mā mī fekaxtekōia mēxotaima kirika fisti anekī tāpikōiax,” fani.

25 Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askatamaroko na ē yoiai anori sharakōi, chanīmakōi ē mato yoi.

26 Na ē mato yoiai anori nōko xanīfo Agripa mā tāpikōia a ē Jesúsnoa yoimis anori. Nāskakē xafakīakōi āfe ferotaifi ē yoi, akka mē tāpia na ē yoiai anori nāatori mā tāpia. Nā ē yoiai anori ē nikamisma mā itiroma onekai ē yoimisma.

27 Ēfe xanīfo Agripa, a Niospa ato shināmanaino yoipaonifo keskara, ¿mī chanīmara faimē? Akka ē tāpia mī chanīmara fai,” ixō Pablo Agripa yoini.

28 Askafaito nikaki Agripa kemani iskafakī: “Mā mī ea chanīmara famakerana Jesús Ifofafe,” ixō yoini.

29 Askafaito anā Pablo yoini: “Iskaratīa iyamai afetīara ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfixomis,” ixō Pablo ato yoini.

30 Ato askafaito nikai xanīfokōi fininākafani, xanīfo fetsa fe, Bereniceri ato fe askani, a ano tsaofori ato fe fininīfofānifo.

31 Nāskakanax ori fokanax āa ranā yoinākani iskanifo: “Na feronāfākekai afaa chakafama afeskakīkai retetirofoma, askatari afeskai karaxa mēra itiroma.”

<sup>32</sup> Nāskaxō Agripa Festo yoini iskafakī: “Na feronāfake nō kāimakerana, ē xanīfo César ari kaimakai noko faino,” ixō Agripa Festo yoini.

## 27

### *Pablo Roma ari nīchinifo*

<sup>1</sup> Nāskakē shinākaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofo, “Xanīfo finakōia kexemisfo,” ato famisfo.

<sup>2</sup> Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalónica anoa ini, Macedonia mai anoa.

<sup>3</sup> Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskafani: “Mefe yorafo kaxō ōitāfe afāfe nā mī fichipaiyai keskara mia inānōfo,” ixō yoini.

<sup>4</sup> Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino.

<sup>5</sup> Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai anoa ini.

<sup>6</sup> Nānoxō a soraro xanīfāfe kanōanāfā fetsa fichini Alejandria anoax okē. Nā kanōanāfā Italia anoax kaino, nāo noko naneni aō nō kanō.

<sup>7</sup> Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefānē noko anā akaino, pexe

rasi Salmona okiri nō finōfaini. Nā Creta anoa fakafā nakirafe mai toomāfā okiri nō kayakeni.

<sup>8</sup> Nāskata nēfefānē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

<sup>9</sup> Nāskai mā nō ano samarakōiano, mā mechakaino fakafā pooiki meseniaito ōikī anā katiroma meeki Pablo ato yoini

<sup>10</sup> iskafakī: “Xanīfofōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīshtifo nō fenotiro, askatari nōri nō āsai fetsetiroki,”

<sup>11</sup> ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikani. Nā rafeta Pablo nikanifoma.

<sup>12</sup> Akka nā fai fototai shara inima anoxō mechaka finōpaifaifono nāskakē anoxō shinānifo: “Nō nonoax kanō Fenice ano,” ixō shinānifo. Nā pexe rasi Fenice Creta mai anoa ini.

### *Nēfefanē fakafā anoxō ato ani*

<sup>13</sup> Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi nō finōfaini.

<sup>14</sup> Akka mā nō kaino chipo nokoki nēfefākerakī, fakafā pooiki kanōanāfā rafe rafe ani.

<sup>15</sup> Noko askafaino fakafā ketokonō nō kapaiifaino, noko katimafani. Nāskakē nā nēfefanē nā iyopaiyai ari noko iyoni.

<sup>16</sup> Noko askafaino nā fakafā nakirafe mai tōo efapama āfe ane Cauda nō finōfaini. Nāno nō

finōfainaino anā noko nēfe fāsi anima. Nāskakē a kanōa kafāshara chiroamea fāsi kerexkai kanōanāfā xaki mēra nanenifo.

17 Mā askafakaxō risfi eapato kanōanāfā nexasharakōinifo ato nēfe toōxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō.

18 Akka pena fetsa anā nokoki nēfefani, nāskakē nā kanōanāfā mēranoa āto afama mīstififo fakafā naki potaketsanifo.

19 Askakāta mā tres nia ikano nēfefā nishpayamaito ōi kakī āto risfifoya āto firofo, āto fitifo, āto samafo, fakafā naki potakī mitonifo.

20 Nāskai nēfefā nishpayamaino xini yafi fishifo nō ōitiroma ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

21 Nāskakī mā nō foni tenekī ranā faano, Pablo niinākfā noko yoini iskafakī: “Efe yora mīstichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīstifokai nō fenokeranama, mārikai omiskōikeranama.

22 Nāskakē rateyamakāfe. Mā āsaimakai. Kanōanāfā fisti fakafā mēra iki kiki.

23 Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis.

24 Ea iskafakī yoiakī: ‘Pablo, rateyamafe. Mī xanīfo César ano kaikai ato mia yōkanō mī afaa chakafamākī. Mīoxō Epa Niospa na kanōanāfā

mēra mefe foaifo ato kexesharai kiki afeskakan-  
ima kiki,' ixō ea yoiaki.

<sup>25</sup> Nāskakē ē mato yoikai efe yora mīshtichi,  
ratekakima inimakāfe. Epa Niospa ea yoiai  
keskara ē chanīmara fakōimiski. Mē tāpiaki tsoa  
āsaima kiki mā ea ājirinī yoiaki.

<sup>26</sup> Akka fakafā nēxpakīa mai toomāfā anoax nōko  
kanōanāfā tooxai kiki," ixō Pablo ato yoini.

<sup>27</sup> Mā nō catorce nia finōta fakafā āfe ane  
Adriático ano nō nokoni. Nāskakē nānoxō nēfefanē  
nā noko iyopaiyai ari noko iyoikaino, nā fakish  
fistichi yamenake kafanaino a kanōanāfā mēra  
yonomisfo yoinānifo: "Mā nō mai ano nokoikaira,"  
ikanax.

<sup>28</sup> Nāskakaxō āto tanātinī faka noamākī ixō  
meenifo. Mā meekaxō ōiafo treinta y seis metros  
ini, askata afianā ori fokaxō meeafō veintisiete  
metros ini.

<sup>29</sup> Nāskakaxō mesekakī nō tokirinīfakī nokoi  
katirora ikaxō, cuatro faxō āto firopafāfo  
nexakaxō kanōanāfāki chenexti fakaxō fakafā  
naki potanifo, noko nēfefanē iyoyamanōra ikaxō.  
Nāskakaxō Epa Nios kīfinifo koshi penanōra ikaxō.

<sup>30</sup> Nāskaifono akka a kanōanāfā mēra yonom-  
isfo onefaipainifo kanōanāfā mēranoax. Nāskakē  
a kanōanāfā mēranoa a kanōa kafāshara fotoma-  
painifo. Nō firopafāfo nexaxō kanōanāfā renexte  
faxō nō fakanaki potaira ikaxō ato feparapainifo.

<sup>31</sup> Nāskaifono Pablo soraro xanīfo yoini, āfe  
sorarofoya iskafakī: "Nafō kanōanāfā mēra  
nēteyamaifono tsōa mato anā iyoyamaino, mā  
āsai mitokomei," ato faino,

<sup>32</sup> sorarofāfe a aō kanōa fotomapaiyaifo risfi  
xatenifo a kanōa fakanaki pakeano fāka fōtanō.

<sup>33</sup> Nāskata mā penaino Pablo shināxō ato yoini afara pishta pinōfo. Iskafakī ato yoini: “Mā nō nomīko rafe akaki nēfefā nishpaira ixō, manayanā a mā pimis keskafakī mā afaa piamaki.

<sup>34</sup> Ē mato yoikai pikāfe. Nō piashara nō itiroki anā māto yora kerex inō. Nō afeskaimakai,” ixō ato yoini.

<sup>35</sup> Ato yoikī askafata pāa tsomainīfofā āto ferotaifi, Epa Nios kīfīkī iskafani: “Aicho Epa Niosi, mī noko kexesharaki,” fata ato pāa pikīni.

<sup>36</sup> Ato askafaino inimakōiyanā anā ratekakīma akairi pinifo.

<sup>37</sup> Akka nā kanōanāfā mēra docientos setenta y seis yorafo nō ini.

<sup>38</sup> Mā pii māyakōikāta ato trigofa fakafā naki potanifo, kanōanāfā xaka inō.

### *Kanōanāfā ikini*

<sup>39</sup> Mā penaino a kanōanāfā mēra yonomisfāfe, mā mai fichifikaxō tsōa tāpinima. Akka a fakafā chitotanā anoa mashi fichikaxō, “Ono nōko kanōanāfā nō rītiaki kanō,” inifo.

<sup>40</sup> Nāskakata a aō kanōanāfā nexea āfe risfi xatekaxō nānoa ōifainifo. Nāskatari āto fitifo pekaketsanifo kanōanāfā mēstekōi iyoikanō. Nāskata afianā kanōanāfā rechokoki āto samapafā poteinīfofānifo ato nēfe iyoikanō. Nāskax mā fōkakī mashi chaima fanifo.

<sup>41</sup> Akka mā fofaifono kanōanāfānē mashi tsakax nāno rakani. Refokirixori mashi tsakakōia ini, pishta ferotiroma. Nāskakē aō chipokirinoax toxai fetseni fāsikōi fākafā poo ikaino.



<sup>42</sup> Nāskaino sorarofāfe a karaxa mēra imisfo ato retepainifo, tsoa pishta ichoyamanō. “Keyokōi nō ato retenō,” ikax yoinānifo.

<sup>43</sup> Akka a sorarofāfe āto xanīfāfe Pablo retepaikīma, “Ato reteyamakāfe,” āfe sorarofa fani. Nāskaxō ato yoini iskafakī: “Fatoto mā faka feakī tāpiamākī faka feafaitakāfe mashi ano nokoxikakī.

<sup>44</sup> Akka a faka feakī tāpiafoma tii na kanōanāfā kaxkē aō nonoax fonōfo,” ixō soraro xanīfāfe ato yoini.

Nāskakē keyokōi āsaxma mashi ano nokonifo.

## 28

### *Pablo mai toomāfā āfe ane Malta ano ini*

<sup>1</sup> Mā nō keyokōi fāfāfā kesemē nokoxō, nō tāpini nā fāfāfā nēxpakīa mai toomāfā āfe ane Maltakē.

<sup>2</sup> Nānoxō keyokōi noko ifisharakōinifo. Nānoax nokoki oi ikaino, matsikōi ini. Nāskakē anoxō chii ketefakaxō, “Yoofēkāfe,” noko fanifo.

<sup>3</sup> Pablo nānoxō karoya shano ikōferani chii ketefakī. Mā chii ketefaino chii xanamei shano kāikerani oxō mifiki chachini. Mā mifiki chachiax aō neetani.

<sup>4</sup> Pablo āfe mifi shano ronokē ōikani āa ranā isakai fetsenifo: “A na feronāfāke ato retemis rakikīa. Fakafā anoax nokosharafiaino, mā Niospa shano chachimana nai rakikīa,” ikanax yoinānifo.

<sup>5</sup> Akka Pablo metashkiri itakī shano chii nēxpakīa potani. Shanopa chachifiano Pablo paemenima.

<sup>6</sup> Nāskakē keyokōichi ōiketsanifo faraxinākafanax naira ikaxō. Akka faraxiyamaito ōikakī, iskafanifo: “Nakai retemitsamisma, nafi nioski,” ikanax yoinānifo.

<sup>7</sup> Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino.

<sup>8</sup> Nānoax Publio āfe apa isinī iki rakani, yon-ayanā chixoi. Nāskaino Pablo ōikai kaxō Epa Nios kīfixota āfe mīfi māmāsharani.

<sup>9</sup> Pablo sharafaito nikakanax a isinī ikaifori nā ika anoax feafono Pablo ato sharafapani.

<sup>10</sup> Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

### *Pablo Roma ano nokoni*

<sup>11</sup> Nāskata anoxō mā nō tres oxe akax, kanōanāfā mēra nō naneinākafāni. Nā kanōanāfānē nā mai anoxō mechaka finōmani. Nā kanōanāfā Alejandría ano ini. Nā kanōanāfā recho koki afarafo tsaoxō fonifo na nōko niosra ikaxō, fetsa āfe ane Castor ini, fetsari Pólux ini.

<sup>12</sup> Nāskax nō nokoni Siracusa fai fotoa ano, nāno nō tres nia oxayoni.

<sup>13</sup> Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfefānē noko ani a xini oaikiri-noaxma oxō. Nāskakē nānoax kaax pena fetsa nō nokoni Puteoli ano.

<sup>14</sup> Nānoa a Jesús Ifofaafō nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni.

<sup>15</sup> Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi

Foro de Apio anoax fenifo, atiri pexe rasi Tres Tabernas anoax nokoki nokonifo. Askaifãfe õikĩ Pablo Epa Nios kĩfikĩ iskafani: “Aicho Epa Niosi, mĩ yorafo ekeki nĩchiaki,” fani inimakõiyañã.

<sup>16</sup> Mã nõ Roma ano nokoano, xanĩfãfe ato yoini pexe fetsa mẽra ares Pablo inõ, anoxõ soraro fistichi kexenõ.

### *Roma ano Pablo ini*

<sup>17</sup> Mã nokoitaxakakĩ ano tres nia ixõ, Pablo jude-  
ofo xanĩfofo Roma anoa ato kenamani fenõfo. Mã fekanax ichanãfono Pablo ato yoini iskafakĩ: “Efe yora mĩshtichi, ea nikakapo ã mato yoinõ. Ëkai judeofo chakafakĩ mekafamisma. A nõko xinifo ipaonifo keskarari ã chakafakĩ mekafayamafiakẽ, ea achikaxõ Jerusalén anoxõ romanõfo ano ea nĩchinifo.

<sup>18</sup> Nãnoxõ mã ea yõkakaxõ, ea nĩchipainifo, ãkairoko afaa chakafakẽ ea retexikakĩ.

<sup>19</sup> Ea askafaifono, akka judeofãfe ea iskafayameafo: ‘A chaka kãimayamafe,’ ea faifono, ã xanĩfofo yoini iskafakĩ: ‘Ë xanĩfokõi César ano kapai ato ea yoinõ, ã afaa chakafayamafiakẽ efe yorafãfe eõnoa yoiãfo keskara,’ ixõ ã ato yoini.

<sup>20</sup> Ë mato kenamana mato fe yoinãxiki. Akka mã mã nikai ãfe kaifo israelifãfe, nã noko nimamis Niospa Fake nõ manamis. Nãskakẽ mã mã ea õi nonoxõ ea metexkere akafono,” ixõ Pablo ato yoiãto,

<sup>21</sup> nikakakĩ iskafanifo:

“Judea anoxõ mĩõnoa tsõa noko kirika kenexõ femama. Nofe yorafo judeofori ariax fẽkaxõ mĩõnoa afaa chaka noko yoiãfoma.

22 A mĩ yoi*ai* keskara nō tãpipai, akka mã nō nikamiski, a maniafo tii anoxõ a Jesús Ifofamisfo chakafakĩ, ato mekafamisfokĩ,” ixõ ea yoinifo.

23 Nãskakata, “Pena fetsa nō mefe ichanãfainakaki,” fanifo. Nãskakẽ yora ichapakõi a Pablo ika ano fenifo nikai fekani. Mã feafono Pablo ato yoikĩ yãtafani, Nios xanĩfoõnoa ato yoikĩ. Afeska faxoma Jesúsnoa ato nikamapaikõini, a Moisés kenenifoõnoa ato yoita, a Niospa ato shinãmanaino kenenifoõnoari ato yoini.

24 Pablo ato yoi*aito* ranãrito nikanifo, akka ranãritori nikakaspanifo.

25 Nãskakẽ ãa ranã fochishpanã faatanãnifo ares shinãkanima. Nãskakata mã fopaiyaifono Pablo ato yoini iskafakĩ: “Isaías chanĩmakõi ato yoipaoni Niospa shinãmanaino. Nãõxõ Niospa Yõshi Sharapa mãto xinifo yoini, iskafakĩ:

26 Kaxõ mĩ kaifo yoitãfe iskafakĩ: ‘Mã mã nikakõifikĩ mã nikasharaima; mã mã afara sharafo õifikĩ mã õisharaima.’

27 Mã na yorafãfe nikafikakĩ shinãsharakanima, ãto õiti fẽstokõi. Mã õifikakĩ tãpipaikanima, na ã yoi*ai* keskara chanĩmakõi õifikakĩ. Askatari nikakõiafoma ã ato chaka soaxopanã efe nĩpaxanõfo, ixõ Niospa Yõshi Sharapa Isaías yoini.

28 Na ã mato yoi*ai* keskara tãpikãfe, Epa Niospa noko nimapaiyai keskara mã nikayamaino a judeofoma ã ato yoi afãfe ea nikakõixikani,” ixõ Pablo ato yoini.

29 Pablo ato yoikĩ askafaino, judeofo mã fokani ãa ranã feratenãfonifo.

30 Anoxõ Pablo xiniya rafe ani. A pexe ifo Pablo kori inãni a mẽra ixiki. Nãnoxõ ato ifisharapaoni

õikai fofaifono ato yoisharayanã.

<sup>31</sup> Nãnoxõ ranotamakõi ato yoini afeskaxõ Epa Nios xanĩfãfe noko ãkitiromãki. Nõko Ifo Jesu-cristoõnoari ato yoiaito tsõa xatematiroma ini. Nã tii.

**Niospa meka fena Jesucristo<sup>noa</sup>**  
**New Testament in Yaminahua (PE:yaa:Yaminahua)**

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files  
dated 29 Jan 2022

6c7b7ce2-9d87-5405-91e6-71ce1387adcc